


**DISSERTATIO  
DOGMATICA DE  
CAROLI  
FRIDERICI  
BAHRDTII ET...**

---

Joseph X. Hosemann,  
Maximilian Josef Woher











# DISSERTATIO DOGMATICA

DE  
CAROLI FRIDERICI BAHRDTII

ET  
JOANNIS SALOMONIS SEMLERI  
LUDICRA INTER SE INVICEM PUGNA,  
CIRCA MATERIAS RELIGIONIS PRÆCIPUAS.

ELUCUBRAVIT

JOS. XAV. ALB. HOSEMANN,  
THEOL. DOCTOR, et in UNIVERSITATE  
DILINGANA I PROFESSOR PUBL. ORD.

DEFENDENTE

SELECTAS EX UNIVERSA THEOLOGIA  
THESES

MAXIMILIANO WOCHER  
ZEILENSI, THEOL. BACCAL. et SS.  
CAN. CAND. SS. D. N. PII VI.

ALUMNO.


HORIS ANTE, ET POST MERIDIEM  
CONSUEVIS.

Die 30<sup>ma</sup> Mensis Julii 1781.


CUM PERMISSU SUPERIORUM.

---

DILINGÆ, Typis Joannis Leonardi Brönner,  
Almæ Universit. Episcop. Typogr.



Idem licuit Valentinianis , quod  
Valentino , idem Marcionitis, quod  
Marcioni, de arbitrio suo fidem  
innovare. *Tertullianus L. de prae-*  
*script. adv. haeret. c. 42.*



*ILLUSTRISSIMO,*  
*ET*  
*EXCELLENTISSIMO*  
*DOMINO, DOMINO*  
*FRANCISCO*  
*ANTONIO,*

*S. R. I. Dapifero hæredita-*  
*rio, Comiti in Zeyl & Trauchburg,*  
*Baroni in Waldperg, Domino in Altmans-*  
*hofen, Marfletten, Wurzach, Wolfegg,*  
*Waldsee, & Fridberg, Scherr &c.*

*Serenissimi S. R. I. Electoris Palati-*  
*no - Bavarici*

*Confiliario Intimo,*

*ET*

*Administratori Comitatus Suabec-*  
*ensis &c. &c.*

*DOMINO, DOMINO,*


*Ac*

*MECOENATI GRATIOSISSIMO.*





*ILLUSTRISIME,*  
*ET*  
*EXCELLENTISIME*  
*DOMINE,*  
*DOMINE*  
*MECOENAS GRATIOSISIME !*

 *P*atere obsecro, Comes Illu/stris-  
sime ! nomine TUO hasce meas  
Theses insigniri. Quid non illo  
prae/fixo decoris atque ornamenti habebunt?  
quid illo absente habere poterunt ? quale-  
cunque

cunque enim nomen praesferrent , quia  
TUUM non foret , suum non gererent.  
Cui enim potiori jure laborem meum Theo-  
logicum consecrabo , quam TIBI , qui cum  
ut devoti subditi obsequium , & grati animi  
officium suscipere clementissime dignaris? --  
Verum quid dico obsequium hoc esse erga  
TE meum , cum TUA sit summa in me  
benevolentia , quod positiones hae meae  
Theologicae tanta autoritate , qualis est  
TUA , possint gloriari?

Campus hic mihi panderetur amplissi-  
mus , Clientum more Patronum TE meum,  
non quia Patronum , sed quia dignissimum  
celebrandi , et cur TUO maxime patrocinio  
gaudeam , prolixius explicandi. Possem  
verae nobilitatis decora in TE collecta re-  
censere : quanta in TE sit eruditio , quae  
in regendis subditis justitia , quam vere pa-  
ternus

ternus erga miseros amor, et affectus, quanta pro cultu Divino propagando & DEI lege observanda cura, ut singulari prorsus pietatis exemplo omnium in TE oculos animosque convertas. Haec atque id generis alia virtutum monumenta, quemadmodum in TE admiror magnopere, atque suspicio, ita depraedicarem etiam, ac ad posterorum memoriam summis laudibus efferrem, nisi quae animi TUI summa demissio est, ipsemet mihi silentium imperasset.

Sincera nimirum virtus, qualis TUA est, laudari non vult, potiusque amat facta laude digna, quam laudes factorum. . . . Id tamen bona TUA venia silentio praetere non possum, luculentum ac longe gravissimum pietatis TUAE, & summae, quam de orthodoxa Religione habes, existimationis specimen TE dare, cum praesentes has  
The-

Theſes eo potiffimum ex capite TUO iſcribi nomini patiare, quod Theologicae, quod Religionis materia ſint.


Pro hoc favore, ac benevolentia tam inſigni, tam ſingulari, qua TUORUM erga me Beneficiorum cumulum augere voluiſti, quemadmodum me TIBI obſtriſſimum eſſe, immortalesque debere gratias intelligo: ita ad ſummum humanarum rerum Arbitrum pro TUA incolumitate preces mittam ardentiffimas, ab Eoque contendam maximopere, ut aetati TUAE, non tam annis, quam meritis gravi, innumeros vitae dies adjicere, TEque ſalvum & incolumem, coeleſtibusque donis cumulatiſſime ornatum, quam diutiſſime conſervare dignetur. Me vero, ut in numero Clientum TUORUM in poſterum habeas, mihi-



mihi que favere pergas, oro TE rogoque  
summa, qua debeo observantia.

ILLUSTRISSIMÆ  
TUÆ  
EXCELLENTIÆ

infimus Cliens  
Maximilianus Wocher,  
*Defendens.*



## Introductio.

Qui solent Novellas legere, eorum neminem latet rumor abhinc biennio in Germania per-  
vulgatus de Doctrina Caroli Friderici Bahrdtii, Doctoris Protestantici, quem vel ipsi in sua Religione Collegae ad tribunal Caesareum detulerunt. Et sane quantam sibi Provinciam non lumpsit Jo-  
annes Salomon Semlerus, Halae Magdeburgi Pro-  
fessor, ut contra illius professionem fidei ad Caesa-  
rem datam (a) calamum stringeret? (b) Erat hoc  
sane tempus, ubi si firma, si Apostolica sint Eccle-  
siae Protestanticae fundamenta, falsitatem confun-  
dere, veritatem in aprico ponere cum maximo non-  
nisi fructu poterat. Sed enim qui fiebat, ut tantum  
Semleri studium, zelus pro Religione tantus Fride-  
rico Telleri non placuerit? (c) Is sponte fatetur  
in dedicatoria ad Senatum Cizianum epistola, Sem-  
lerianam Bahrdtii confutationem noviter indigere,  
ut confutetur: neque aliam, quam Horrerius ador-  
nabat, aequiore dignam judicio censet.

Laudo

---

(a) Dokt. Ca l Fried. Bahrdts Glaubens, Bekenntniß.

(b) D. Joh. Sal Semlers Antwort auf selbe.

(c) D. Bahrdts berichtigtes Glaubens, Bekenntniß von D.  
Joh. Fried. Teller.



Laudo Telleri hac in re critice; at non miror. Neque enim si penes sua principia maneant Domini Protestantes, Bahrdtium Collegam suum usque adeo vincent, ut nullam amplius. qua evadere possit, rimam habeat. Semlerum, Tellerum, Lessingium recens defunctum, Horrerium, Tøllnerum & alios quosdam e modernis eruditos viros suspicio; veniam tamen dabunt, si quod res est, edisseram. Quamdiu eos ipsos illud Tertulliani ferit: „ Idem licuit Valentinianis, quod Valentino, idem Marcionitis, quod „ Marcioni, de arbitrio suo fidem innovare; (d) tamdiu ne conjunctis quidem viribus Domini Protestantes penitus Bahrdtium confutabunt. Anabaptistae, Sacramentarii, Zwingliani, Carolostadiani, atque sexcenti alii e schola Lutheri & Calvinii pullulantes eodem, quo primipili parentes sui, jure utentur; idem unus ad invicem dicere poterit: *Per quam viam pertransiit Spiritus Domini a me, ut loqueretur tibi?* (e)

Scilicet Bahrdtius ideo maxime culpandus, quod doctrinam, quam apud se veram censuit, in vulgus spargere, & sic Religionem novam praeter tres in Romano Imperio toleratas invehere, vel magis Socinianam recoquere sectam paraverit? hoc praecipuum Bahrdtii peccatum, hic maximus error fuit? At unum bonum verbum, mei Domini! agiturne

---

(d) L. de praescript. adv. haeret.

(e) 2. Paralip. c. 18. v. 23.



turne de Religione duntaxat externa? de hypocrisi? Ni Bahrdtium blasphemata & haeretica etiam apud se tantum principia tenuisse probetis, vereor ne plus, quam profitis, Religioni vestrae noceatis. Non igitur in eo tantum praecipuus cardo vertitur quaestionis, tolerarine in Romano Imperio, & publice docere possit Bahrdtius; verum quid de Religionis ipsius systemate, quid de fidei articulis, quos professus est, censeri oporteat? haeticusne, an non? qui suam hac in quaestione fidem liberaverit, punctum tulit. Num vero id Semlerus sua confutatione praestiterit: num alii praestare valeant Protestantes? mea in praesentiarum lucubratio manifestum reddet.

Fateor, ut hanc praeter caeteris materiam seligerem, forte mihi calcar addidit Pastoralis Epistola, quam zelo plenissimam Ecclesiae suae Augustanae nuperrime misit CLEMENS WENCESLAUS eo sane fervore, qui Apostolicum Successorem prodatur, ac toto orbe depraedicet. In illa nil magis cordi esse monstratur non sanguine tantum, sed spiritu etiam Regio Praesuli, quam ut errantes etiam heterodoxas ad verum ovile animas ducat. -- Tanti itaque Pastoris vestigia minimus & ego premens, occasionem arripio, ut ostendam, quam nullo labore ac irritum errantem aliquam in Ecclesia sua ovem reducere conentur Domini Protestantes, si suis principiis insistent.

Quo



Quo tamen Lector Dissertationis meae ordinem intelligat, Schema praemitto, quod respiciam.

Erravit Bahrdtius ex defectu Ducis.


ex defectu Lucis.

ex defectu Timoris.


ex defectu Simplicitatis.

En quatuor capita, quæ expediám. Semlerum è vestigio sequar; Bahrdtii primo verba, tum adversarii sui responsionem, dehinc protestantium sensum ac Telleri paraphrasin, veram demum Ecclesiae Catholicae mentem distinctis Sphis exhibebo, inverso tamen ordine prius de decem articulis Bahrdtianis acturus, tum primum in quarto capite perniciofa detecturus principia, quae suae ad caesarem praefationi inspererat.

Egrege quidem in hoc argumenti genere suam operam collocavit Stattlerus in paraenetica ad Bahrdtium epistola. Verum lubuit singulariter Protestantium in medium adferre principia, atque ostendere, quod in iis duntaxat recens emergentem caput Saxoniae colubrum vincant, quae cum Catholicis habent communia. Oro interim, obtestorque catholicos, tum & Protestantes, ut hanc scriptionem meam aequi bonique consulant, quam Ecclesiae Romano-Catholicae Sponsae sine ruga, ejusdemque solius Sponso Jesu Christo toto, quo possum, pectore dono dedicoque.



CA-



## C A P U T I.

### *Erravit Babrdtius ex defectu Ducis.*

#### §. I.

Quī est articulus illius ultimus, primo hic ponam loco, quōd in authoris mente non potuerit non esse omnis origo errorum ac haeresum. Ejus verba haec sunt: „ Certum „ est, Christianos omnes ad ea religionis „ dogmata, quæ in scripturis aperte continentur, credenda & sectanda adstringi. Ecclesiam vero ( sub qua proprie neminem, „ nisi magnam Ecclesiasticorum partem, seu plurima eorum vota intelligo, pro quibus nullo un- „ quam



„ quam tempore praesumptio stetit de profunditate  
„ acuminis , doctrinae eminentia , & iudicii sin-  
„ ceritate ) jus habere , quo doctrinas & conceptus  
„ è Scriptura primum artificiose deductos mihi ad  
„ credendum imponat , non credo. Saltem hoc  
„ repugnaret principiis Protestantissimi , obtinentis  
„ in Romano Imperio parem cum Catholiciſmo au-  
„ thoritatem & jus. Secundum haec namque prin-  
„ cipia , quantum ad meam fidem , nulla aditringor  
„ hominis auctoritate , sed jus habeo omnia pro-  
„ bandi , illudque solum tenendi , de quo me ip-  
„ sum ex Dei verbo convictum sensero. Atque jus  
„ hoc in Doctoribus protestanticis magis se adhuc  
„ extendit , quam in rudibus ; nam ut Doctor  
„ pars Ecclesiae repraesentantis existo , ideoque non  
„ tantum obligor , ut Ecclesiae meae doctrinam pro-  
„ bem , sed etiam ut secutam ex mea probatione  
„ resolutionem , si momenti alicujus sit , meis in  
„ fide fratribus proponam. — Integra hic lubuit  
Bahrdtii verba adponere , quamvis longiuscula ;  
Nam

## §. II.

Ex illis colligitur , tria quam maxime docu-  
isse. Admittit I<sup>mo</sup> , ea religionis dogmata , quae  
clare sunt in scripturis expressa , a Christianis om-  
nibus credi omnino debere. Adfirmat contra II<sup>do</sup> ,  
Ecclesiam fas non habere , ut alia non ita clare con-  
tenta fidelibus credenda injungat. Demum III<sup>to</sup>  
vult , se tanquam doctorem ecclesiae repraesentantis ,

non



non probare modo doctrinam ecclesiae suae posse sive discutere, sed iudicium suum facta discussione resultans etiam obligari aliis in sua religione fratribus indicare. Primum supponit. Aterum & tertium ex protestantismi principiis probat. Per Ecclesiam ecclesiasticae personae ut plurimum veniunt, nulla profundae doctrinae laude, nullo sapientiae praeiudicio commendati; est itaque imprudens, ut humana aliqua auctoritate ad meam fidem ita adstringar, quo minus ab ejusmodi Doctorum decisionibus possim recedere, & id contra tueri, de quo meipsum ex Dei verbo convicero. Quodsi vero semel convictus sim de contrario, quid prohibet, quo minus animi mei sensa aliis possim, quin etiam ut ecclesiae repraesentantis Doctor omnino debeam proponere? frustra igitur a meis collegis protestantibus traducor, invidiose damnor, & nonnisi cum maximo illorum pudore accusor.

### §. III.

Enimvero si è protestantium secta forem, vix non de accurata argumento huic responsione desperarem. Non tamen desperat Semlerus, sed mutilum reddere Bahrdtii ratiocinium cupit. Itaque ecclesiae primo notionem improbat; per ecclesiam, inquit, protestantes neutiquam intelligunt majorem ecclesiasticorum partem, sed principes etiam & magistratus, qui confessionem Augustanam quasi doctrinae normam, suis ditionibus praescripserunt, & in articulis Schmalcaldicis à communi illa concilio-





fiorum methodo & ecclesiae potestate se publice pri-  
dem liberarunt. pag. 107. Secundo fatetur qui-  
dem haud difficulter , posse protestantes passim om-  
nes ob libertatem conscientiae , quam habent , de  
SS. Scripturae dogmatis judicare , & siquidem sa-  
tis fundata non videantur , ea relinquere. pag. 111.  
Ut enim cum Lockio sentit , nullus Christianus ob-  
ligatur ullius hominis autoritate ad credendum  
quodcunque ceu dogma à Christo revelatum , nisi  
circa quod ipse praevio examine adtento de divina  
revelatione sese actu senserit convictum. pag. 13. At  
enim jus circa sacra publica , quod à multo tem-  
pore principibus protestanticis in omnes à se con-  
stitutos ecclesiae ministros competit , confundi nul-  
latenus debet cum jure propriae conscientiae. Istud  
habet quilibet ; ut tamen aliquis docere publice  
queat aliter , quam in sui muneris susceptione  
promisit ; ut quis à libris symbolicis , ab augustana  
confessione , publice etiam docendo , recedat : ut  
principum jura in praescribendis fidei capitulis con-  
trarium publice tenendo violet ; ad id ne doctor pro-  
testanticus quidem jus habet. pag. 107. & 110.  
Quid quod falso dicit Bahrtdius , se esse partem  
repraesentantis ecclesiae ; Theologi quidem Augu-  
stae , Wormatiae , vel Tridenti collecti talis aliqua  
pars dici poterant : quilibet tamen doctor seorsim  
sumptus non item. Adhæc utique penes superiores  
ecclesiarum in Imperio toleratarum situm est , ve-  
lintne doctrinam ejusmodi immaturam usui publi-



co permittere ; quod ubi non concedunt , frustra se jactat Bahrdtius ecclesiae repraesentantis partem. pag. 113. & 15. ita Semlerus.

#### §. IV.

Interea videat in primis illuminatus ille Doctor Halensis , ut ipse misero Bahrdtio adhuc miserior sit. Ergone jura principum circa sacra , deposita super symbolicis libris juramenta , externa reipublicae tranquillitas , doctorem aliquem vel ad turpe in materia religionis mendacium adstringunt : vel ad probrosum & cum officio pastoris pugnans silentium ? Ita vero ex mente Semleri ; nam ut ipse admittit cum Lockio , Bahrdtio , aliisque protestantibus , si aliter apud me convincar de quodam dogmate , quam mea mihi dicet ecclesia , judicium meum ut sequar , nil obstat. Ponamus autem aliquem , uti Bahrdtium , se credere convictum e. g. aeternas non esse inferni poenas : spiritum S. non esse Deum : debetne de his ad populum dogmatibus loqui , an non ? Silentium in re adeo gravi evidenter cum ejus officio pugnat. Ergo loquatur ? At enim quid ? Illud nempe quod exigunt principes , libri symbolici , augustana confessio ? Sic autem aperte mentitur , & tot ex cathedra profert falsitates , quot verba : agit pharisaeum & hypocritam , quia in re summi momenti aliter docet , quam sentit , & falsum verum , verum autem falsum dicit. Siccine mei Domini , misellam decipitis plebeculam ? augurari de facili possum , vos circa ea etiam ,  
quae



quae sola fides catholica sacra conservat, dogmata non raro convictos aliter publice docere, & tanquam Pilatos & Phariseos veritatem suppressere.

### §. V.

Quamquam indirecta solum est ista responsio. Propius Bahrddii & Semleri pedes pedibus pre-mam. Scilicet illud primitus vitio vertit Semlerus, quod sub ecclesiae nomine solos ecclesiae ministros acceperit Bahrdtius: non autem nominaverit principes? quasi vero hi in re dogmatica infallibilitatis pondus adderent; quasi vero majus in Theologicis acumen & scientiam obtinerent: quasi vero non etiam ipsi ab aliis non nunquam hominibus valde secularibus, & studio partium additis instruerentur. Enimvero Semlerus tandem ipse se consentit, neque hanc auctoritatem sufficere; ut conscientias liget, & intellectum aliter convictum ad fidem adstringat. — Unum hic verbum Semlere! Numquid ipsimet illi principes ad ecclesiam spectabant; qui reformationis tempore à conciliorum forma & ecclesiae potestate se publice liberarunt? numquid Lutherus & Calvinus tanquam homines mere privati jus habebant novum spargendi doctrinae semen? Quare licuit illis totius in Imperio Romano religionis systema invertere? Quia principes consenserunt? At enim quid fiet, si defacto princeps aliquis protestanticus e. g. de sociniana apud se cum Bahrdtio religione convictus in consortio alterius principis illam doceri, & exerceri



publice permittat ? foedifragum inclamabis & in concordata delinquentem. Ast num putas, Deum accipere hominum inter se foedus cum religionis verae detrimento, quale in sua persuasione evidenter oriri talis princeps cerneret ?

## §. VI.

Itaque permittere, imo tanquam fidei protector, pro viribus promovere talem religionem poterit princeps, de qua ipse in conscientia convictam se senserit. Ecquid jam obstat, quo minus citra peccatum alius quidam doctor sibi adhaerentes quaerat ? Quid obstat, quo minus in Romano Imperio Arian, Sociniani, alique tolerantur ? Nec centum libri symbolici, nec mille confessiones vel promissiones obligare quempiam possunt, ut falsum doceat. Ipsi per hoc adversarii excusant Lutherum & Calvinum tantopere contra ecclesiam romano-catholicam debacchantes, cui prius tanquam filii semet obstrinxerant ; quidni ergo liceat Bahrdtio, & Dallaeo Lutheri & Calvini discipulis, quod magistris licuit, de arbitrio suo fidem innovare ? — Scilicet missio deest, quam hi prae illis habuere. Ast nemo hactenus protestantium vel umbratile argumentum adtulit, quod Lutheri aut Calvini missionem probaret ; seipfos miserunt diaboli praecentores.

## §. VII.

Heinc bene quidem Semlerus negat, Bahrdtium dici partem ecclesiae repraesentantis posse. At  
vae



vae propterea etiam **Luthero ! vae Calvinio !** quam enim hi repraesentarent ecclesiam ? an veram , an falsam ? Si falsam ; perdita est protestantium causa . Si veram ; num calvinisticam ? an Luthericam ? Atqui utraque ab ipsis primum sumpsit exordium : non ergo esse vera potuit . Aliamne igitur , & qualem , scilicet tum temporis invisibiliter existentem ? Sic vulgo aiunt protestantes ; sic **Lutherus** ipse de se perhibet : (f) „ Audemus gloriari , „ Christum primo a nobis vulgatum . „ Verum resistat huic ambitioni **Tertullianus** , qui suo jam tempore , etsi ducentorum tantum annorum praescriptione fretus , Haereticis haec objecit : „ Quid ? „ verisimilene est , ut tot ac tantae Ecclesiae in „ unam fidem erraverint ? scilicet aliquos Mar- „ cionitas & Valentinianos (dicamus nos , Luthe- „ ranos & Calvinianos ) liberanda veritas expectabat ? Interea perperam evangelizabatur , perperam credebatur , tot millia millium perperam tincta , tot opera fidei perperam administrata , tot virtutes , tot charismata perperam operata , tot Sacerdotes , tot Ministeria perperam functa ? „ --- Hoc si ita est , neglexit officium Dei vili- „ cus , Christi Vicarius , Spiritus sanctus , sinens „ Ecclesiam aliter interim intelligere , aliter credere , quod ipse per Apostolos praedicabat . „ (g)

**Bene vero ; quam parum Lutherus atque Cal-**

B 3

vinus

---

(f) in Praefat. corp. doctr. Lips. edit.

(g) L. de praescript. adv. haeret.



vinus veram repraesentare Ecclesiam possunt, tam parum Bahrdtius & Semlerus cum eentum aliis ministrellis protestanticis. Utrum vero hi Ecclesiam suam falsam repraesentent, uti de confessionis augustanae fabricatoribus adfirmat Semlerus? utrum Bahrdtius hoc eodem jure gaudeat pro sua saltem parte? me parum angit. Certe non deberent hanc repraesentationem avere tantoperè eruditi viri; quid enim laudis abinde, quod quis talis Ecclesiae pars existat, in qua aliter etiam circa materiam Religionis docere liceat, quam sentire?

## §- VIII.

Sane quantumvis Fridericus Tellerus aliique e Protestantibus & professionem Bahrdtianam, & Semlerianam confutationem horreant, sentire tamen vel nolentes debent, etiam se omnes isthoc argumento premi. Nam ut cuidam dogmati fidem adhibeam, criterium aliquod veritatis de facta revelatione me habere oportet. Jam porro quale illud? Autoritas doctorum suae ecclesiae ex ipsa plurimorum ac eruditorum protestantium confessione non est. Minus tale criterium esse potest autoritas Principum, lege stabilientium pro regula fidei publica Confessionem Augustanam, aut Formulam Concordiae: Quippe qui non suo id, sed unice doctorum suorum, Lutheri, Melanchtonis, & aliorum judicio egerunt. Oportebit itaque, vel nolentes ad illum denuo spiritum privatum confugere,

&



& cuilibet licentiam dare, ut se ex Ss. Scriptura convincat, atque ideo, quod lubet, interne credat; externe vero Religionem Protestanticam simulct. Quid vero hoc est, mei Domini, quam abominandum in religionis materia perpetrare mendacium? Num plus valent vobis Libri vestri Symbolici, & cusae a male feriat hominibus confessiones, quam Evangelium? *Qui me erubuerit, & meos Sermones, hunc filius hominis erubescet.* (h)

## §. IX.

Scilicet quaeso, fatemini tandem, vos cum politica vestra fidei professione non evadere, nisi etiam circa Religionis dogmata, circa dignoscendum Scripturae sensum internam privato cuilibet seorsim sumpto libertatem conscientiae adimatis. Super hoc sane principio mea ad Bahrdtianum Articulum fundatur responsio. Libertas conscientiae in re dogmatica, in Religionis materia non est favor hominum, sed est Scepticismus, est Fanatismus, quem tantopere Protestantes averfantur. — Atque ut successive procedam; verum equidem docet Bahrdtius 1<sup>mo</sup>, ea, quae clara sunt Scripturae dogmata, credi ab omnibus oportere. At enim vir bone, quis tibi Scripturam dedit genuinam, unde ista colligeres? Habes ne e manu Ecclesiae Romano-Catholicae? Si autem huic in proponenda fidei regula credis, quare non in eadem explicanda? Scilicet

B 4

per

---

(h) Luc. 9. v. 26.



per hermeneuticen de genuinitate Scripturae tibi, ac tuis contribulibus constat? Sed eho quamvis hanc artem plerique passim e doctis Protestantibus callere sibi videantur, quid est, quod nihilominus circa editiones controversas, & ponderosos non raro textus inter se acriter digladiantur? Lutheri Biblia, an Calvini; Anabaptistarum, an Zwinglii prae-habenda sint, ecquis protestantium e solius hermeneutices regulis decidere haecenus valuit? Calviniana Ecclesia peritòs non minus jactat Dallaeos, & Blondellos, atque Lutherica Gœzenios. & Wetstenios. Uter ex illis recte judicat? Caligent ad vetustum jam hoc argumenti genus Protestantes oportet, sicut in variis confessionum formulis saepissime caligarunt, quas jam cuderunt, jam recuderunt, uti vel de sola Confessione Augustana ostendi posset ad oculum. — Non ergo Bahrdtius & Semlerus admittunt consequenter, dogmata in Scripturis clare contenta credi debere, si id de aliis dogmatis per Ecclesiam explicatis atque propositis negent.

## §. X.

Falsum itaque alterum Bahrdtii principium §. II. indicatum, si de vera Christi sumatur Ecclesia. Huic enim Christus dedit Pastores, & Doctores ad consummationem Sanctorum, in aedificationem corporis Christi, donec occurramus omnes in unitatem fidei, & agnitionis Filii Dei — — — ut jam non simus parvuli fluctuantes & circumferamur  
omni





omni vento doctrinae. Haec Ecclesia Christi, quam Apostoli ceu primi Doctores a Domino constituti, instituerunt, ceu columna & firmamentum veritatis (i) totum depositum fidei a Christo relatum, ex manibus suorum Doctorum accepit, cum obligatione omnibus fidelibus imposita in conscientia credendi, & faciendi omnia, quaecunque Christus Apostolis mandaverat. — Doctrinam hanc centies demonstratam sensisse apud se videtur Bahrdtius; unde dum cit. Artic. cum Protestantismi principiis illam combinari non posse adfirmat, quid aliud prodit, quam ecclesiam hanc suam sibi non arridere? Et bene quidem hic ad suae Sectae falsitatem concludit; nam Ecclesia, quae suis fidelibus imponere in conscientia dogmata non potest ad credendum, vera non est: Sic enim omnes passim circumferentur vento doctrinae, si vivum, quem sequantur, magistrum veritatis non habeant. Atqui ex doctissimorum Protestantium Lockii, Semleri, aliorumque plurimorum agnitione Libri Symbolici, Confessionum formulae, Principes & Pastores nequeunt fidem in conscientia praecipere ullis Articulis praestandam. Non ergo veram ipsi ecclesiam habent. Sistat jam Gradum Bahrdtius,

## §. XI.

Et intelligat, quam misere ex defectu Ducis erraverit. In Ecclesia sua Protestantica infallibilem  
Magi.

---

(i) 1. Timoth. 3.



magistrum non reperiit : ergo protinus conclusit ,  
 sibimetipsi & privatis aliis judicandi de rebus dog-  
 maticis jus competere. Sic ipse statuit , sic sta-  
 tuunt alii cum ipso doctissimi Protestantes. At enim  
 mei Domini ! illatio vestra per saltum est , bonam non  
 continet Logicam. Numquid magis concludere  
 debebatis prius : ergo inquiram aliam Ecclesiam ,  
 quae ex institutione Christi columna & firmamen-  
 tum veritatis est : Ecclesiam , quae ab Apostolicis  
 jam temporibus sub anathematis vinculo non tot  
 quin plures quaestiones controversas contra Haere-  
 ticos homines definivit : Ecclesiam , quae ex Ss.  
 Literis satis claris , & quas ipsi agnoscunt Adver-  
 sarii , infallibile sibi docendi , obligandive munus  
 adtribuit ? Hoc sane faciendo Domini Protestantes  
 suae tum famae , tum conscientiae magis consule-  
 rent , quam cum cuilibet Scripturam judicandi fa-  
 cultatem adsignant ; hoc enim jam pridem vera per  
 Tertullianum improbavit Ecclesia : „ Qui estis ?  
 „ quando & unde venistis ? quid in meo agitis non  
 „ mei ? quo denique Marcion ( *Luthere* ) Sylvam  
 „ meam ( Scripturam ) caedis ? qua licentia Valen-  
 „ tine ( *Calvine* ) fontes meos transvertis ? qua  
 „ potestate Apelles ( *Semlere* ) limites meos com-  
 „ moves ? Mea est possessio. Quid hic ceteri ad  
 „ voluntatem vestram seminatis & pascitis ? Mea  
 „ est possessio. Olim possideo , prior possideo , ha-  
 „ beo origines firmas ab ipsis auctoribus , quorum  
 „ fuit res. Ego sum Haeres Apostolorum. Sicut

cave-



„ caverunt Testamento suo, ficut fidei commiserunt,  
„ ficut adjuraverunt, ita teneo. Vos certe exhae-  
„ redaverunt femper. & abdicaverunt ut extrane-  
„ os, ut inimicos. „ (k)

## §. XII.

Et sane Schwencksfeldiana isthaec illatio : me-  
ipsum studebo e Scripturis convincere, ridiculos  
nonnisi praecones protestanticos facit, ipsamque  
eorum Religionem exponit ludibrio. Praedicat mi-  
nistellus dogmata; at respondet intra se auditor :  
Expecta paulisper, usque dum me ipsum convicero.  
Proponit pastor, hoc aut illud esse credendum; re-  
ponit ovis sibi magis in Bibliis sapere visa : non cre-  
do. Instat praeco, illud esse expressum in Ss. Lite-  
ris; regerit Catechizandus : ego aliter intelligo.  
En mei Domini vestram fidem! & tamen adhuc in  
vestrae conscientiae libertate plauditis? Hercule!  
quod versatissimi non arrogarunt sibi Patres, hoc  
non vobis modo, sed rudibus etiam competere ad-  
feritis absque scrupulo? Qui magis periti in Scri-  
pturis, quam Magnus Basilius & Nazianzenus Gre-  
gorius? & tamen de his Ruffini testimonium est,  
„ Scripturarum intelligentiam non ex propria prae-  
„ sumptione, sed ex majorum scriptis, & authori-  
„ tate fuisse secutos; quos & ipsos ex Apostolica  
„ successionem intelligendi regulam suscepisse consta-  
„ bat. „ (l) Quam belle huc quadrat illud Augu-  
stini :

---

(k) L. de Praescript. c. 17.

(l) Hist. Ecclesiast. l. 2. c. 9.



fini : „ Tu in eos libros , qui sancti , divinarum-  
 „ que rerum pleni sunt , & ut tales prope totius  
 „ humani generis confessione diffamantur , sine  
 „ Duce irruis , & de his sine Praeceptore audes  
 „ ferre sententiam ? „ (m)

### §. XIII.

Ast quo se convertant pro intelligenda veritate  
 DD. protestantes ? Ubi magistros reperient ? Apud  
 catholicos forte ? Sed pudor ! neque pro istorum  
 Episcopis ac Theologis ullo tempore stetit prae-  
 sumptio de profunditate acuminis , doctrinae emi-  
 nentia , & iudicii sinceritate §. I. Nolim tam e-  
 normem sanctissimis juxta & doctissimis ecclesiae  
 catholicae Patribus impactam injuriam fusius resu-  
 tare , quae utpote seipsa ruit , si vel cogitando ad-  
 tingantur ingentes illorum & conciliorum codices.  
 Solo isthoc scuto Bahrdtium , eique conspirantes  
 repello , quod Stattlerus ( n ) suggerit : Legalis  
 societas est Christi ecclesia , simulque perpetua.  
 Ergo perpetuam quoque a Christo auctoritatem ob-  
 tinuit docendi , obligandive in conscientia. Atqui  
 haec auctoritas evidenter includit donum veracita-  
 tis falli nesciae ; nulla enim auctoritas mere hu-  
 mana in dogmatis a Christo traditis docendis ad  
 certam persuasionem sufficere potest. Ergo Chri-  
 stus vel munus docendi perpetuum esse velle non  
 de-

---

( m ) l. de util. cred. c. 7.

( n ) Epist. Paraenet. ad Bahrdtium. pag. 54.



debut, vel etiam donum veracitatis falli nesciae, & auctoritatem quamdam divinam, quam semel Apostolis cum munere docendi contulit, perpetuam esse velle, & conjunctam cum illo munere debuit. Atqui talem auctoritatem suis in Episcopis ex lege ac praescripto Christi exercentibus munus Apostolicum, quod continua successionis serie ab Apostolis transmissum accepere, agnoscit sola ecclesia catholica. Sola ergo haec vera Christi ecclesia est, sufficienti ad exercendum munus docendi auctoritate sola sapienter instructa. Ubi vides, veracitatis donum Episcopis non conferri, quod sapientes sint; sed quod Apostolorum successores, quod ecclesiae verae praefules, quod religionis Christi perpetuo duraturae conservatores. Igitur vel Apostolicam non esse ecclesiam Romano-catholicam proba, vel totum superius argumentum concede.

#### §. XIV.

Ad eam igitur ecclesiam respicere debuissent Bahrdtius & Semlerus, quae se Apostolicam probat, ut veritatem a nobis mox positam palparent. Porro Apostolica quatenam est, nisi illa, de qua HIERONYMUS: (o) „Quisquis es assertor novorum dogmatum, quaeso te, ut parcas romanis, auribus, parcas fidei, quae Apostolica voce laudata est? „ Quatenam nisi de qua dicit AUGUSTINUS: „ Quaerenti alicui peregrino, ubi ad catholi-

---

(a) in epist. ad Pamachium.



„tholicam conveniatur , nullus haereticorum vel  
 „ basilicam suam , vel domum audet ostendere ? „  
 ( p ) Et de qua idem : , Evangelio non crederem ;  
 „ nisi me ecclesiae catholicae commoveret authori-  
 „ tas ? „ ( q ) Non ergo vos mei Domini ! Apostoli-  
 „ cas potestis dicere ecclesias vestras ; nam „ edite  
 „ origines ecclesiarum vestrarum , evolvite ordinem  
 „ Episcoporum vestrorum . , TERTULLIANUS ( r ) .  
 „ Vos vestrae cathedrae originem reddite , qui vo-  
 „ bis vultis sanctam ecclesiam vindicare . „ S. OPTAT.  
 MILEV ( s ) . Solius catholicae privilegium illud est ;  
 haec se citius , & magis Apostolicam potest com-  
 probare , prolata in medium Episcoporum suorum  
 Apostolis succedentium serie : quam protestantes  
 ecclesiam suam Evangelicam nominare . Unde tan-  
 dem ipsis merito illud S. Cypriani dicitur : „ Nova-  
 „ tianus ( *Lutherus vel Calvinus* ) in ecclesia non  
 „ est , nec Episcopus computari potest , qui evange-  
 „ lica & apostolica traditione contemta , nemini  
 „ succedens , a se ipso ortus est ; „ ( t ) & infra :  
 „ Pastor quomodo haberi potest , qui ( manente  
 „ vero pastore , & in Ecclesia Dei ordinatione suc-  
 „ cedanea praesidente ) nemini succedens , & a se-  
 „ ipso incipiens , alienus fit & profanus ? „ Illud  
 ergo

---

( p ) contra epist. fundamenti.

( q ) epist. cit.

( r ) l. l. de praesc. c. 32.

( s ) l. 2. contr. Parmen.

( t ) epist. 76. ad Magnum.



ergo Hieronymi Bahrdtio interea in aurem dixero :  
 „ Brevem tibi apertamque animi mei sententiam  
 „ proferam, in illa ecclesia esse permanendum, quae  
 „ ab Apostolis fundata usque ad diem hanc durat.  
 „ Sicubi audieris eos, qui dicuntur Christi ( seu  
 „ Christiani ) non a Domino Jesu Christo, sed a  
 „ quoquam alio nuncupari, ut puta Marcionitas,  
 „ Valentinianos, Montenses, sive Campitas ( *Lu-*  
 „ *theranos, Calvinistas, Zwinglianos* ) scito, non  
 „ esse ecclesiam Christi, sed Antichristi esse synago-  
 „ gam. Ex hoc enim ipso, quod postea instituti  
 „ sunt, eos se esse indicant, quos futuros Aposto-  
 „ lus praenuntiavit. 1. *Timoth.* 4., ( u )

### §. XV.

In catholica itaque ecclesia infallibile illud docendi munus datur, divinaque docendi autoritas. Quis autem tam excors erit, tam petulans, ut audeat divinae auctoritati contradicere? Obligamur ergo in conscientia ad credendum, quae nobis ut revelata proponit. Atqui vero nil magis damnat illa unice vera Christi ecclesia, quam humanae conscientiae in recipiendis dogmatis libertatem. Videat ergo Bahrdtius, ut se insipienter resolverit, & inique certaverit, ac Caesarem compellarit pro illa inducenda; Caesarem inquam, qui non tam ratione foederis publici & Concordatorum Germaniae, quam ratione religionis Christi, cujus ve-  
 rum

---

(u) in dial. contra Luciferian. in fine,



rum existit membrum; jure divino & naturali obligatur novas quaslibet haereses opprimere, & a Romano arcere Imperio. — Sed & Semlerus cum infamia abeat, qui eandem cum Bahrdtio adstruens conscientiae libertatem, nonnisi pro externa & mere politica religione se impendit, & sic vel hypocrita gravissimus ipse est, vel alios certe hypocritas in summa religionis materia cupit efficere. Hinc quasi saxum inter pressus & angulum, antequam responderet Bahrdtio, hanc animadversionem ponit, male timens causae suae Doctor Luthericus: „Wenn der Herr Verfasser nicht parthenisch, „oder nicht eifertig und nachlässig zu handeln sich vorgesetzt hätte: so hätte dieses Stück auch ganz und gar wegbbleiben müssen.“ pag. 105. Scilicet Bahrdtius coegit Semlerum, ut edicere debuerit etiam ipse illud Theismi principium pag. 7: „Ein einzelner Mensch — — kann sich in allen dreyn öffentlichen Religionen zur besondern Parthen wenden, welche ihm am meisten mit der Lehre Jesu, und mit gewisserer eigener Vollkommenheit und Erbauung einzustimmen scheint; er kann Jansenist seyn, und ein strenger Schüler Augustini; er kann zur Gegenparthen gehören; er kann die praktische Religion aus Spenners oder andern Schriften, gar aus Böhmen, Dippel, Herrnhut für sich annehmen; er kann ein Arianer, Socinianer seyn. Ja gar, wenn er sich dazu verbunden achtet, ein Jude werden; nur muß er in den letzten genannten Parthen diese seine eignen Gewissens Rechte nicht weiter

ter





„ter ausdehnen , und nicht in öffentliche , die der ganzen  
„besonderen Gesellschaft gehören, verwandeln. „

## §. XVI.

Noscas hinc, amice lector ! e cantu voluminem. Etiam illis , qui uni ex tribus toleratis religionibus dedere nomen, liberum est apud se vel cum Arianis sentire & Socinianis, vel omnino cum Judaeis, modo externe non profiteantur. Jam quacso te, vel talis ad suam adhuc ecclesiam spectat, an non? manetne Lutheranus, Calvinianus, an non? Si ita; ecclesia protestantica docere & adprobare pugnancia potest. Si non; ergo cum ecclesia protestantica suis membris facultatem tribuat, quid lubet, sentiendi, animorum inter se unio non datur. Quidquid dicatur, vera Ecclesia esse penes protestantes non potest, sed magis ipsi sectam conficiunt indifferentistarum non modo strictiorum, ut vocant, sed etiam laxiorum qualemcumque demum religionem amplectentium, externe vero politicam duntaxat simulantium. Tales autem quo nomine aptius compellentur, nisi Theistarum? est ergo ecclesia protestantium congregatio Theistarum. Vah tristem sequelam, quam coguntur Bahradius, Semlerus, iique omnes admittere, qui libertatem conscientiae tantopere praedicant, & judicem controversiarum infallibilem ac externum non agnoscunt, sed privato cuique examinandi dogmata & iudicandi facultatem tribuunt. Neque in ecclesiam romano-catholicam retorquere jactum hoc in se te-



lum protestantes possunt ; illa namque fidelium suorum nulli potestatem tribuit , dogmatis a se definitis internum praestare dissensum : imo tribuere facultatem hanc tam parum potest , quam parum adprobare , ut quis divinae revelationi contrarius eat. Sensit veritatis istius pondus Isaacus Papinius , ecclesiae olim anglicanae minister , post autem ad catholicam unitatem reversus ; cujus verba gravitate & sinceritate plenissima protestantibus omnibus ad perpendendum hic offero : „ Mihi , „ inquit , persuasum fuit , protestantes si vel latum „ unguem a Tolerantismo recederent , a catholicis „ vinci ; vinci vero ab haereticis & infidelibus , si „ non recederent , quibus arma ad se defendendum „ suppeditant ; neque enim facere possunt , quin „ omnibus salutem concedant , & docendi , quidvis „ libuerit , tribuant facultatem. Eadem argumeta , quibus Tolerantes eos ferendos esse probant , qui Ss. literas , quacunque demum ratione explicentur , pro fidei regula habent , non minus efficaciter probant , ferendos esse infideles , & generaliter , quotquot bona fide se esse profitentur , etiamsi Athei essent. Et quibus momentis a tolerantia Christianismi hostes excludunt , etiam tolerantia eos omnes indignos esse pronunciant , quos tolerandos esse profitentur. „ Ita rotunde fatetur Papinius. (w) Videri etiam potest Fridericus Sta-

---

(w) 1. les Deux voies opposées en matière de Religion , l'examen particulier . & l'autorité. 2. part. Sect. 1. n. 13.



Staphilus in Epitome trimembri Theologiae Lutheranae, ubi haec eadem objecit Philippo Melanctoni, qui respondere directe nil potuit.

## §. XVII.

Abfit vero, ut doctrinam Bahrdtii censeamus in Romano Imperio tolerandam; eliminari debet, condemnari, & toto, si fieri possit, orbe proscribi. At enim quo id fundamento velle Semlerus potuerit; quo rationis nexu id possint urgere Protestantes, ego quidem non capio. Soli Romano-catholici sunt, qui cum effectu resistent Bahrdtiano molimini, & infernalem ejici hydram jure postulent. Neque Luthero, neque Calvino licuisse fidem innovare, isti omnino julte praetendunt; si ergo fieri tum temporis salva ecclesiae verae externa tranquillitate potuisset, summi principes & imperantes tanquam verae ecclesiae protectores impedire sparsam ab illis pseudoreformatoribus doctrinam ac suppressere debuissent. Cum ergo facile sit, recens ortam Bahrdtii doctrinam, & Socinianismum in illo recrudescentem succidere, ad id omnino faciendum obligatur Caesar, atque omnes sacri Romani Imperii principes. Execrentur igitur una nobiscum protestantes doctrinam Bahrdtii, in quem illud Apostoli dirigitur: *Ex vobis ipsis exurgent viri loquentes perversa, ut abducant discipulos post se.* (x) Verum neque Semlero suo, aliisque quinti Evange-



lii ministellis fidant, qui de se ipsis fatentur, non licere sibi veritatem, quam in corde habent, publice edicere; in quos proin illud quadrare intelligitur: *Attendite à fermento phariseorum, quod est hypocrisis.* (z) Hi namque *a foris adparent hominibus iusti (credentes) intus autem pleni sunt hypocrisi.* — Hos inquam praedicatores suos ac doctores fugiant; fidei enim duces non sunt, sed viri mere politici sub religionis externae specie falsitatem palliantes.

## §. XVIII.

Haftenus de ultimo tantum Bahrdtii Articulo dictum, quem §. I. descripsimus. Verum etiam nonus huc pertinet, quamvis, ut videtur, externa sua specie prorsus innocuus. Hic autem illius tenor: „ In Ss. Novi Testamenti literis divina pro „ hominibus ad obtinendam felicitatem contineri „ documenta, quibus fiduciam omnem debeamus „ ac obedientiam, certum habeo. Deum vero „ omnia inspirare Literarum illarum verba, con- „ vincens hucusque argumentum legi nuspian. „ — Si nil ultra velit Bahrdtius, quam certum non esse, an omnia verba Ss. Scriptoris divinitus sint inspirata; haud est, cur multis contra ipsum armis pugnemus. Norunt omnes, nedum inter Protestantes, sed ipsos Catholicos de re adhuc illa impune controverti. At enim cui bono suos inter

Arti-

---

(z) Luc. 12. v. 1.



Articulos hanc litem ponit ? Frustra est, pro sua conscientiae libertate nil lucratur Author; etsi verba non omnia sint inspirata seorsim sumpta: etsi obscurus non raro adpareat verborum sensus, atque integri non raro textus imbecillitati nostrae caligo fiat; propterea fas non est cuilibet explicare pro lubitu & judicare; interpres enim authenticus semper ad manum est, Divini Spiritus illustratione veritatem edoctus, nimirum Ecclesia, quae hoc vel illud revelatum Divinitus fuisse adserit, aut negat.

## §. XIX.

Unum porro est, quod oppido mihi videtur suspectum; quare nil hoc suo Articulo de veteris Testamenti literis ac de Divina earum autoritate commemoret; quasi non etiam illae Divina pro hominibus contineant Documenta. Nolim ego Bahrtdium nigro propterea notare calculo; at enim si regulam fidei scriptam, quae Christianismo servit, voluit exactam ponere, non potuit sine Manichaeismi suspicione Testamenti veteris paginas reticere. — Maluerit scilicet abstrahere, quam ex Protestantismi Principiis ita ponere, sicut in sua contra ipsum responsione Semlerus posuit; hic ait:

„ Auch in der Sammlung der Bücher des alten Testaments sind ebenfalls göttliche Belehrungen der Menschen enthalten: denen wir alles Vertrauen, und allen Gehorsam (aus mitfolgender Ueberzeugung unsers Gewissens, aus Erfahrung) schuldig sind. „



tendum sane, longe periculosius hic loqui Semlerum, quam tacere Bahrdtium. Quid enim sibi vult ista Parenthesis? Illam videlicet Crambem denuo recoquit, nec veteris Testamenti libris credere me debere, nisi me propria conscientia convincat & experientia. Cum ergo in Semleri ac doctissimorum Protestantium sensu nulla sit in mundo auctoritas, quae Scripturae documenta omnibus infallibiliter credenda proponat: Cumque rursus alius sic, alius autem sic legem veterem intelligat; ideo Testamentum vetus regula credendorum nec pro omnibus esse potest, nec pro singulis.

## §. XX.

Profecto enim ut a pari ducam argumentum, si Protestantici Doctores suis dent subditis Catechismum aliquem seu Credendorum summam, ea tamen conditione, ut liberum sit cuilibet ea credere, de quibus se judicaverit esse convictum; nae maxima foret haec difformitatis ansa inter subditos! quandoquidem alius Articulum unum expunget, quem alter tenet. Hic delebit, quem ille tuetur. Atque sic fiet, ut neuter securus sit, cum quilibet se fallibilem esse deprehendat. — Quaeso te, & talem tu regulam esse Scripturam dices, in qua quid divinum sit, quid vero non, a propriae conscientiae judicio pendeat? Quid ergo, si de nullo veteris Testamenti documento quis convictum se putet, ut Manichaeus? vel de nullo legis novae, ut Judaeus? Tunc inquis, fides non debetur. At enim




enim putasne cum sapientia Dei ac providentia combinari duo haec principia posse : Deus offert nobis librum , in quo fidei dogmata & divina documenta continentur. Item : Quatenus sint illa , fallibili suo & privato quilibet cognoscet judicio ? Vel igitur stante fallibili hominum judicio claram omnino dare debuit regulam fidei , quod factum non esse tot haereses & sectae abhinc jam exortae demonstrant. Vel omnes debebat facere in suo judicio infallibiles , quod illum non fecisse , ex tot contrariis inter se religionibus rursus patet. Vel improvide ac imprudenter DEUS egit hinc ad regulam fidei amplectendam obligando , illinc media ad eam dignoscendam sufficientia denegando , id quod blasphemum est cogitare. Vel tandem infallibilem quemdam & externum Interpretem , Ducem , & Magistrum , cui fidere omnes possint , oportuit constituere. Atque hoc est , quod nos Catholici dicimus ; quod cum non admiserit Bahrdtius , mirum haud esse debet , tam grave illum fecisse naufragium , ex defectu

Ducis. Sed nec cynosuram aspexit ,


fideique nostrae anchoram ; hinc

lapsus , hinc pudor ! Nam

etiam



CA-



## C A P U T II.

### *Erravit Bahrdtius ex defectu Lucis.*

#### §. XXI.

**L**ucem fidei nostrae Paulus monstrat : *Gratia Domini nostri Jesu Christi, & charitas Dei, & communicatio sancti Spiritus sit cum omnibus vobis.*

(a) — Qui ergo pensitaverit, Bahrdtium de Spiritu S. de Christi Divinitate, de Gratia & Satisfactione turpiter haluccinatum esse, ne miretur, ad Socinianas eum, & Sabellianas tenebras devenisse. Sic autem sonat articulus Bahrdtii quartus : „ Cre-  
„ do Deum Apostolis suum dedisse Spiritum, de eo  
„ tamen, quod hic Spiritus tertia in Deitate per-  
„ sona sit, convictus non sum. Quin potius in SS.  
„ Literis aliam de πνευμα ἅγιον significationem  
„ non invenio, nisi hanc duplicem : ut scilicet per  
„ illud vel divinitus collatae intelligantur dotes,  
„ talenta & vires, vel certe nomen Dei ipsum, qui  
„ talia dona largitur. „

#### §. XXII.

Vix uspiam minus Bahrdtio resistit Semlerus, quam in hoc articulo ; adeo & huic nasutulo Trinitas

---

(a, II. Cor. c. 13. v. ult.





tas personarum displicet. Manus ergo invicem sibi jungunt, & contra Deitatem Spiritus S., quantum possunt miseri & bilingues, ambo conspirant, suumque brachium roborant adversus Altissimum. „Fa-  
 „ teor, inquit Semlerus pag. 81. de nomine tertiae  
 „ personae interesse plane nihil; modo e Scriptura  
 „ Christiani credant, per Spiritum S. indicari au-  
 „ ctorem Spiritualium effectuum ad emendationem  
 „ illorum, aeternamque salutem. Quod ad rem  
 „ ipsam adtinet, jam pridem in confesso est, per  
 „ πνευμα ἁγιον non ubique personam seu alium a-  
 „ gentem designari; sed potius frequentissime per  
 „ Metonomiam effectus ipsi ac dona Spiritus S. ist-  
 „ hoc nomine notabantur. Apostoli sub hac signi-  
 „ ficatione receperunt Spiritum sanctum. „

### §. XXIII.

Et quis non stupeat Semleri magis audaciam quam Bahrdtii? Ille huic parat in faciem resistere, cum trabem eandem in suo fixam oculo habeat. Provoco hic DD. Protestantes omnes, ut judicent, in quo ambo illi circa praesens punctum differant. Numquid Semlerus ipse pravam suam mentem affatim declaravit? Numquid satis detexit ulcus, quando Gœzennio editionem graecam Complutensem & contentam in ea Im<sup>z</sup> Joannis Epistolae illam periocham: *Tres sunt, qui testimonium dant in caelo: Pater, Verbum, & Spiritus sanctus, & hi tres unum sunt*; (b) strenue defendenti respondere publice au-



sus fuit? „ So halte ich bey aller meiner unberuhig-  
 „ ten Einsicht der Lehre von der Dreyeinigkeit ( denn  
 „ ich soll dieß Wort immer brauchen: Vater, Sohn  
 „ und Geist sind nicht deutlich genug zur Seligkeit )  
 „ die Arianische Streitigkeit für quaestionem eccle-  
 „ siasticam. ( c ) — Numquid idem ipse Semlerus  
 tanquam ex tripode pronuntiat: „ Es ist ganz aus-  
 „ gemacht, ganz entschieden, daß eben diese wörtli-  
 „ che Beschreibung: eine Lehre von dreyen verschie-  
 „ denen Personen in dem einen göttlichen Wesen:  
 „ gar nicht zu den Grundlehren der Christlichen Reli-  
 „ gion oder des Christenthums gehöre. „ ( d ) Num-  
 quid tandem in responsione ad Professionem Bahrd-  
 tianam pag. 45. sponte fatetur: „ Ob Heil. Geist  
 „ eine Person ist, für sich, eine dritte; oder Gottes  
 „ heiligende Wirkung: ist in Absicht des Erfolges  
 „ der Wirkung in dem Menschen, ganz und gar ei-  
 „ nerley; kann gar nicht eine Quelle des Unglaubens  
 „ werden, es ist ganz unmöglich. „ — Proinde qui  
 non credit tertiam in Deitate personam, sed discre-  
 dit, neutiquam is in Semleri mente superstitiosus,  
 neutiquam incredulus est.

## §. XXIV.

Jam vestram fidem mei Domini! si expeditum,  
 si decisum penitus sit, ad fundamentales Christiani-  
 ismi articulos nomenclaturam SS. Trinitatis non  
 perti-

---

(c) Gœzen. Genauere Untersuchung pag. 45.

(d) in seiner neuesten Schrift gegen die Wolfenbüttelschen  
 Fragmente pag. 94



pertinere: Si quaestionem pure ecclesiasticam continet Ariana controversia: Si hoc fateri publice Semlero licuit: ut quid peccavit Bahrdtius animi sui sensa eadem manifestando? Scilicet contra Augustanam egit Confessionem? At enim illa erraverit pro Fundamentalibus aliquid articulo habens, de quo decisum est, non esse; numquid ergo expediebat, ut suis Protestantibus errorem hunc eximeret Bahrdtius, sicut publicis in scriptis exemtum volebat Semlerus? Rectissime proin adversarium huic suum repulit Bahrdtius in einer Erklärung an das Publikum, quae anno priore lucem adspexit: „ Herr Doktor Semler hat im Grunde eben solche „ Gesinnungen geäußert, wie aus meinem Glaubens- „ Bekenntniß hervor leuchten. „ pag. 12.

## §. XXV.

Crediderim itaque, cordatos omnes e Protestantibus una mecum tam averfari Semlerum, quam Bahrdtium. At enim id flagitarem, ut ipsi sua mihi arma ostendant, quois utrumque hunc SS. Trinitatis hostem sternant. Estne sola de se Scriptura sufficiens, quae tertiae personae divinitatem commonstret? Quid vero si oggerant hostes, quibus, cum jam Socinianis accesserint partibus, multum non est etiam se Theistis sociare, quid inquam, si oggerant: Undenam Divina vobis autoritate constat, eos, quos citatis, textus revera Divini verbi partem esse? Ecquis non jam fallibili, sed infallibili, cui refragari nefas sit, autoritate declaravit, tanta



tanta pro Deitate Spiritus S. argumenta in SS. Liberis contineri, posteaquam compertum est, Originalia Scripturarum prima jam pridem periisse? — Itaque ad codices Conciliorum & Patrum credo libros refugium sumitis? Bene vero; sed numquid vestra tunc vulnera denudatis, ad infallibiles appellando traditiones, quae tantam in catholicis nauseam vobis creant? — Fatemini jam quaeso, alia vobis arma non suppetere, nisi quae sola porrigit ecclesia Romano-catholica, a qua recessere patres vestri, quamque solam & unam regit Spiritus S. Paraclitus;

## §. XXVI.

Pro hujus itaque Magistri sui divinitate potentibus armis tam ex verbo scripto, quam tradito repetitis sola pugnat ecclesia catholica. Sternantur increduli effato Christi & Pauli, quod illa infallibiliter genuinum proponit. *Euntes docete omnes gentes, baptizantes eos in nomine Patris & Filii, & Spiritus sancti.* (e) *Charitas Dei diffusa est in cordibus nostris per Spiritum sanctum.* (f) *Obsecro per charitatem sancti Spiritus.* (g) *Charitas Dei & communicatio S. Spiritus sit cum omnibus vobis.* (h) *Fructus autem Spiritus est: charitas, gaudium, pax, patientia &c.* (i) Adeste jam germani Schismatici, qui cum Graecis S. Spiritus divinitatem arroditis, Paulus expresse distinguit Spiritum S. ab effectibus divi-

---

(e) Matth. 28. v. 19. (f) Rom. c. 5. v. 5. (g) Rom. c. 15. v. 30. (h) 1. Cor. ult. (i) Galat. c. 5. v. 22.



divinis , a charitate , a gaudio , ab aliis : ergo *πνευμα ἅγιον* hic aliud quid denotat , quam divinos effectus & gratias ; quid ergo ? Nomen ipsius Dei , inquit Bahrdtius ; igitur Deus est Spiritus sanctus ? Atqui Matth. 28. Spiritum S. a divino Patre distinguit Christus , sicut Filium ; ergo Spiritus S. vel distinctus à Patre Deus est , vel persona distincta. Sed distinctio Deitatis everteret ipsam Deitatem , uti contra Polytheos evidenter demonstratur. Ergo sic a Patre & Filio distinguitur , sicut a Patre Filius , qui unam cum Patre naturam servans sola personalitate secernitur.

## §. XXVII.

At enim id ipsum est , quod capere nec Bahrdtius , nec Semlerus sufficienter possunt ? Neque ego is sum , qui mysterium veritatis instar naturalis commonstrem ; hoc tamen adfirmaverim , caecutire duos illos Voltairii , Rousseauvii , Socinianorum , ac veterum haereticorum simios , quando a naturalibus ad divina argumentum ducentes repugnantiam obtrudunt. Deus incomprehensibilis est : ergo Deum non credo ; ecquis ita nisi Atheus concludet ? Sic etiam Deum in natura unum , & in personis trinum non capio : ergo trinum non credo ; quis nisi Theista inferet ? — Patres adpello & SS. ecclesiae lumina , viros ex omni aevo apostolicos tam in Conciliis congregatos , quam extra illa pro sancto dogmate decertantes , quorum autoritas cum latere nec Semlerum , nec Bahrdtium queat ,  
„ideo



„ ideo sciant , sufficere nobis ad nostri dogmatis  
 „ probationem , quod venientem ad nos a majoribus  
 „ traditionem habemus , velut haereditatem quan-  
 „ dam , per successionem ab Apostolis , continuata  
 „ per sequentes sanctos serie transmissam. At illi,  
 „ qui ad novitatem istam fidei dogmata convertunt ,  
 „ multis opus haberent rationum praesidiis , si vel-  
 „ lent , non pulveris instar , leves & agitabiles , sed  
 „ graves , & animo constantes homines ad suam  
 „ sententiam adducere. Quamdiu vero rudis , nec  
 „ ratione ulla perpolita , aut argumento probata pro-  
 „ dicit eorum opinio , ecquis ita fatuus , ac pecudi  
 „ similis erit , ut Evangelistarum & Apostolorum , ac  
 „ caeterorum , qui in ecclesia postea floruerunt , im-  
 „ becilliores putet esse doctrinam , quam nugacem  
 „ istam loquacitatem omnis funditus demonstratio-  
 „ nis expertem. „ Verba sunt S. Gregorii Nyss.  
 ( k ).

## §. XXVIII.

Ita est ; Bahrdtius ac Semlerus , si extremos  
 etiam Socinianorum & Theistarum centones excu-  
 tiant , nec minimum invenire argumentum pote-  
 runt , quo probent , repugnare tres in Deitate per-  
 sonas. Semper enim a Patribus repelluntur incon-  
 cussum Trinitatis dogma tuentibus , & contrarium  
 sentientes averſantibus tanquam haereticos. Certe  
 quibus temporibus exorta est opinio quaelibet , at-  
 que haeresis dogmati illi & traditioni contraria ,  
 statim

---

(k) l. 3. contr. Eunom. Tom. 2. pag. 126.



statim ei reclamatum est ab universo christiano nomine. Sic Ebioni, Artemoni, Paulo Samosateno; Arii antecessoribus, ut scribit Alexander Episcopus Alexandrinus, universa Christianorum repugnavit ecclesia. Sic Theodoto coriario, Noeto, Sabellio, Patripassianis, reliquis denique omnibus restitit, qui vel filii Divinitatem, vel Trinitatis sinceram fidem commentis labefactarent suis: quod ex Ignatio, Justino, Irenaeo, Clemente Alex. Tertulliano & antiquioribus aliis liquet, qui illorum aequales extiterunt. Provocant ad traditionem hanc Basilus, Athanasius, Hilarius alique; ex illa fidei catholicae formulas oecumenica instruunt concilia, quae in istam ATHANASII doctrinam conspirant: „Trinitas sancta & perfecta est, in Patre & „Filio & Spiritu S. Divinitatis honore dignata: „nihil habens alienum, vel extrinsecus admistum., „*Athanas. ad Serap.* Anathematis vinculo constringunt Trinitatis adversarios; & quod mireris, duo cyclopes trifurciferi recens nati, ac infausae Lutheri soboles, altissimum hoc mysterium per nomen Trinitatis vel trium personarum necessario exprimendum adtrektare audent, atque ad ecclesiasticas mere quaestiones rejicere.

## §. XXIX.

Sed enim, cum ista dissero, de impacta Semlero calumnia fors accusabor? — Qui voces praecise negat ab ecclesia introductas: rem autem ser-

vat,

---

(1) ad Serap. Tom. I. pag. 366.



vat, haereticus non est. Ita multi e Catholicis eruditi viri ipsum quoque Lutherum ab haeresi vindicant, etsi nomina *ὁμοσσιον* & Trinitas aspernetur.

(m) Porro Semlerus idem, nec plus defendit; imo admittit etiam pag. 82. in pluribus novi Testamenti locis de S. Spiritu, quasi de singulari substantia & subiecto sermonem fieri. — Ita sane! si probetur altera propositio, haud quidem in hac parte haereticum pronunciabo; at tamen longe irreverentem ac ridiculum contemptorem vocum, quas usu saltem universali consecravit ecclesia. Verum ut ipse arguit contra Bahrdtium, gravissimam perinde semper suspicionem contra se relinquit, dum sacratas illas contemnit voces. Et quo tandem pacto a Trinitatis hostibus se uterque discernet? Quomodo exprimet fidem suam erga Trinitatis mysterium? Ad hanc enimvero quaestionem Bahrdtius & Semlerus oportet cum Luthero concidant. — Patrem, Filium, Spiritum S. nominarunt etiam Ariani, Sabelliani, Sociniani; negabant vero in personis Trinitatem. Vel ergo trinitas personarum dogma fidei est: vel si mere quaestionem scholasticam dicit, homines illi omnes Christiani manebunt. Hoc sane alterum admittere Semlerus videtur undique pressus, quando ad art. Bahrd. 4. ait: „Auch sogenannte Pnevmatomachi „blieben Christen, und geriethen in keine Verach- „tung der christlichen Religion. „ Sic autem aperte

---

(m) Gener Theol. dogmat. Tom. 2. part. 1. Tract. 3. l. 1. pag. 356.





per te se gregalem Bahrdtii & Socini probat miser,  
& Ss. omni Patrum vetustati in faciem refilit.

### §. XXX.

Numquid ergo homunciones istos magis oportuit ad ecclesiam respicere definientem, quam ad opacam & obscuratam sceleribus rationem? „A-  
„, pud Moisen singularis Divinitas praecipue praedi-  
„, cata legitur, apud prophetas personarum bina-  
„, rius diligentius commendatur; Trinitas denique  
„, in Evangelio, ac nova lege demonstratur. „ In-  
quit S. EPIPHANIUS (n). Adhuc magis graphice sciolis illis obponit traditionis scutum, & auctoritatem ecclesiae Nazianzenus GREGORIUS (o):  
„, Sic enim, inquit, se res habet: Vetus testamen-  
„, tum Patrem aperte praedicabat; Filium obscu-  
„, rius. Novum autem nobis Filium perspicue o-  
„, stendit; & Spiritus Divinitatem subobscure quo-  
„, dammodo indicavit. Nunc vero Spiritus ipse  
„, nobiscum versatur; seque nobis apertius decla-  
„, rat. „ Horreant itaque nugivenduli verissimum  
illud ATHANASII pronunciatum (p) „ in Trinitate  
„, initiatio perfecta consistit. Ita qui Filium a Patre  
„, dividit, aut Spiritum ad creaturarum conditio-  
„, nem detrahit, neque Filium habet, neque Pa-  
„, trem, sed Atheus est, & infideli deterior, &  
„, quidvis potius, quam Christianus. „ Atqui  
Bahrdtius & Semlerus in ariana illa de Trinitate

D

contro-

---

(n) haeref. 74. (o) Orat. 37. (p) ad Serap. p. g.  
367.



controversia tam sibi, quam aliis in conscientia saltem licentiam dant sentiendi, quod lubet; si illos audias, poteris per Spiritum S. intelligere passim effectus Dei, dona Dei, opera Dei, & sic illum ad creaturarum conditionem detrahere; ut enim Semlerus inquit: „*πνευμα αγιον* nuspiam denotat „nomen ipsius Dei.“ pag. 83. Ergo Atheum fieri licet, infideli deteriorem, & quidvis potius, quam Christianum.

### §. XXXI.

Ad vos igitur DD. Protestantes mea se convertit oratio. Non unum, sed duos nutritis in sinu vestro homines periculosos. Si contra Bahrdtii tolerantiam inclametis; cur finitis impune Semlerum? — „Contundendae sunt insolentes adversus Deum disputationes, & destruenda rationum „fallacium munimenta, & elevata ad impietatem „ingenia conterenda, nec carnalibus armis, sed „spiritualibus, nec terrena doctrina, sed caelesti sapientia; ut quanta rerum divinarum, humanarumque discretio est, tantum ultra terrena „studia ratio caelestis excedat.“ S HILARIUS (q) — Semlerus ait art. cit. contra Bahrdtium pag. 83. „*Geslehrte, als Geslehrte müßten sich schämen, wenn sie in den Lehresätzen de Trinitate einander solche Irrthümer Schuld geben, die die eigne Geselligkeit umstießen, und umwürfen; denn so wichtig sind alle Fragen der Scholastiker, und Dogmatiker*

fer

---

(q) l. 12. de Trinit.

„fer niemalen geachtet werden. „ Compescatur cum Bahratio soli tibi ultra ecclesiam universam sapere volens tenebrio ; convincatur , non sufficere modo , si confessionem Augustanam externe fateatur duntaxat , interius vero contra illam credat simulator pessimus. Et enim quamdiu fides interna externae respondere non debeat , quamdiu liberum sit protestantibus professionum suarum formulis interne discredere ; ignoscant mihi , si politicam tantum , & neutiquam sacram , neutiquam supernaturalem , neutiquam christianam illorum religionem coram toto orbe pronunciem.

## §. XXXII.

Jam ad art. Bahrdt. 5.<sup>um</sup> pergamus , quem de Christi Divinitate ponit. „Credo , inquit . Deum „in & cum Christo fuisse , ideoque nos omnes adstringi , ut honoremus Filium , sicut Patrem. „Verum quo modo in Christo Deus fuerit , num in „ATHANASII sensu ( quem omnium vilissimum re- „puto ) num in Arii , aut Sabellii , aut cujusdam „alterius ? Id equidem ad religionis finem , puta , „ad emendationem hominum & tranquillitatem , „indifferens admodum est ; neque decidi ecclesiastica unquam autoritate deberet , sed proprio re- „linqui cujuslibet judicio. Interea tum ex ratione , „cum e Scriptura videtur mihi , ad summam usque „evidentiam posse demonstrari , quod Christus & „unus Deus Jehova , quem Patrem suum vocat , „inter se valde differant : quodve Christus in eo-



„ dem saltem sensu non vocetur Deus , in quo Je-  
 „ hova Deus dicitur ; sicuti ipse Joann. 10. fatis  
 „ clare , ac sincere de se declaravit. „

### §. XXXIII.

Sociniana ex asse professioni duo prae-  
 fertim Semlerus respondet. Primo quidem per  
 tres omnino columnas & ultra carpit denuo Bahrd-  
 tium , quod doctrinam hanc apud se non retineat ,  
 sed integrae etiam societati quasi sectandam propo-  
 nat ; cum tamen sola societas jure publico gaudeat  
 similia decidendi , declarandive. „ Gleichwie die  
 „ Gesellschaft , sunt verba Semleri , ein für allemal  
 „ alles entscheidet , was durch Zeit und Ort bestimmt  
 „ werden kann , ob die öffentliche Versammlung  
 „ zum Gottesdienst diese oder jene Umstände und  
 „ Einrichtung begreifen soll , ohne alle Tage dem  
 „ Lehrer Abänderungen zu verstatten ; ob die Kanzel  
 „ und Orgel da oder dort dort stehen soll , wenn  
 „ gleich viele einzelne Mitglieder darüber anders denken  
 „ mögen : so entscheidet sie auch die Redensarten ,  
 „ welche zum öffentlichen gemeinen Unterricht , zu  
 „ Gesängen und Gebethen gleichförmig gebraucht  
 „ werden sollen. „ pag. 87. — Dein secundo , quasi  
 defectuosam traducit Bahrdtii descriptionem. Un-  
 de sponte concedit , Christum & unicum Deum Je-  
 hova valde differre : Neque Christum in eodem sen-  
 su vocari Deum posse , in quo Deus Jehova dicitur ;  
 sive spectetur intellectus Judaeorum , sive Christia-  
 norum.



norum. pag. 89. & 90. De posterioribus fatetur,  
 eos nomen Jehova a nomine λογος seu unigenitus  
 discevisse, nemini vero ex illis incidisse, ut Deum  
 Jehova idcirco Deo λογος quantum ad naturam  
 infinitam opponeret. pag. 91. & 95: „Nemlich die  
 „weitere Entwicklung des einen höchsten Wesens  
 „wurde entweder der Unbegreiflichkeit wegen, gar  
 „nicht versucht; oder von den Lesern des neuen Te-  
 „staments eben aus den Beschreibungen, mein Va-  
 „ter, der Vater, der eingeborne, der einzige  
 „höchste Sohn, der erstgeborne, durch den alles  
 „geschaffen ist, nach ihren guten Gewissen zusam-  
 „gesetzt, welche sich auch in der unsichtbaren geist-  
 „lichen Welt einen Zusammenhang Gottes dachten,  
 „wozu sie allerley Schriftstellen erbaulich anwende-  
 „ten. „ pag. 91.

### §. XXXIV.

Atque haec fere sit Semleriana Bahrdtii con-  
 futatio. Clariora tantum citavi verba, ne lectori-  
 bus stomachum moveam, si integram dictionem  
 obscuritatibus ac tenebris maxime implexam com-  
 memorare voluerim. — Et sane multum adversus  
 Bahrdtium Semlerus obtinet, dum ad integram  
 societatem pertinere jus aliquod decidendi adfir-  
 mat, quale Paterfamilias quilibet ad suam domum  
 ordinandam habet. Eamdem quam in determinan-  
 dis his aut illis circumstantiis ad externum religio-  
 nis cultum & disciplinam adtinentibus: quam item  
 in materiali quadam cathedra, vel organo sic aut



sic ponendis potestatem habet Societas; eandem etiam in dogmatibus obtinet praescribendis. Quamquam quia dico: in dogmatibus? nur in Redensarten, welche zum wesentlich gemeinen Unterricht gebraucht werden. Misera societas, cui ista solum, nec major potestas competit, quam ridiculam facis in mundo figuram, cui membra individua saltem interne reclamare possunt: Stulta est ordinatio tua? sed adhuc Semlerus miserior, qui ad loquendi modos praecise refert usum sanctarum illarum vocum, quae ex traditione ecclesiae totius mysterium Trinitatis, Christique Divinitatis exprimunt. — Hercule! non est hoc accusare Bahrdtium, sed excusare.

### §. XXXV.

Uterius dum alterum hujus ipsius principium ratum habet de omnimoda Jehovahae, seu unius Dei & Christi differentia: Dumque eandem esse Lutheranae. Calvinisticae, & Catholicae ecclesiae mentem adserit Semlerus, aut fallit, aut fallitur. Equidem Christum & unum Deum Jehova, quem Patrem suum adpellat, perquam diversum quid esse, facile omnes concedimus. Christus enim principium stabile completum actionum Theandricarum est, ope illius humanitatis ut instrumenti edendarum, quam ceu comprincipium instrumentale persona Christi composita importat: Deus Je hova se solo non est tale principium completum, sine humana natura. At enim in eo Semlerus cum Bahrdt-  
tio

tio errat sane gravissime, & contra omnem ecclesiarum sententiam; cum mox continue & illud concedit, Christum non in eodem sensu Deum appellari, in quo idem Deus unus seu Jehova appellatur. An enim non liquido huic haeresi reclamatur Paulus (r): *Deus Jehova erat in Christo mundum reconcilians sibi, non reputans illis delicta ipsorum?* Utique ut comprincipium stabile omnium actionum Christi? Ac proinde ipse erat Christus. & Christus est Deus Jehova. Hoc non alio sensu dicitur (s): *Verbum caro factum est*, id est, Verbum factum est principium personale humanarum actionum: & *Deus erat Verbum*.

## §. XXXVI.

Quam igitur proterve toti antiquitati Semlerus non imponit? Et enim num Jehova idem, quod Iater: λογος idem quod filius indicat? ex ipsamet confessione adversarii Jehova denotat unum Deum, & λογος unigenitum, rationem, verbum. Jam autem, quod filium a Patre, qui Jehova dicitur, discreverint ecclesiae catholicae Patres & Concilia, verissimum est; distinxisse vero λογος seu unigenitum, rationem, verbum ab uno Deo seu Jehova, id basilice falsum, & execrandum mendacium est. — Notissima est Arianorum historia; Deum esse Christum illi simpliciter fatebantur: idque in omnibus fidei formulis exprimebant, sed ea

D 4

mente,

---

(r) II. Cor. c. 5. v. 19.



mente, ut unum esse dicerent summum Deum, quem *τον επι παντων Θεον* vocabant; unde libenter ac saepe unum esse Deum, Jehovah, iactitabant, ut refert Saebadius Aginensis. Adversum has igitur perniciosas religioni vulpes universa surrexit ecclesia, non agnoscens modo, sed definiens quoque Christum unigenitum verum pariter & unicum Deum esse. Vix opus est aliorum, nisi ad vetustissimum Nicaeni Concilii confugere symbolum. Ibi vocatur Christus Deus de Deo, lumen de lumine, Deus verus de Deo vero, consubstantialis Patri; quam adpellationem dignissimam in hoc usque tempus S. Mater ecclesia intemerate semper custodit & servat. Sed neque illud latere quempiam potest, a Nicaeni temporibus universam semper ecclesiam Athanasii sensum adoptasse, qui certe talis est, ut Christum verum Deum, aeternum Deum, unicum Deum, constanter adserat, atque traditionem totius ecclesiae veteris jam ipse adpellet (t) : „ Ecce nos ait, demonstramus ejusmodi sententiam a Patribus ad Patres, quali per manus traditam esse. Vos autem novi Judaei & discipuli „ Caiphae ! quos verborum vestrorum Patres ac „ majores demonstrabitis ; cum ne unum quidem „ ex prudentioribus & doctis auctorem citare possitis ? „ Quid ultra ? SS. Patres omnino omnes Dei Filium adseverant fuisse etiam Israelis Deum, legis antiquae Deum, atqui Deus antiquae legis  
certe

---

et L. seu Epist. de decret. Nic.





certe Jehova dicitur. „ Dei Filius inquit cum „ Justino (u) Deus Dominus, verbum, Dominus „ virtutum, & Deus Israelis vocatur. „ — Rursum contra Arianos ita semper arguebant: *λογος* seu verbum Deus est; ergo Deus verus est; si verus; ergo unicus: ergo Deus Jehova. Vide Hilarium (w) Athanasium (x) Ambros. (y) August. (z) Cyrill. (a) — Licet vero Patres *τον επι παντωθεον* solum non nunquam adpellaverint Patrem, tamen & *λογω*, filio, verbo nomen idem toties adtribuerunt, quoties contra Arianos decertarunt; in priori sensu nomenclatura illa erat notio personalis, & exprimebat totius naturae & essentiae fontem, originem ac principium: In posteriori sensu erat notio Divinitatis, ac denotabat Deum summum & increatum.

## §. XXXVII.

Non ergo obstat notio personalis, quo minus Christus in eodem sensu vocari Jehova possit, quo Pater coelestis; quandoquidem Jehovae nomen non est personae nomen, sed naturae, totusque Christus in una persona Deitatis subsistit per hypostaticam

D 5

cam

---

(u) Dial. cum Tryph.

(w) L. 7. de Trinit.

(x) Orat. 1. 4. & 5. contra Arian.

(y) L. 1. de Fide c. 7.

(z) L. 1. de Trinit. c. 7.

(a) L. Thesauri c. 32.



cam unionem. Heinc recte utique, sed minus consequenter, Semlerus ait, incidere Christianorum nemini, ut nomen Jehovah nomini λογος opponat quantum ad essentiam infinitam. At enim secundum obscuri hujus auctoris principia saltem forte opponitur. „ Die Bestimmung der „ Person oder notio personalis ist nur von Gelehrten „ zum Widerspruch gegen andere Gelehrten, und „ zum Unterschied der äusserlichen Gesellschaft auf- „ gebracht worden. „ pag. 90. Igitur saltem absolute potest esse, non dari personas in Deitate distinctas? Ergo saltem potest esse, Christum non esse Deum: vel dici potest, Patrem esse incarnatum? — Has sequelas si non apud se cognoverit Semlerus, aliqua adhuc venia tanquam imbecillis homuncio dignus est. Quodsi persenserit, ab Arianismo vel Socinianismo liber non est. Certe si mancarn Bahrdtio imputet professionem, quid de professione ipsius valde implexa censendum? Ait enim sub finem art. 5. pag. 95. „ Wir glauben, „ daß Eingeborne, Erstgeborne vor aller Creatur, „ einer, der im Schooße des Vaters ist, zu Gott „ und zur Ewigkeit gehöre. „ Quaeso te, numquid hoc idem Arianus quilibet & Socinianus dicit? Scilicet audacter affirmem, injuriam Semlero nullam fieri, quando in castris Socinianorum hominum Crellii, Schlichtingii, & aliorum stipendia meruisse dicitur. Satis est manifestandae Arianæ ipsius menti vel sola in Joannem paraphrasis, ubi  
erra-



errata sua explicatius proponit, dum ad ea verba Evangelistae: *Et Deus erat Verbum*; scribit: „Sed „ non ille Deus, *προσόν ἦν*, apud quem erat. „ pag. 5. Et rursus: „ Certum est, Joannem de- „ scribere istis tam augustis nominibus *λογος*, „ *θεος*, *μονογενης*, & similibus Phrasibus non „ hominem: Humana tantum natura praeditum; „ sed Deum, licet non *τον θεον*, id est, spiritua- „ lem, summam substantiam. „ Similia repetit contra Bahrtdium in ejus refutatione pag. 10. „ *Logus, der eingebohrne Sohn, ist auch Gott,* „ *wenn gleich nicht ὁ θεος.* „ — Quaeso nunc amice Lector! quid mecum de Semlero statues? Verbum non est Dens, non est spiritualis substantia; quid ergo? & tamen Deus? numquid Deus quispiam minor, Gentilium more? En Polytheum, Arianum, aut Socinianum! Schlichtingius apud Petavium 1, 16. de incarn. c. 4. n. 4. Hoc idem Semlerum docuerit; observat & ille, Verbum ita nominari Deum, ut in graeco non sit *ὁ θεος* cum articulo; sed simpliciter *θεος*: ut indicaret Evangelista, non ejusdem conditionis esse Divinitatem illam, quae Patri tribuitur, cum apud Deum fuisse Verbum dicitur. Quippe summus ibi Deus intelligitur, a quo quem erat Verbum. — Numquid ergo possumus Semlero Bahrtdium carpenti oggerere: e Socinianorum hominum, non autem ex horto est flosculus ille tuo? & hinc: Ohe, quam niger es, dicebat cacabus ollae?

§. XXXVIII.



### §. XXXVIII.

Ad hunc tandem labyrinthum illi deveniunt, qui relicto infallibilis ecclesiae judicio privatum suae rationis nimium obtenebratae ductum sequuntur. Quaeso te Semlere vir bone ! si tamen vir bonus es ; ni velis Bahrdtio Socinianismi aperte convicto adfentiri, utere terminis, explicatione utere ecclesiae. Confitere ut fide divina certum, tres dari in Deo personas, unam in Christo. Unam vicissim in Deo naturam, duas in Christo. Sic sancta definivêre Concilia : sic contra Divinitatis & Incarnationis hostes perpetuo tenuit ecclesia : sic capies, distinctum quid a Jehova Christum esse, quamvis & ipse adpellari Jehova debeat : sic senties, a Patre distingui Filium, *λογον* & verbum, quin Filius, *λογος* & verbum a Jehova distinguatur, id est, a summo & unico Deo. Atque ita unus Deus, Jehova, in ecclesia praedicatur, qui est super omnia, & in omnibus ; super omnia, *επι παντων*, quidem ut Pater, ut principium & fons ; Jehova ! per omnia vero *δια παντων*, per verbum ; Jehova ! in omnibus autem *εν πασι* in Spiritu sancto ; Jehova !

### §. XXXIX.

Hoc itaque sanctum dogma sanguine obsignare paratus sit Christianus : etsi Christus duplicem naturam habens divinam & humanam, sit aliquid, quod non est Pater ; tamen est idem Deus, qui est Pater, proindeque Jehova dici non modo potest, sed



sed debet etiam, sicut Pater. Est magnus Deus, sicut Pater : *Exspectantes beatam spem & adventum gloriae magni Dei, & Salvatoris Jesu Christi, qui dedit semetipsum pro nobis* (b). Est Dominus gloriae sicut Pater : *Si enim cognovissent, nunquam Dominum crucifixissent gloriae* (c). Quo in loco vis est cogitanda vocabuli gloriae, δόξῃς, quam hebraei Majestatem nominant, & pro Deo ipso summo usurpant. Est fabricator & creator sicut Pater: *Amplioris enim gloriae prae Moise dignus est habitus, quanto ampliore honorem habet domus, qui fabricavit eam. Omnis namque domus fabricatur ab aliquo, qui autem omnia creavit, Deus est* (d). Est denique Dominus, sicut Pater. *Nobis tamen unus Deus Pater, ex quo omnia & nos in illum; & unus Dominus Jesus Christus, per quem omnia & nos per ipsum* (e). Hoc loco contra Arianos frequenter utuntur Patres, at maxime CHRYSOSTOMUS, qui vocabulum Domini nihilo inferiorius esse ostendit, quam Dei, idque saepius in Scripturis usurpari de summa illa majestate, Jehova. Sed & alia suppetunt Scripturae loca, ex quibus id ipsum evincitur. Paulus inquit: *Omnis, qui credit in illum, non confundetur, non enim est distinctio Judaei & Graeci; nam idem Dominus omnium dives in omnes, qui invocant illum: omnis enim, quicumque invocaverit nomen Domini* (hebraice *beschem Jehova*) *salvus erit.* (f) Non potest haec iterata adpellatio Domini τὸ Jehova ad alium quam

---

(b) Tit. 2. v. 13. (c) 1. Cor. 2. v. 8. (d) Hebr. c. 3.  
(e) 1. Cor. 8. (f) Rom. 10. 11.



quam ad Christum referri, ut liquet ex his, quae praecedunt v. g. *quia si confitearis in ore tuo D. J. & in corde tuo credideris* (g). Jesus Christus igitur est summus ille & aeternus Deus Jehova. — Et alio in loco: *Omnes stabimus ante tribunal Christi; scriptum est enim Is. 44. 23. dicit Dominus: quoniam mihi flectetur omne genu, & omnis lingua confitebitur Deo: itaque unusquisque nostrum pro se rationem reddet Deo* (h). Vox hebraica apud Isaiam l. c. iterum est Jehova nomen Dei summi & aeterni, quod Apostolus citra controversiam Christo Domino tribuit, cui omnis lingua confitebitur, quem laudabit, atque Deum agnoscet. Stulte igitur, & imprudenter impius Apollata Julianus apud Cyrillum mentitur, praeter Joannem Evangelistam, neque Paulum, neque caeteros Jesum Christum nominare Deum. Quod quam falsum sit, & Cyrillus pluribus ibidem explicat (i), & quae adtulimus loca, demonstrant.

## §. XL.

Sileat ergo in aeternum Bahrdtius; desinat dubitare, num in Athanasii, num in Arii, Sabellii, aut aliorum haereticorum sensu Deus in Christo sit? Pudore suffundatur ad fidem Thomae: *Dicit ei: Dominus meus & Deus meus*. Pavescat ad Joannis primum caput. quo omnis, quae contra Trinitatem, Christique Deitatem utcumque pugnat,

pro-

---

(g) ibid. v. 10. (h) Rom. 14. 10.

(i) l. 10. contra Julian.



profligata jam pridem est haeresis; ideoque & blasphemata Bahrdtii lingua confossa, politicumque Semleri os contusum. Audiatur AMBROSIVS (1): „Erat apud Deum. Erat, erat, erat, erat, ecce „quatuor erat. Ubi impius invenit, quod non e- „rat? Alibi quoque Joannes in epistola sua dicit: „Quod erat in principio. Indefinite tenditur: Erat. „Quidquid excogitaveris, erat Filius. Omnes „autem haereses hoc capite brevi noster piscator „exclufit. Quod enim erat in principio, non ex- „cluditur tempore, non principio praevenitur. „Ergo Arius conticescat. Quod autem erat apud „Deum, non commiftione confunditur; sed ma- „nentis verbi apud Patrem solida perfectione distin- „guitur, ut Sabellius obmutescat. Et Deus erat „verbum, Non ergo in prolatione sermonis hoc „verbum est; sed in illa caelestis designatione vir- „tutis, ut confutetur Photinus. Quod vero erat „in principio apud Deum, sempiternae Divinita- „tis in Patre & Filio inseparabilis unitas edocetur, „ut erubescat Eudoxius & Eunomius. Postremo „cum omnia per ipsum facta dicantur, ipse condi- „tor novi utique testamenti, & veteris designatur, „ut Manichaeus locum tentationis habere non possit. „Ita piscator bonus intra unum omnes rete con- „clufit, ut faceret inhabiles fraudi, quamquam „essent inutiles captioni. „ — — Etenim S. Jo-  
annes Bahrdtium quoque & Semlerum fecit inha-  
biles

---

(1) I. I. de fide ad Gracian. c. 5.



biles fraudi ; Bahrdtium , qui Ario , Sabellio & Photino manus dat : Semlerum vero qui tam procaciter scribit ; „ Unsere Lehre von der Gottheit Christi und des Heil. Geistes ist keineswegs der „ Sinn des Athanasius , oder des 4<sup>ten</sup> und 5<sup>ten</sup> „ Jahrhunderts ; und gehört überhaupts nicht in „ den gemeinen Unterricht ; ganz und gar nicht. „ pag. 27. — — „ Die Bestimmung der Personen „ eines und desselben Wesens hat niemand zum „ Grund und Inhalt der christl. Lehre und Wohl- „ fahrt gerechnet. pag. 28. — — „ Ein für seine „ Gesellschaft treuer und rechtschaffener Lehrer behält „ die Sache, den Begriff, und schenkt die Worte, „ Person , Dreyeinig , und Dreyfaltigkeit , So- „ mousios , Erbsünde. „ pag. 29.

## §. XLI.

Porro quid de gratia Dei, satisfactione & meritis Christi, ac demum necessaria in Eundem fide censeat Bahrdtius, videamus. Sic ergo loquitur in art. 2. „ Credo, hominem ut cetera bona omnia, quae habet, ita & omne bonum morale, „ quod in ipso est, gratiae Dei in acceptis referre „ debere. Quod vero Deus hominum emendationem ipse efficiat ; neque aliud quid praestet homini, nisi ut passive erga Deum se habeat, contrarium est Scripturae, errorque iste maximam „ partem dependet a gratiae notione, quam plerique D.D. ecclesiae sinistre hactenus acceperunt. „ Ita Bahrdtius. — Ubi quidem prima pars, quam adfir-





affirmat, catholica est: pars tamen altera satis obscura explicatione indiget ulteriori. Vel itaque *disjunctive* asserere cogitat, neque Deum ipsum emendationem hominis operari, neque hunc mere se passive habere? Et in hoc sensu haeretica est illius propositio, ac immediate in faciem contradicit S. Paulo (m): *Deus est, qui operatur in vobis velle & perficere pro bona voluntate.* Vel *copulative* sumpsit, ita ut indicare voluerit, Deum non sic operari emendationem hominis, ut hic mere passive se habeat? Atqui hoc juxta sentimus cum Bahrdtio omnes Catholici, qui libertatem hominis & cooperationem simul cum gratia Dei consistere adversus Lutherum & Calvinum constanter defendimus.

## §. XLII.

Equidem de Semlero unicam hic facere mentionem juvat. Ille simpliciter & seorsim negare voluisse Bahrdtium innuit, Deum hominis emendationem non efficere. At enim si Bahrdtius copulative tantum suam sumpsisset propositionem? Quid si denotare solum voluisset, non sic in nobis operari gratiam, ut mere nos passive ad illam habeamus? Audi Semlerum pag. 73. „Wir haben keine solche „Gratiam angenommen, die der freyen vernünftigen „Natur des Menschen nicht angemessen sey.“ Idem quam plurimi suis in scriptis cum Semlero adfirmant Doctores evangelici hodierni, inter quos

E

ma-

---

(m) Philippenf. c. 2. v. 13.



maxime Tellerus : „ Die Wirkſamkeit der göttli-  
 „ chen Gnade hebt demnach keinesweges die Wirk-  
 „ ſamkeit des freyen Willens auf , ſondern ſie erhöht  
 „ die Kraft deſſelben zur Wahl des Guten ; ſie er-  
 „ ſetzt zuerſt das , was deſſelben an zureichenden  
 „ Vermögen zur Wahl , und zum Wollen des Guten  
 „ fehlt , und überläßt es ſodann dem Menſchen , ob  
 „ er fernern Gebrauch von den Heilmitteln , durch  
 „ welche ſie ſein Beſtes ordentlicher Weiſe bewirkt ,  
 „ und die ſie durch ihre Mitwirkung bekräftiget , ma-  
 „ chen will , oder nicht. „ (n) — Optime ! ca-  
 tholice ! at non lutherice ; ſcimus enim , ut aliter  
 longe Lutherus & Calvinus gratiae & libertatis ſy-  
 ſtema conceperint. Juxta ipſos humana voluntas  
 in medio poſita eſt , ceu jumentum : ſi infederit  
 Satan , vult & vadit , quo vult Satan : ſi infede-  
 rit Deus , vult & vadit , quo vult Deus. Lutherus  
 & Calvinus humanam libertatem directe e medio  
 ſuſtulerunt , ac hominem actuum ſuorum ne inſtru-  
 mentalem quidem liberam eſſe cauſam defenderunt.  
 Contra faciunt eruditi e Protestantibus hodierni.  
 — — Adplaudo eccleſiae meae Romano - catho-  
 licae , cui demum in hoc dogmate adcedunt D. D.  
 Proteſtantes , abſurditatem doctrinae Lutheri ſcho-  
 liarchae ſui hac in parte confeſſi ; & quamvis pag.  
 73. Semlerus velit , „ Es ſey in dem ſogenannten  
 „ Pelagianismus ſehr viel Wortſtreitt ; „ eccleſiae  
 meae tamen plaudo , quam vel nolentes adverſarii  
 Magi-

---

(n) 2. Wahres berichtigtes Glaubens Bekenntniß pag. 33.



Magistram veritatis contra Lutheri & Calvini falsitatem ipso facto agnoscunt.

### §. XLIII.

Similem accinam eidem ecclesiae gloriam, ubi art. Bahrdtii tertium, & Semleri responsionem consideravero. Pergit itaque ille: „Credo, Deum „ex mera nobis gratia condonare peccata, non „stramque virtutem, & in bono fervorem, qui o- „rigine sua ipse beneficium Dei, etsi tam multis „defectibus maculatus, dici debet, aeternae mer- „cedis & salutis dignum haud esse; item & vir- „tutem nostram ac emendationem ex una parte „conditionem existere, sub qua Deus nobis remis- „sionem peccatorum, aeternamque salutem intui- „tu Christi, divinaeque promissionis largiatur: ex „altera tamen parte eandem virtutem esse fontem „summae felicitatis naturalem. Quod autem Deus „humani gratia sacrificii mea mihi peccata remit- „tat, ac ob alienam praecise virtutem meae vir- „tutis maculas ignoscat, istud cum mea pugnat „ratione, nec in Scripturis quidpiam de eo repe- „rii. „ Ita Bahrdtius art. 3. — Porro quatuor potissimum sunt, quae hic profitetur auctor. 1<sup>mo</sup> Virtutem & fervorem nostrum beneficium Dei origine tenus quidem, aeternae tamen salutis ac mercedis dignum haud esse. 2<sup>do</sup>, esse nihilominus conditionem, sub qua Deus remissionem peccatorum ac salutem illam largiatur intuitu Christi, divinaeque promissionis. 3<sup>tio</sup>, eandem virtutem



nostram existere fontem summae felicitatis naturalem. 4<sup>to</sup>, pugnare tamen cum ratione, neque de eo in Scripturis quidpiam reperiri, quod Deus humani gratia sacrificii & ob alienam praecise virtutem hominibus ignoscat.

## §. XLIV.

Responsiones, quas ad haec Semlerus dedit a pag. 74. partim bonae sunt. partim malae. Bonas ex ecclesiae catholicae scrinio mutuavit; malas ab infideli vel sceptico sumpsit cerebro. Itaque 1<sup>mo</sup> concedit lubens, virtutem nostram summae felicitatis fontem esse naturalem; An item noster in emendationem internam consensus, conditio beatitudinis dici debeat? veterem esse controversiam. 2<sup>do</sup> Dicit: An intuitu Christi nobis conferri salutem, idem significet, quod intuitu divinae promissionis per Christum factae? An vero idem, quod intuitu divinae promissionis propter opera Christi praevisa factae? Rursum non decidet Bahrdtius. — — Primum tueri vult ipse; — alterum tenemus juxta omnes trium ecclesiarum Catholici. — Eccur igitur hanc nostram doctrinam praeclaram adeo cum alia commutemus longe minori, quam in Scripturis tam bene fundatam non reperimus? — — 3<sup>to</sup> Ablegat Bahrdtium ad epistolam Pauli ad Hebraeos, ut inde discat excelsi pretium sacrificii, quod Christus obtulit se ipsum Deo in cruce tradens, suoque sanguine foedus novum spirituali, perfectoque modo eri-



erigens. In eadem epistola vigor praecipuus, & summa totius haec est: externa, communia, & visibilia sacrificia non operantur in conscientias hominum; sed externam mere habitudinem societatis continent. Christus vero in maximo, perfectissimoque sensu sacerdos est, qui unicum Deo per se ipsum adtulit sacrificium. Proprie tamen Christus neque sacerdos est, neque sacrificium; sed Deus reconciliavit homines secum ipso, eamque voluntatem suam per Christum libere passum, & quia ipse voluit, oblatum publice promulgavit. Non ergo sacrificium, ex altissimo, quem Deus praescripsit, sine a Christo praestitum dici mere humanum potest; quam maxime spirituale hoc fuit, talesque effectus protulit, quales nec per omnia quidem sacrificia corporalia proferri possunt. Non itaque humanum illud vocari debet. — Ita sere Semlerus non tam quoad verba, quam quoad sensum. Nolui enim integram ejus responsionem transcribere, quae in eo maxime versatur, ut probet Bahrdtium non debuisse sensa sua aliis obtrudere Christianis; eosque perinde ad infidelitatem non deduci, quod divinum credant fuisse Christi sacrificium.

## §. XLV.

Ubi vides cum primis amice Lector, ut de novo veritatem doctrinae de bonis operibus ad salutem necessariis ab Ecclesia Romano-Catholica constanter assertam, a Tridentino noviter definitam, & a turbulentis duntaxat hominibus Luthe-



ro, Calvino, Chemnitio aliisque id fursuris inficiatam reassumant D. D. Protestantes hodierni, nihilque amplius commune sibi esse velint cum erroribus antecessorum suorum, quos illi de fide sola justificante tradiderunt. Accusat Bahrdtius Evangelicorum omnem ecclesiam de dogmate pugnante revera cum omni sana ratione; quod videlicet justificationis hominis fiat unice per imputationem alienae justitiae & virtutis sine propria cordis conversione, & emendatione: Ideoque se profiteri dicit, virtutem nostram, quae & ipsa purum Dei beneficium sit, originem esse summae felicitatis nostrae, & justificationis conditionem. §. XLIII. Atqui hac in parte Bahrdtio Semlerus restitit, coram omni Evangelica Ecclesia palam protestatus; injuriam fieri ecclesiae suae talium dogmatum afflictione. §. XLIV. Et vero; confitentur hodie satis publice & communiter doctissimi quique Lutherani, fidem requiri, non solum, quae sit assensus de veritate doctrinae Christi, & importet certam fiduciam de implendis grandibus promissis nobis ab ipso factis, & ipsius morte firmatis: sed quae per caritatem operetur. Haec in Scriptis illorum publicis contradicente nemine ex Evangelica ecclesia leguntur. Admittunt itaque revera passim Protestantium Doctores ultro etiam illud, quod vult Bahrdtius, quodque volumus omnes Catholici, bona opera & observantiam mandatorum Dei, certissimam esse conditionem (etsi hoc praecise vocabulum



bulum horreant) sine qua vita beata nulli adulto Christiano ob solam fidem ac fiduciam obtingat. ; Virtutem nostram esse fontem beatitudinis naturalem, ideoque a Deo nobis injectam praeceptamque, notissimum pridem est; „ inquit Semlerus. pag. 75.

## §. XLVI.

Prodit se mirum quantum infirmitas Protestantium. De necessitate bonorum operum de facto plerique conveniunt cum Catholicis; & tamen hoc dogma verbis scripturae, Confessioni Augustanae, & Lutheri scriptis capitaliter repugnare pridem plenis buccis clamitarunt. Notissima est, quam hac super re cum Georgio Majore habebant, altercatio; notissima colloquii Altenburgensis expressio, cujus hic verba referam, prout inveni in Tanneri Anatom. Confess. Aug. p. 3. tit. 3. pag. 70. „ Plurimae ecclesiae passim in Germania „ annos jam complures ista dogmata D. Majoris cum „ privatim, tum publicis scriptis arguerunt; reje- „ cerunt, damnarunt, ut Saxonicae ecclesiae in „ judicio adversus Interim, & postea in alio peculiari scripto, cujus titulus est: Sententia ministrorum Christi in ecclesia Lubecensi, Hamburgensi, Luneburgensi, & Magdeburgensi, de corruptelis doctrinae justificationis, quibus Georgius Major adserit, bona opera esse ad salutem necessaria &c. anno 1553. Item in Synodo Luneburgensi anno Domini 1561. cujus verba in articulo de Ministris ita sonant: „ Können also demnach



„ Majoris propositionem und Lehre , als eine grens-  
 „ che Verfälschung wider Gottes Wort , und die  
 „ Augsburgische Confession , auch keineswegs billi-  
 „ gen , dusden , noch leiden. „ — — — Et infra :  
 „ Non habent D. Major , aut ejus infelices Patroni.  
 „ unicum unius ecclesiae purae censuram , in qua  
 „ ista Pontificia D. Majoris , & paucorum aliorum  
 „ dogmata haftenus publice adprobata fuissent : „  
 — Haftenus Saxonici Theologi ; qui clare testan-  
 tur , quasi totius , ut ita dicam , Lutheranismi do-  
 ctrinam suo tempore fuisse , bona opera non esse ad  
 salutem necessaria. Et nunc derepente eandem  
 ipsam doctrinam ambabus complectuntur manibus  
 Protestantes , quam D. Major defendit. Mei Do-  
 mini ! quis docuit vos ? nimirum ecclesia Romano-  
 Catholica , quae Lutheri jam tempore in talis pos-  
 sessione doctrinae fuit.

## §. XLVII.

Eja itaque , circa priora tria puncta §. XLIII.  
 indicata quaeso vos D. D. Protestantes , vocabula-  
 riam semovete litem , & cum Catholicis in hac  
 parte quam exactissime convenietis. Bona opera  
 nostra & virtutes adjutae meritis Christi , superna-  
 turalique ejus gratia vere ac proprie merentur ae-  
 ternam beatitudinem , suntque ad eam acquirendam  
 omnino necessariae. Rursum ; bona opera , a justo  
 secundum exemplum Dei hominis sincerissimo in  
 Deum amore non sine grandi sui ipsius victoria &  
 pravorum affectuum sacrificio exantlata , Deo ob  
 simi-





similitudinem suam cum divinis perfectionibus, & exemplum Dei-hominis ita placent, ut moveant illius infinite promptam ad remunerandum largitatem, ut justo perseveranti ad usque vitae finem in talium operum exercitio, vitam aeternam pro praemio retribuat. Haec, inquam, duo nobis principia concedite, & sentietis catholice; neque vobis quispiam litem ullam intentabit de eo, num merita nostra conditio vocari debeant, num de condigno vel de congruo salutem aeternam mereantur. Atque ista duo principia si inficiari Bahrdtius non cogitavit; si solum voluit 1<sup>mo</sup> opera nostra & virtutem non habere salutis aeternae meritum ex se *condignum*; 2<sup>do</sup>, illa tamen esse meritum verum & conditionem necessariam, sub qua beatitudo promissa est: 3<sup>tio</sup> denique, illa esse fontem summae felicitatis naturalem, consequenter ad hoc, quod a supernaturalis gratiae auxilio procedant; tunc, inquam, Bahrdtius in hac parte non sensit haeretice, sed reliquis addedit Lutheranis doctioribus in doctrina de satisfactione & meritis Ecclesiae Romano-Catholicae collum submittentibus.

## §. XLVIII.

At enim ultimis maxime verbis omne, quod antea confessus est, subvertit, & Socinianum de novo virus prodit. Cum ratione pugnare, nec in Ss. Literis reperiri adferit protervus Novator, quod Deus humani gratia sacrificii & ob alienam praecise virtutem hominum peccata remittat, maculas-



que adhaerentes nostris operibus tergat. Pelagianum hoc est, Arianum, Socinianum, & nescio quid amplius vocem. — Scilicet defectuosa haec de sacrificio crucis locutio tristis, at necessaria sequela est illorum, quae Bahrdtius cum Ario, Socino, Serveto aliisque aeterno silentio sepeliendis docet de divinitate Christi. §. 32. Si enim Christus in Athanasii & Ecclesiae sensu Deus non est, sed tantum in sensu illorum Haereticorum, quos ut abortivos foetus repudiavit omnis retro sancta & a S. Spiritu illustrata antiquitas; tunc enimvero actum est de divino crucis sacrificio; sique Christus ut purus homo blaspheme consideretur, utique capi non potest, quomodo nos omnes per alienam unius hominis virtutem salvemur. At enim qui vel solum Paulum ad Hebraeos tum de vera Christi Divinitate, cum de divino crucis sacrificio differentem audit, ille stupeat necesse est ad effraenem Bahrdtii & Socinianorum audaciam. Ille Jesus, cui dictum est: *Thronus tuus Deus in seculum seculi*. Et: *Tu in principio Domine terram fundasti, & opera manuum tuarum sunt coeli*: Ille Jesus, de quo dicitur: *Adorent eum omnes Angeli Dei*; item: *Sede a dextris meis*. (o) Ille Jesus, cui dictum est: *Juravit Dominus & non poenitebit eum*: *Tu es Sacerdos in aeternum* (p) ille inquam *Jesus propter passionem mortis gloria & honore coronatus est*: Ut gratia

---

(o) Hebr. c. 1.

(p) ibid. c. 7.



*gratia Dei pro omnibus gustaret mortem* (q) ille factus est in cruce *Pontifex magnus, qui penetravit coelos, Jesus filius Dei.* (r) Conticescat itaque Judaica omnis, Sociniana & Bahrtdiana perfidia! Jesus Christus filius Dei, verus Deus Jehova seipsum in cruce obtulit: Divinum ergo non tantum ex fine passionis, sed etiam ex ipso Christo patiente, fuit crucis sacrificium. Etiam si enim Deus passus dici non possit cum Theopaschitis: ille tamen crucifixus & mortuus est, ille immolatus, qui vere consubstantialis Patri Deus & homo nobis per omnia similis absque peccato fuit.

## §. XLIX.

Ita sane si ratiocinatus fuisset Semlerus, si ex Divinitate Christi Athanasiano sensu per ecclesiam constanter adserta ad Divinum pariter sacrificium conclusisset; se quidem invidia, nos vero labore liberasset. At enim cum illius responsio, quam hac super re dedit Bahrdtio, meris constet verborum satis obscurorum involucris: Cumque parum aut nihil hic a suo differat adversario; Masttygen profecto similem promeretur. — Equidem Paulinam ad Hebraeos adpellat Epistolam; & in hoc bene facit, recedens a Luthero, Chemnitio, Centuriatoribus Magdeburgicis, aliisque suis in Lutheranismum praecursoribus, qui uno ore Epistolam illam e Canone rejecerunt. Sed vero quam falso  
ex-

---

(q) *ibid.* c. 2.

(r) *ibid.* c. 4.



explicat mentem Pauli ? Si Semlerum audis, Christus in maximo perfectissimoque sensu Sacerdos fuit, qui per se ipsum Deo adtulit sacrificium ; Catholice ! sincere ! Verum latet anguis in herba ; improprie tantum Christus & Sacerdos dici potest & sacrificium, cum Deus reconciliaverit homines secum ipso , Christus autem libere passus declarator tantum ejus divinae voluntatis fuerit ; § 44. Quasi vero idem non aequè per alium virum sanctum & purum hominem praestari potuerit ? Eja quid dices , si S. Petrum destinasset Deus ad id officii , si adnexuisset morti illius reconciliationem hominum , si efficaci illum gratia praevenisset , ut libere prorsus se traderet , essetne divinum illud Petri sacrificium ? Neque ergo ex sola illa Christi oblatione , non ex solo fine , quem Christus habuit , non ex erectione novi foederis , quod in cruce tantum promulgavit , concludi ad divinum Christi sacrificium potest. — Verus Sacerdos , verumque sacrificium dici Christus debet , vere sanguinem suum fudit , vere se tradidit pro salute nostra Deus-homo. Haec genuina , haec ultimata ratio , quae divinum esse crucis sacrificium evincit — Detrahe quaelo larvam Semlere ! fatere contra Bahrdtium simpliciter divinum crucis sacrificium ; non sufficit adferuisse tantum . illud fuisse quam maxime spirituale , talesque protulisse effectus , qui ne per omnia quidem corporalia sacrificia produci possunt ; non sufficit admisisse humano illud sacrificio fuisse praestan-



stantius ; expressiones ejusmodi malitiose testam  
produunt mentem , nisi absolute dicas verum Dei-  
Hominiis sacrificium in se ipso per etum. Mirum  
sane ! quod in tota sua ad Bahrdtianum hunc arti-  
culum responsione ne semel quidem sacrificium cru-  
cis divinum nominet Semlerus , sed id tantum  
probare velit , non oportere mere humanum dici.  
Vulpina fraus haec esse videtur , quam detegit  
ipsum in Praefat. zu seinem Versuch einer freyern  
theologischen Lehrart ; ubi sic loquitur : „ Ich habe  
„ die Beyspiele selbst angeführt , Deum mortuum ,  
„ & sepultum esse ; dieß , sage ich , ist die Sprache  
„ der Theologie ; aber nicht Sprache der christlichen  
„ Religion. „ Hercule ! si scholasticae , adiapho-  
rae , & indifferentes hae adsertiones sunt , neque  
pertinentes ad christianam religionem , fide divina  
illas non credit Semlerus. Non itaque credit ,  
Christum , qui pro nobis mortuus est , Deum esse.  
Quam belle sic refutatur Bahrdtius !

### §. L.

Scilicet capimus , quare nolit Semlerus ex persona  
Christi patientis commonstrare divinitatem sacrificii ,  
illumque verum simul sacerdotem & victimam nun-  
cupare. Non satis catholice de Christi Divinitate  
pronunciat , §. 37. quid mirum , si non audeat sacri-  
ficiu absolute divinum edicere ? Forte Verbum se-  
cunda in Deitate persona non est ; cum ergo Patrem  
fuisse incarnatum , adfirmare non possit , sequitur ,  
Christum forte Deum non fuisse , & sic Deum-  
ho-



hominem in cruce se non obtulisse. — Ast timorem hunc Semleri pridem S. Paulus nedum inutilem, sed infidelem esse declaravit, ut §. 47. mox ostendi. Nam Christum vocat aperte fundatorem & conditorem caeli & terrae. Eundem docet esse crucifixum, ac Pontificem per omnia tentatum absque peccato. Vocat verum Dei Filium, de quo dicitur: *Thronus tuus Deus in seculum seculi*. Denique sacerdotem in aeternum nominat secundum ordinem Melchisedech, illique adtribuit illud Psalmistae: *Ecce venio, ut faciam Deus voluntatem tuam*; in qua voluntate sanctificati sumus per oblationem corporis Jesu Christi. (s) — Igitur Christus verus Deus - Homo, verusque Sacerdos & Pontifex se victimam in cruce tradens, & oblationem cruentam sui corporis faciens, adeo non humanum, ut maxime verissimeque divinum monstravit fuisse crucis sacrificium. Ecce totum Redemptionis humanae Mysterium! sic *Deus erat in Christo mundum reconcilians sibi* (t), usus Ss Humanitate illius ut instrumento voluntario; & idem Deus erat verbum, quod caro factum fuerat: ideoque & sacrificium Christi Domini erat vere divinum.

## §. LI.

Unus porro articulus Bahrdtii sextus huc spectat, quem breviter expediam. Inquit: „Fidem „in Jesum Christum pro Christianis conditionem  
ine-

---

(f) Hebr. c. 1. & 7. rursus c. 10. (t) 2. Cor. c. 5. v. 19.



„ inevitabilem salutis existere , negari non potest.  
„ Verum obligationem hanc ad alios etiam non  
„ Christianos extendi , insipiens judico , inhumana-  
„ num , Scripturaeque contrarium , Rursus ; hanc  
„ ipsam fidem in adprehensione aliqua & adplica-  
„ tione meritorum Christi consistere , eodem modo  
„ falsum arbitror. In novo saltem Testamento adeo  
„ parum de isthoc fidei conceptu reperitur , ut ae-  
„ nigma sit mihi ; qua ratione Doctores ecclesiae  
„ permoti fuerint , ut sic acciperent. Fides itaque  
„ in Christum aliud nihil est , quam acceptatio do-  
„ ctrinae Jesu & adimpletio , conjuncta firmae fidu-  
„ ciae in promissiones futurae beatitudinis , a Christo  
„ factas , ejusque morte obsignatas. „ Ubi duo  
praecipue tenet Bahrdtius , 1<sup>mo</sup> fidem in Jesum  
Christum non esse ad salutem necessariam iis , qui  
Christiani non sunt , sed solum Christianis ; 2<sup>do</sup>  
fidem hanc non esse adprehensionem aut adpli-  
cationem meritorum Christi , adeoque non tam  
actum intellectus ; sed voluntatis adimplentis do-  
ctrinam Jesu , firmamque in promissiones futurae  
beatitudinis fiduciam habentis.

## §. LII.


Et quidem si per primum aliud non velit ,  
nisi quod aliqui adhuc satis catholice defendunt , fi-  
dem in Jesum Christum omnino explicitam non esse  
necessariam ad salutem ; si inquam , solum hoc ve-  
lit , per exorbitantes suas expressiones duntaxat  
peccavit , quas adhibuit , opinionem contrariam ut  
infi-



insipientem, inhumanam & adversam Ss. Literis traducendo. At enim cum hunc articulum jam ante praecefferit alius, in quo Divinitatem Christi cum Socinianis contrectat; numquid jure arguitur Bahrdtius, velle necessitatem omnis fidei in Jesum etiam implicitae denegare: & illam quam Christianis ait necessariam, neutiquam reapse divinam esse oportere, sed solum relate ad subjectum & Christianos conceptus imaginariam? Atqui haec adsertio plane Sociniana, Theistica & gentilis. — Alteram vero ejusdem articuli partem quod adtinet, si plus non intendat, nisi solam de se fidem, qua quis adprehendit, sibi que adplicat Christi merita, non justificare aut sufficere; bene docet. Illam enim tanquam merum actum intellectus sine operibus mortuam esse, nedum omnes Catholici, sed moderni Protestantes doctiores turmatim defendunt. Atque hinc utique necessarium, amplecti etiam & sectari doctrinam Christi, ac tam perfecti Salvatoris nostri vestigia premere. Sed enim suspectum ipse se reddidit Bahrdtius adeo, ut cum negaret adplicationem Christi meritorum ad fidem pertinere, aperte convincatur innuere, salutem nostram neutiquam illi valoris infiniti sacrificio, sed impletioni duntaxat moralis doctrinae Christi, nostraeque in Dei promissiones de futura beatitudine fiducia adscribendam esse; id quod Pelagianum, Arianum, ac Socinianum denuo consecrarium est. Vide §. XXXII. & §. XLIII.

CA-





## C A P U T III.

*Erravit Bahrdtius ex defectu  
Timoris.*

## §. LIII.

**H**uc pertinent originale peccatum, aeternitas poenarum, ac Daemonum infestatio, circa quae corrupta est fides Bahrdtii. Sic autem habet Articulus illius primus: „ Profiteor, me omnes „ que homines esse peccatores gratia Deique misericordia indigos. Porro num innatum sit nobis, ut simus peccatores: numque cum inclinatione ad malum omnes nascamur, dubito. Imo videntur mihi potius homines ipsi perditionis suae culpam habere. Tam multas enim in illis, observo egregias ad virtutem dispositiones naturales, tam multos innatos stimulos & inclinationes, ut fortassis nonnisi meliore educationis methodo, & modo vivendi Tyrannidis ac luxus experte opus foret ad originariam bonitatem humanae naturae restituendam. — Ubi vides, bone Lector! Bahrdtium de existentia originalis peccati plane dubitare, & actuale duntaxat in hominibus agnoscere. Rationem hanc reddit, quod homines iis sint dispositionibus & inclinationibus naturaliter

F

prae-



praediti, quarum ope, dummodo melior accedat educationis methodus, humanae naturae bonitas possit restitui.

## §. LIV.

Ego quidem Ethnicae ejusmodi doctrinae virus omnibus adparere, facile perspicio, nec proin longiore illam cenfeo refutatione dignam. Si dubium est, an peccatum aliquod, pravaque ad malum inclinatio connata sint nobis: sique humanae naturae bonitas, quam propria animae & personali culpa, reparari de facili potest ope naturalium dispositionum, ac meliore educationis methodo; ergo dubium est saltem, an baptismus amplius ad salutem sit necessarius? Dubium, an parvuli sine baptismo denati, & culpae propriae personalis naturaliter incapaces vita aeterna priventur? Dubium, an gentiles naturae viribus non idem omnino possint obtinere, quod Christiani viribus gratiae supernaturalis, & Ss. pignorum adminiculo? — Non ergo Pelagiani pro haereticis declarandi; iniqua fuit omnis ecclesiae, Conciliorum & Patrum condemnatio in Pelagium Britanniae colubrum & Viperinum illius germen contorta.

## §. LV.

Quid quod ultra progredior. In mente Bahrdtii Baptismus aliud nihil nisi arbitraria quaedam ceremonia existet, tantum abest, ut Christianismi janua dici debeat. Certe enim quae in praesente  
Arti-



Articulo dubitavit, paulo superius adhuc se magis declaravit versipellis, & serpentina Pelagii soboles. Pag. enim 15. Peccati originalis doctrinam illa inter dogmata numerat, quae partim pietati noceant, partim infidelitatis origo & contemptus religionis occasio sint. — Siccine destruitur fundamentum Christianae fidei? Sic subvertitur primum dogma bonis moribus instruendis aptissimum? Suspicio Bahrdtium, ni suae cuticulae timeret, exiturum inter primos fore, qui cum Gentilibus deriderent Christianorum baptismum, hosque superstitionis arguerent. At enim, ut ne plura dicam, conticescat maledicum os hominis plusquam Sociniani. „ Pro peccato originis Ecclesia ab Apostolis traditionem suscepit etiam parvulis baptismum dare. Sciebant enim, quia essent in omnibus genuinae sordes peccati, quae per aquam, & Spiritum S. ablui deberent. „ ORIGENES (u).

## §. LVI.

Et qui Bahrdtiano huic errori Semlerus resistit? Contradictionem quidem suam adversario ostendit, qua jam de originali peccato dubitat, jam vero illud absolute negat; praeterea retorquet in Bahrdtium, inquit, praeter dispositiones naturae bonas in hominibus etiam malas deprehendi, quae originale peccatum nuncupentur; denique assumit quasi argumentum; originariam enim naturae

F 2

rae

---

(u) L. 5. in c. 6. Rom.



rae bonitatem cum restitui posse adfirmet Bahrd-  
 tius, sequitur manifeste illam fuisse deperditam. —  
 Haec enim vero omnia, quae Semlerus ex ratione  
 respondet, omittamus. At cum illa statim ab  
 initio verba legissem, adtonita plane mens obstu-  
 puit; ait nimirum Semlerus pag. 69. „ Es stehet  
 „ ihm frey, daran zu zweifeln, ob uns diese mora-  
 „ lische Negation (Erbünde) und eine vorzügliche  
 „ Leichtigkeit und Neigung zum Bösen angeboren  
 „ heißen könne; wie es uns frey stehet zu bejahen. „  
 Bone Deus! jam iterum adpellatur libertas con-  
 scientiae! Fas est privato cuidam homini & per  
 baptismum ecclesiae januam ingresso dubitare,  
 connatumne nobis peccatum, pravaque ad malum  
 inclinatio sit, postquam omnis retro antiquitas ab  
 Apostolorum tempore clarissime definivit, nos om-  
 nes in originali peccato tam nasci, quam concipi?  
 Vah! si ergo Bahrdtius, si alii increduli Semlero  
 oggerant: re maturius ponderata cognoscimus, a-  
 liter se habere, quam ecclesia doceat? Si suis i-  
 deo parvulis clam verum baptisma subtrahant?  
 Horrenda consecutio, at vix evitabilis! si enim li-  
 ceat semel apud se dubitare, praeoccupata incre-  
 dulorum judicia brevi rationes habere sibi videbun-  
 tur, ut omnino negent, & sic cum enormi salutis  
 humanae dispendio clanculum saltem in praxin de-  
 ducant. Verum quid expectes aliud a viro Pelagii  
 discipulo, qualis est Semlerus? Inquit iste in Prae-  
 fat. cit. „ Alle gelehrte Theologen wissen es, daß  
 dem



„ Dem Pelagius unsere unpartheyische Hochachtung  
„ mehr gebühre , als den Afrikanischen Brüdern der  
„ lateinischen Unwissenheit. „ Hinc posteaquam di-  
ram adpellaverat , & ab Augustino inventam for-  
mulam , secundum quam peccatum originale ad  
infantes transit , atque embryones , Christianis sa-  
crae Scripturae Lectoribus liberum relinquit de ea  
re sententiam ferre pro varia consuetudine interpre-  
tandi. Instit. ad doctrin. Christian. pag. 378.

## §. LVII.

Aliud non minus practicum religionis princi-  
pium tollere connititur Bahrtdius , ubi de aeterni-  
tate poenarum art 7. se ita exprimit : „ Credo ,  
„ justos omnes a Deo summe beatos in altera vita  
„ esse reddendos ; illum vero ad torquendos aeter-  
„ num , ac diabolo tradendos malos eodem modo  
„ inclinari , non credo. Nam & ipse testatur :  
„ *Ego sum Dominus Deus tuus , Deus aemulator ;*  
„ *reddens iniquitatem patrum super filios in tertiam*  
„ *& quartam generationem his , qui oderunt me. Et*  
„ *faciens misericordiam in multa millia diligentibus*  
„ *me , & custodientibus praecepta mea.* Deuter. 5. v.  
„ 9. & 10. Ex his concludo adversum eos , qui  
„ facere vellent Deum eodem modo vindictae cu-  
„ pidum , uti benignum : Sicut quatuor ad mille ,  
„ ita se habet in Deo inclinatio puniendi ad incli-  
„ nationem praemiandi. — Scilicet e Theistarum  
libris hanc suam ratiunculam Bahrtdius mutuave-



rit. Touffaint, aliique justitiam Dei pro adpetitu vindictae sumpserunt. Horum jam expressionem & ipse adhibet, quando Deum dicit ad puniendum inclinari. Itaque praeprimis rejicienda fuerat ista locutio, qua Deus habere vindictae cupidinem dicitur, cum Ente infinite perfecto neutiquam conjugibilem. Quaeso enim te, quis Catholicorum unquam adeo blasphemus fuit, ut sub justitia Dei vindictae adpetitum intelligeret?

### §. LVIII.

Jam vero perfectissimae Dei justitiae congruere, ut malefactores ad finem perseverantes aeternum puniat, a posteriori cum primis tam aperte monstratur, ut Scripturae vim inferat maximam, qui aliter sentiat. (w) *Discedite maledicti in ignem aeternum*; & paulo post: (x) *ibunt hi in supplicium aeternum*. (y) Christus aeternas poenas iis, qui scandalizant pusillos, tertium repetitis comminatur, scilicet mittendos in gehennam & in ignem inextinguibilem, ubi vermis eorum non morietur & ignis non extinguetur. (z) Graviter adfirmat Apostolus eos, qui non obediunt Evangelio Christi, poenas daturus aeternas in interitu a facie Domini. Similia habentur *Luc. 22. 15. Judae 6. Apocal. 14. 10.* — Textus hi horrendi sunt.

(w) Matth. 25. v. 41.

(x) ibid. v. 46.

(y) Marc. 9. a v. 41.

(z) II. Thessalon. 1. v. 8. & 9.



iunt , ut contremiscere deberemus ; tam patethici , ut explanatione non egeant ; tam credibiles , ut convincant, Et tamen Bahrdtius alium praefert Scripturae locum , ex quo , cum nil minus quam intentioni serviat , mechanicum aliquod argumentum instruit. In 5to Deuter cap. de hujus duntaxat vitae poenis. atque idololatriae peccato in filiis adhuc punito agitur ; in nostris vero textibus de poenis mortem & extremum iudicium subsequenter sermo est ; hic negativa expressio , *vermis non morietur , ignis non exstinguetur* ; item absoluta paritas , qua & vita proborum aeterna , & supplicium improborum aeternum perinde dicuntur , litem adeo peremptorie terminant , ut prudenti cuilibet hanc Augustini vocem non extorquere non possint : „ Qualiscunque poena signi-  
ficata sit nomine vermis atque ignis , certe si  
non morietur , neque exstinguetur. sine siue prae-  
dicata est. „ (a)

## §. LIX.

Cesset hinc omnis argutatio , quam cum Theistis format Bahrdtius. Scilicet infinite misericors est Deus ? Punit ut Pater , non vindicat ut Tyrannus ? Misericordia superexaltat iudicium ? Hoc ad illam se habet , uti quatuor ad mille ? — Quaeso te , quisquis adsertor horum es dogmatum . quam tu tibi bonitatem Dei & misericordiam fingis ? Talemne quae caeca sit , omnisque sapientiae consilio



destituta? Talem, quam habet simplex quidam & bonus in humanis iudex? Talem, quae bonum commune majus non respicit, & exactam omnino providentiam sibi conjunctam non habet? Si ita misericordem tibi depingas Deum, magis tu Tyrannum facis, & Deitatem suam ipsi aufers. Percipias ergo, quid omnis tibi sana ratio distinet. Talem habet bonitatem Deus, talem misericordiam, quae sine sapientiae directricis consilio non est; sed sapientiae divinae consilium est, aeternas pro peccatoribus ad finem perseverantibus poenas statuere: Nam quod actu statuit Deus, §. 57. sapientissime prorsus statuit. Ergo aeternas decernere poenas tam opus dici bonitatis & misericordiae potest, quam opus justitiae Dei ac sapientiae. Hoc sane ratiocinium vel historica solum Evangelii fide supposita tam certum est, ut Ethnicum convincere debeat; quanto magis Bahrdtium, qui revelationem se admittere profitetur, rapere ad adsensum debuisset?

## §. LX.

Pondus addat discursus S. Hieronymi, quo pridem Origenistas impugnavit, incredulorum hac in parte praecentores: „ Scimus quidem clementem esse Deum; nec qui peccatores sumus, crudelitate illius delectamur; sed legimus: Misericors & justus Dominus: & Deus noster misertur. Justitia Dei vallatur misericordia, & tali ad judicium ambitione procedit: Sic parcit, ut  
judi-





„ iudicet , sic iudicat , ut misereatur. Misericor-  
„ dia & Veritas obviaverunt sibi , iustitia & pax  
„ osculatae sunt se. Alioquin si omnes rationabiles  
„ Creaturae aequales sunt , & vel ex virtutibus ,  
„ vel ex vitiis , sponte propria aut sursum erigun-  
„ tur , aut in ima merguntur ; & longo post cir-  
„ cuitu , atque infinitis seculis , omnium rerum  
„ restitutio fiet , & una dignitas militantium : quae  
„ differentia erit inter Matrem Domini & ( quod  
„ dictu quoque scelus est ) victimas libidinum pub-  
„ licarum ? Idemne erit Gabriel & diabolus ? ii-  
„ dem Prophetae & Pseudoprophetae ? iidem A-  
„ postoli & daemones ? iidem Martyres & Perse-  
„ cutores ? Finge quod libet ; & tempora duplica ,  
„ & infinitas aetates congere cruciatibus : Si fi-  
„ nis omnium similis est , praeteritum omne pro  
„ nihilo est ; quia non quaerimus , quid aliquando  
„ fuerimus , sed quid semper futuri simus. „ ( b )

## §. LXI.

Semlerus circa hunc Bahrdtii articulum fere nihil praestitit , quam quod autoritate Joannis Calvini ostenderet adlatum Deuteronomii textum adeo non ob stare , ut magis ex illo alterius vitae poenarum acerbitas comprobetur. Ipsam vero aeternam durationem ne is quidem vel uno confirmat argumento — Quam melius fecisset Semlerus , si pro Calvino citasset iudicantis ecclesiae authorita-

F 5

tem?

---

(b) Comment. in Jonam c. 4.



tem? Si unus e Romano-Catholicis errasse comperiatur, scuto illo irrefragabili ad rectum continuo tramite reduci potest. At cum Bahrdtius ex reliquorum more Protestantium infallibilem omnem humanam auctoritatem pertinaciter temnat: Quid juvat, si centum illi Calvinos, Lutheros centum objicias, quos non majore prae se Spiritu in Ss. Literis exponendis agnoscit? — Juvet hic denuo fraterne compellare D.D. Protestantes. Nolite quae-  
so errare fratres! obponite Bahrdtio, circa practicum hunc de aeternitate poenarum articulum in bonos mores nonnisi maxime influentem, obponite textus Scripturae innumeros, confessionum formulas, Concordiae libros; ni prius Ecclesiae vestrae statuatis auctoritatem infallibilem, vestra vobis argumenta poene cum risu remittet, nil sibi & aliis de poenarum aeternitate metuens.

## §. LXII.

Unus demum articulus superest, quem ponit Bahrdtius de infestatione daemonum. Sic habet:  
„ Angelos dari ac daemones poterit esse verum;  
„ hos autem tales esse, quales vult ecclesiae systema, ita ut vere obsideant homines, se tanquam  
„ spectra exhibeant, in animas hominum operentur, malasque possint producere cogitationes &  
„ proposita, nullum unquam, cui crederem, sufficiens fundamentum reperiri. — Hac in professione Semlerus, ut constat, mutuas jungit manus. Notus est Daemonologiae Biblicae liber,  
quem



quem ab alio conscriptum ille tam praefatione, quam adpendice auxit; nota commentatio de Daemoniacis, quam adornavit; nota altercatio, quam de hac re vel cum suis etiam collegis Protestantibus habuit. Praeterea in hoc adhuc deterior Bahrtdtio est, quod impotentis animi vir Ss. omnibus insultat Patribus, quos arbitrariae suae opinionationi sentit adversos. Dedi meis in Theologia auditoribus labente isthoc anno refutationem Semleri integram; unde ne lucubrationis moles excrescat, nolim hic fusa alibi dicta congerere. Unum tacere non possum, cui si sapiant, adquiescere Bahrdtius & Semlerus deberent.

### §. LXIII.

Scilicet, ut nervose argumentatur Canus, (c) qui Sanctos veteres in universum omnes in S. Scripturae unoquolibet loco exponendo errasse adfirmat, eum catholicae ecclesiae hunc ipsum errorem adtribuere, certum est. Nam ubicunque est ecclesiae corpus, ibi etiam est Spiritus veritatis; Spiritus autem in corpore non easdem omnibus corporeis partibus tribuit functiones, quemadmodum Apostolus (d) elegantissime persequitur: *Alii namque datur per Spiritum sermo sapientiae, alii prophetia, alii interpretatio sermonum.* Nec enim in ecclesia omnes Apostoli, nec omnes Prophetiae, nec omnes interpretantur. Certum est autem, quod  
Ss.

---

(c) de loc. Theolog. l. 7. c. 3. Concl. 5.

(d) I. Cor. 12.



Ss. Literarum intelligentia Ss. Doctoribus, si quibus, maxime per Spiritum data est. Qui ergo Spiritum veritatis Sanctis omnibus in Scripturae S. interpretatione negat, hic sine dubio eundem Spiritum ecclesiae tollit; quemadmodum qui ab oculis videndi munus aufert, hic reliquas etiam omnes corporis partes obscurat; nam si oculus non fuerit lucidus, *totum corpus tenebrosum erit* (e). Huc quadrat illud: (f) *Non te praetereat narratio seniorum: ipsi enim didicerunt a Patribus suis: quoniam ab ipsis discas intellectum, & in tempore necessitatis dare responsum.* Unde Petrus Abailardus, quem defendit Semlerus (g), iustissime corripitur a S. Bernardo: (h) „Ecclesiasticorum dogmatum u- „nam omnium de hac re Petrus Abailardus dicit „esse sententiam, & ipsam ponit ac spernit, & „gloriatur se habere meliorem, non veritus contra praeceptum sapientis transgredi terminos „antiquos, quos posuerunt patres nostri.”

## §. LXIV.

Atqui de infestatione Daemonum, hoc probamus Catholicorum autoritate Sanctorum (qui rem in Scripturis clare definitam omnes agnoscunt) ac per hoc non est consequens, ut falsum sit. Tales quippe ac tanti viri secundum catholicam fidem hoc verum esse confirmant, ut vestra fragilis & argutula novitas sola autoritate contra-

---

(e) Luc. 11. v. 34. (f) Eccli. 8. (g) Dissertat. de Daemoniac. §. 8. in not. (h) epist. ad Innocent. n. 190.



„teratur illorum. Praeterquam quod ea dicunt,  
„ut se per eos loqui veritas ipsa testetur. „ AUGUST.

(i) — Neque audiendus est Semlerus, quando  
Patres veteres Platonicae scholae placitis hac in  
materia imbutos fuisse carpit. Os enim illi deuo  
magnus Hipponensium Praeful obstruat loc. cit.  
paulo inferius addens: „Sanctos & in sancta eccle-  
„sia illustres Antistites Dei, non Platoniceis, &  
„Aristotelicis & Zenonicis (quamquam & in his  
„nonnulli ex eis docti fuere) verum omnes sacris  
„litteris eruditos nominatim sicut oportebat, ex-  
„pressi, ut in eis timeas non ipsos, sed illum, qui  
„sibi eos utilia vasa formavit. „

### §. LXV.

Neque insuperabilis haec Patrum autoritas  
Semlerum latuit; unde fatetur ipse: (k) „Falso  
„dicitur, fidem fuisse ecclesiae omnis christianae  
„communem. Romanae semper fuit, fateor; sed  
„ejus magisterium parum placuerit, adeo diabolico-  
„rum negotio abuti solebant. „ — Unum hic bo-  
num verbum Semlere! a primo seculo usque ad  
BERNARDUM communi calculo Patres omnes no-  
strae subscribere doctrinae; Ignatius, Athenago-  
ras, Justinus, Tertullianus, Cyprianus, Basilus,  
Chrysostomus, Leo, Hieronymus, Augustinus,  
Athanasius, Gregorius, & centum alii. Atqui ut  
ais, Romanae tantum ecclesiae hic sensus fuit:  
„Romanae sensus semper fuit, fateor. „ Ergo Pa-  
tres

---

(i) L. 2. adv. Julian. (k) Loc. cit. §. 14.



tres illi ad Romanam spectabant ecclesiam. Sed Patres illi viri erant Apostolici. Ergo Romana ecclesia Apostolicis constat viris, eritque & ipsa Apostolica. Ohe mi bone! in quam te hic intrusisti charybdim? — Scilicet hoc adhuc deerat impietati, ut sanctissimos ecclesiae Patres Lutheri more Semlerus traduceret? Si ipsum audias introd. ad Theol. christian. pag. 19. „ in sacrarum fabularum „ & nugarum quasi officio diligentissimi fuere. „ — „ Tertullian war ein Fanatiker. Von Eyprianus „ kann ich nicht besser urtheilen. Gregorius Magnus ist ein geringer Lehrer. Justini Unwahrheiten, Phantasien und Wärscheren. Grenai elende „ Schriften. Epiphanius war gerade so ein Schmeißer. „ rer. Sie alle würden vielmehr gern bey uns in „ die Schule gehen. „ Ita Semlerus in seiner ausführlichen Erklärung über einige neue theologische Aufgaben, Censuren und Klagen. Halle im Magd. 1777.

## §. LXVI.

Cessent igitur Semlerus & Bährdtius catholicam de vera daemonum infestatione doctrinam impugnare. Agnoscant potius moralem illius nexum cum notitia mysteriorum & miraculorum religionis nostrae. Si enim licet textus Scripturae de infestatione daemonum in sensum minime proum & inauditum detorquere, fas etiam sibi iudicabunt increduli, eos, qui agunt de mysterio Ss Trinitatis, de Christi & Spiritus S. Divinitate, de peccato origina-



ginali, de vigilantia christiana, de paenarum aeternitate, improprio aliove longe sensu accipere, quam ab ecclesia sumantur. Atqui sic Pyrrhonismus inducitur, & effraenis in sententiis licentia; singuli pro arbitrio suo explicandum Scripturae sensum ad sua praejudicia suscipient: & augustissima religionis nostrae mysteria novis hisce excoctatis interpretamentis in classem rerum maxime communium & pedestrium redigentur. Certe Arianus textum illum: *Ego & Pater unum sumus*, tantum adsumet de unionem voluntatis. Macedonianus πνευμα ἁγίων seu Spiritum sanctum interpretabitur tantum pro gratia Dei seu sanctitate. Origenista ignem aeternum pro tempore simpliciter longo sumet. Et sic de aliis.

## §. LXVII.

Sed & miraculorum doctrina patitur; si namque ad tantam verborum lucem integrum est cuiusque suspicari, nihil hic sive de malo spiritu, sive de energumenis agi, sed rem esse tantum de morbo, & tetro melancholiae humore; liceret pariter assertissima etiam prodigia tuto in rerum naturalium censum redigere, uti transfretationem maris Idumaei, solis stationem ad nutum Josue, Lazari resurrectionem. Pro eo namque quod Hebraei transfretasse credantur, alveum tantum illius in aestu maris arentem subiisse possent intelligi. Reputandum esset pariter, non stetisse quidem reipsa solem, sed id praestitisse Deum, ut Josue maturi-

us



us rem totam absolveret, antequam noctis tenebrae superincumberent. Lazarum non quatuor inde diebus interiisse, sed credulis spectatoribus imposuisse symptoma quoddam apoplexiae, subito incidens languenti. — Sane si quis de puella Marc. 5. suscitata vel de filio Naim Luc. 7. dicat, illos non revera mortuos, sed tantum pro mortuis fuisse habitos? — Jam autem, *puella surge; adolescens tibi dico, surge;* in quo differunt locutiones istae ab aliis: *Exi spiritus inmande ab homine isto; obmutesce, & exi ab eo?* — Cedamus quaeso veritati. Textus hos omnes ad improprium & inauditum detorquere sensum, nunquam fieret sine offendiculo, nunquam sine ecclesiae discrimine, quae detractis armis & argumentis nuda exponeretur suorum hostium telis.



## C A P U T IV.

*Erravit Bahrdtius ex defectu  
Simplicitatis.*

### §. LXVIII.

**U**bi deficit simplicitas ac docilitas, deest quoque fides. Nam graphice prorsus inquit Apostolus: *Haec doce & exhortare. Siquis aliter docet,*





et, & non adquiescit sanis sermonibus Domini nostri Jesu Christi, & ei, quae secundum pietatem est, doctrinae, superbus est, nihil sciens, sed languens circa quaestiones & pugnas verborum: ex quibus oriuntur invidiae, contentiones, blasphemiae, suspiciones malae, confussiones hominum mente corruptorum (1).

— Lugubre Paulini ejus vaticinii exemplum nobis in se Bahrdtius exhibet, ausim cum veritate dicere, ab evangelica simplicitate quam maxime alienus. Ostendunt id ipsum ea, quae professioni suae ad Caesarem datae praemisit, perniciofa principia, quae jam persequar, & ad octo reducam. Cuilibet ex his Semleri responsionem subtexam, ut pateat, & hunc Protestantem vix hilo meliorem esse, & quae miser Bahrdtius posuit, meras esse & originarias maculas a Luthero parente suo per necessarium seu doctrinae, seu factorum nexum ad ipsum traductas.

## §. LXIX.

Itaque principium illius primum pag. 9. hoc est: „Fateor, ex aliquo jam tempore me fuisse „convictum, quod ecclesiae nostrae protestanticae „systema complectatur dogmata, neque in Scripturis fundata, neque in ratione. Et quae partim „pietati noceant, partim incredulitatis origo, & „contemptae religionis causa apud millenos sint. „Ita Bahrdtius. — „Concedo totum; quid sequitur? . . . . Christiano cuilibet fas est, quin &

G

obli-

---


(1) 1. Timoth. 6.



„ obligatio , ut siquidem capax inveniatur , adcu-  
 „ rate disquirat sic dicta doctrinae systemata , quan-  
 „ tum valet , ita ut suos etiam proprios conceptus  
 „ ad suam aedificationem & tranquillitatem prae-  
 „ ferre possit. Id quidem suae conscientiae libertas  
 „ exigit. Imo jus habet , suam , quam hactenus  
 „ tenuit , religionem penitus deferendi , aliamque  
 „ dummodo toleratam amplectendi. Quodsi vero  
 „ sui animi sensa scriptis etiam divulgare , atque  
 „ aliis , ut legant , obtrudere velit ; non jam hoc  
 „ ipsi liberum factu est , sed altiori Superiorum de  
 „ scriptis arbitrantium judicio substat. Itaque li-  
 „ cuit quidem auctori , ut sua imprimi scripta cu-  
 „ raret , modo Caesarem , & alia suprema capita  
 „ pro servanda religionis pace ac systemate constitu-  
 „ ta non adpellasset. „ Ita Semlerus pag. 12. & seqq.

## §. LXX.

Rides amice lector ! nec frustra ; vides enim ,  
 ut mulus mulum scabat. Semlerus concedit to-  
 tum ; modo Bahrdtius scripta sua non cum tantis  
 in religionem maxime protestanticam contumeliis ,  
 & rara adeo Caesaris ac Imperantium compella-  
 tione evulgari fecisset. Miseram sortem ! placet  
 Semlero venenum ; solum non placet involucrum.  
 Idem in cute Bahrdtius : Theista externe politicus.  
 Non jam de hoc agitur mei Domini ! quidnam ex-  
 ternus mere decor exigit. Quatenus cuilibet co-  
 ram Deo suo lex scripta , id enimvero est , quod  
 expediri debuit. — Etenim cum inter nociva illa  
 dogma-



dogmata Bahrdtius numeret originale peccatum, ejusque imputationem: necessitatem satisfaciendi: peccatoris justificationem: Divinitatem Christi & Spiritus sancti Athanasiano sensu acceptam: inferni poenarum aeternitatem, & similia; cumque de his quilibet, non tantum Semlero teste, sed aliis quoque Doctorum evangelicorum id perhibentibus, sentire possit, prout se convictum credet; ideo vos, obtestor D. D. Protestantes, & adjuro quasi per sanguinem Jesu Christi, ubinam est ecclesiae vestrae unitas? Non enim quod identidem ingero, non tantum sufficit externe profiteri, si liberum est interne discredere. Ut quid ergo rogaverit Christus: (m) *Non pro eis rogo tantum, sed & pro eis, qui credituri sunt per verbum eorum in me, ut omnes unum sint, sicut tu pater in me, & ego in te, ut & ipsi in nobis unum sint.* Quid mirum, si Bahrdtius ex licentia suae religionis, quid libet, etiam in dogmatibus sentiendi ad fatalem illum passum perductus est?

## §. LXXI.

Jam ad alterum ipsius principium ex priori confectarium veniamus. Inquit pag. 10. „Prout „expectari debuit a Doctore Confessionis Augu- „stanae, contra mox relata dogmata neque in con- „cionibus, neque in catechesibus coram populo „directe unquam tractavi, sed de illis vel tacui „omnino, vel ita locutus fui, ut separaverim,

G 2

quod

---

(m) Joann. 17.



„ quod nocivum ferebant secum , vel quod errone-  
 „ um , temperaverim. Ideoque ab obligationibus  
 „ Doctōri Protestantico propriis recessi nunquam. „  
**Bahrdtius.** — At reponit alter : „ Ille ut Doctōr  
 „ Confessionis Augustanae , ut oportuit, revera non  
 „ docuit. Lutherani Theologiae Doctōres omnes  
 „ summam illorum dogmatum doctorali suo jura-  
 „ mento habent comprehensam. Societati suae fi-  
 „ delis Doctōr rem ipsam & conceptum retinet; ver-  
 „ ba autem , personae , Trinitatis , hominios ,  
 „ peccati originalis &c. recepto usui sacrificat. Illud  
 „ jam pridem compertum est nedum inter fideles  
 „ Lutheranos, sed multos etiam Doctōres Romano-  
 „ Catholicos ab Erasmi tempore , qui secretionem  
 „ Theologicarum positionum concessere. Imo Con-  
 „ cilium aulicum Imperii Caesareum expresse san-  
 „ civit , Doctōrem quemlibet adstrictum esse tam-  
 „ diu symbolicis ecclesiae suae libris , quamdiu illo  
 „ munere publice fungitur. „ Semlerus pag. 28.  
 & seqq.

## §. LXXII.

Serione, an joco ? rem ipsam & conceptum  
 ab ecclesia sua diversum intra se convictus quilibet  
 retinere potest , docere autem debet praescripta a  
 libris symbolicis methodo ; Ergo unum e duobus  
 concedendum erit ; vel mentiri seu contra mentem  
 loqui licet Doctōri Protestantico : vel talis quam-  
 quam alias peritissimus , doctissimusque deponere  
 debebit munus. Alterum omnino intendit Caesa-  
 reum



reum Imperii concilium, cujus pro externa duntaxat unione sollicitum esse, & ad vitanda mala maiora politicis concordatis stare, partes sunt. Illud vero prius Semlerus admittit, & concedere cum ipso tenentur Protestantes omnes doctiores, qui ne dimittere suum cogant officium, externe docent aliter, quam interne sentiant. Juramentum a se super symbolicis emissum libris praetexunt, neque capiunt, illud esse vinculum iniquitatis non posse, mendaciumque in religionis materia dari gravissimum. Vae multis! nisi misero isthoc & diabolico uterentur stratagemate; a publicis Luthericae ecclesiae suae Cathedris remoti jam pridem fuissent, & maxime Semlerus, si quod sentiant, audacter edicerent.

### §. LXXIII.

Quamquam & ipsum hoc Semlerus probat, Doctorem videlicet Evangelicum adstrictum esse libris symbolicis, & Augustanae Confessioni, ita quidem, ut retinere munus non queat, si docere contra velit; esset enim hoc servire turpis lucri gratia. Sed nec tum quidem illud obire munus poterit, si agere praecise simulatorem cupiat, aliter docendo, quam interne sentiat. Audias illum pag. 110. sic perorantem: „Cajus perlubenter habere sustentationem vellet. Proinde vocationem Magistratus accipit, societati, quam sectatur, promittens; „juxta praescriptam ab illa doctrinam velle se gerere. At nunc pro se retinet reservationem men-



„ talem , quam ipsi adeo Jansenistae in politicis il-  
 „ lis horrebant Jesuitis. Dicit itaque intra se :  
 „ Protestanticus ego sum , autoritate humana nul-  
 „ la quoad meam fidem adstrictus. — Ecquis corda-  
 „ tus inter nos modum hunc procedendi approba-  
 „ bit ? Cajus retinere utique munus suum nequit,  
 „ als ein ehrlicher teutscher Biedermann , geschweige  
 „ als ein Christ , der so ein zartes Gewissen haben  
 „ will. „ — Jam quaeso judicet orbis , in Semlero  
 quid distent aera lupinis ? Libertatem conscientiae  
 passim jactat ; tuetur cum Lockio , & aliis modernis  
 Protestantibus , nulla societatis lege mere humana  
 quemlibet pro interno foro adstringi. Neque igitur  
 in dato casu Cajus ligabitur ? Porro si non ligetur,  
 quid obstat , quo minus apud se tueri contrarium  
 queat ? Quid obstat , quo minus tamen suo defungi  
 officio pergat ? scilicet mendacium ; mentalis refer-  
 vatio ? Atqui ut ipse Semlerus pag. 28. agnovit, ab  
 Erasmi tempore licet secretionem verborum facere,  
 ac terminorum ; licet receptas in quadam societate  
 expressiones dogmatum , citra sui jacturam mune-  
 ris , in publicis proferre instructionibus , tametsi  
 quis apud se illas nec teneat , nec probet. Eccur  
 itaque non liceat alicui docere quaedam dogmata so-  
 cietati propria , quamvis de illorum falsitate apud  
 se convictus quis sit : & sic retinere munus , quod  
 semel adeptus est ? Vellem ut hunc nodum Sem-  
 lerus mihi solvat. Restrictio mentalis utrinque est  
 eadem. Mentitur unus in dogmate : alter in dog-  
 matis



matiss expressione. Porro tam dogma, quam illius expressio doctrinae societatis convenit. Aut igitur privandus officio Cajus (id est Bahrdtius) non est: aut Semlerus pariter cum illo, simul & omnes Doctores Protestantici, qui libertatem conscientiae tantopere jactitant, & nihil ad se adtinere volunt de sacratis illis verborum expressionibus, quas priorem adhiberi etiam illa decrevit ecclesia, cujus ministri sunt — Demum & proprio isthoc jaculo semetipsum Semlerus perimit: „teneat apud se Bahrdtius, quod videtur; sed non doceat.“ Ad quod ego: Teneat Semlerus apud se, quod velit, & Libertinus pro se sit; sed perversa sua principia invulgus non spargat, ne sic cum ipso & alii damnentur. Sic saltem infestet Lutheranismi principiis, quae infidelitati internae praebent impunitatem fictitiam coram Altissimo: urgent externam mere tranquillitatem coram hominibus. Pax, pax; & non est pax, quia non credunt se obligari pro conscientia ad credendum dogmatibus, quae sua defendit ecclesia.

## §. LXXIV.

Principium Bahrdtii tertium denuo ex praeteritis fluit. Pergit enim pag. 10. „Convictus „plane sum, controversa religionis puncta ad instructionem populi nullatenus pertinere: ideoque „ab illis nihilo secius obiri ecclesiasticum docendi „munus posse, qui in suis persuasionibus a systematica religione quamvis recedant, ex converso



„ tamen eo ferventius purae Christi religioni ad-  
 „ haerescunt, & cum fundamento ipsam sciunt pro-  
 „ ponere, „ Bahrdtius. — „ Equidem libertas  
 „ conscientiae, veluti jus unius cujuslibet subditi,  
 „ proprie ad ipsum pertinet, tanquam ad personam  
 „ individuum & privatam, idque relate ad Deum.  
 „ Contra tanquam Doctor in publico constitutus  
 „ officio, publicaeque adstrictus societati doctrinam  
 „ Augustanae Confessionis proponat, oportet.  
 „ Hoc enim ab ipso societas exigit, ad hoc se ju-  
 „ ramento faciendum ligavit. Non ergo sincere,  
 „ non fideliter agit, qui animi sui sensa societatis  
 „ menti contraria novo quodam libro seu scripto  
 „ doctrinali complectitur, illumque societati pro-  
 „ ponit. „ Semlerus pag. 33.

### §. LXXV.

Verum arundineum esse istum Semleri bacu-  
 lum, tametsi reliquis etiam Protestantibus commu-  
 nis sit, isthoc facile ad hominem argumento con-  
 ficitur. Juramentum etiam in favorem humanae  
 tranquillitatis factum non acceptat Deus cum suae  
 gloriae detrimento, & veritatis praejudicio; ergo  
 si falsum deprehendat, super quo juravit, suo est  
 solutus juramento. Atqui Doctor quilibet Prote-  
 stanticus, jus habet in ecclesiae suae doctrinam in-  
 quirere, eamque apud se, si de contrario convictus  
 fuerit, rejicere ut falsam; ergo solvere seipsum ju-  
 ramento potest, imo debet, quia bono societatis  
 praeponderat veritas religionis, quam suus ipsi spi-  
 ritus





ritus dictat. Minorem nega propositionem si possis, aut concede totum. At enim illam nec Semlerus, nec alii inficiantur Protestantes, duce Luthero parente suo, qui (n) super illud Christi: *Attendite a falsis Prophetis*; ita se exprimit: „Hoc „Evangelium, quod agit de falsis Prophetis, ever- „tit funditus & radicitus papatum, & omnia con- „cilia, quare non tenemur servare, quod papa „praecipit & homines constituunt. Ideo adhuc „semel dico: Capite hoc Evangelium, quia neque „papae, neque conciliis, neque ulli hominum „commissum est. ut constituat & concludat, quid „sit fides; ideo debeo dicere; papa tu conclusisti „cum conciliis, nunc habeo ego iudicium, an „acceptare queam nec ne. — Falsam doctri- „nam nemo judicare potest, nisi spiritualis homo. „— Hercule! quis e Protestantibus vitio jam vertet Bahrdtio, si tamquam Doctor sicut Lutherus, eandem cum isto cantilenam adhibeat contra fabricatores Confessionis Augustanae, quam ille tenebriose contra verae ecclesiae Concilia & Episcopos?

## §. LXXVI.

Itaque manet: Bahrdtius aliter convictus solvitur iuramento, ita ut queat teste ipso Semlero vel ad Romanam digredi Ecclesiam, vel ad Calvinisticam. Ponamus jam ad Romano-Catholicam

G 5

se

---

(n) Serm. 11. super illud Christi: *Attendite a falsis Prophetis.*



se convertisse Bahrtdium , numquid sine laesione ulla juramenti poterit contraria Protestantibus scripta proponere, eaque in lucem edere? Nil ergo vetat, quo minus id possit tanquam Doctor adhuc Luthericus etiam contra Confessionem Augustanam. Vellem hic monere Lectorem, ut praefixi a me textus ex Tertulliano recordetur: Licuit Marcioni, Luthero; quidni etiam Marcionitae & Lutherano? Lutherus membrum Ecclesiae Romanae fuit, & tamen si Protestantes audias, impune doctrinam illius correxit; quare idem nequeat Bahrtdius in ecclesia sua Lutherica? Cum & ipse Doctor sit, uti Lutherus fuit. Aut solvant mihi tandem isthoc dilemma D. D. Protestantes; an juramentum, quod super libro concordiae, aut Confessione Augustana publice docenda deponunt Praedicantes, est absolutum ad dies vitae, vel est hypotheticum usque ad casum mutandae fors religionis? Si primum; ergo vel fas amplius nulli est ad aliam se convertere religionem: vel ludicrum est juramentum. Sin alterum; ergo dum convictus quispiam est, religionem suam aliquod docere falsum, adeo non stringitur juramento, ut tanquam pastor prudens cavere oves suas a malo pabulo debeat.

## §. LXXVII.

Abfit equidem, ut ista scribens ego Bahrtdii advocatus credar. E Protestantismi tantum principiis confundi ipsum non posse, adfirmo, Centies illi Semlerus oggerat, religionis puncta quae impug-



pugnat, non esse controversa, sed talia, de quibus plene inter tres Religiones toleratas pridem conveniat, pag. 31. Bahrdtius cum omni semper fundamento reponet: quid ad me Concilia, quid Augustana Confessio, quam docere publice etiam in iis, quae falsa continet, nec juravi unquam, nec jurare potui. Imo cum ut Doctor Protestanticus jus habeam inquirendi veritatem, & ubi hanc privato meo spiritu invenero, contrarium docere sine cordis duplicitate nequeam; inique nonnisi adcurator a meis Confratribus, & ab ipsis meo privor officio. Provoco ad Ecclesiae meae Doctores innumeros, qui idem fecere jam ante me, nec tamen reputati sunt quasi Schismatici Ecclesiae Protestanticae. Aliquorum exempla proferam: uti von Hrn. Abt Zerusalem; von Hrn. Consistorial-Rath Steinbart; von Hrn. Oberconsistorialrath Büsching; von Hrn. Senior Ursperger in Augsburg; von Hrn. Oberconsistorialrath und Probst Teller in Berlin; von Hrn. Doktor Semler. — Und wie viele rechtschaffene Lehrer der Kirche ließen sich anführen, welche, wie ich, über Gewissenszwang geklagt, die symbolischen Bücher dem Gewissen für lästig gehalten, und eine ausgebreitetere Toleranz gewünscht haben? Ist aber je ein einziger darüber, wie ich, für einen Abtrünnigen angesehen worden? Ita Bahrdtius, & quidem cum omni fundamento provocat. (o) Et quid quaeso, solide respondetunt

D D



D. D. Protestantes, quando suis adhuc armis confidunt, neque a Catholicorum illa Scrinio mutant?

## §. LXXVIII.

Tollant itaque nobiscum, tollant praecipuum, cui haftenus innitebantur cuneum; adimant jus privatis in rebus fidei seu dogmatis judicandi; admittant vero auctoritatem humanam infallibilem, cui contraire nefas sit. Sic enimvero negabunt radicitus suum Bahrtdio suppositum, religionis illa puncta adhuc esse controversa. Sic erunt haec infallibiliter revelata, & nonnisi cum aperta in fide haeresi impugnanda. Sic Bahrtdio larvam detrahent, ut totus denique Socinianus, totus in cute Theista adpareat. — Quamdiu vero ita non tendunt D. D. Protestantes; quamdiu illud HIERONYMI (p) in illorum congregatione impletur: „Hanc „ nempe scripturam, garrula anus, hanc delirus „ senex, hanc sophista verbosus, hanc universi „ praesumunt, lacerant, docent, antequam discant; „ quamdiu loquentem & a Spiritu S. directam non audiunt ecclesiam; tamdiu millenos & millenos inter se Bahrtdios, Semleros, & Hunnios numerabunt, illudque S. Irenaei ipsos constringet: (q) „ Alienati a veritate digne in omni voluntantur errore, „ fluctuati ab eo aliter atque aliter per „ tempora de eisdem sentientes, & nunquam scientiam

---

(p) Epist. ad Paulam 50. alias 103.

(q) L. 3. adv. haeres. c. 40.



tiam stabilem habentes. „ — Hoc proinde scutum prope unicum est pro unitate servanda, quod Protestantibus porrigit Vincentius Lirinensis in com-  
monitorio : „ Quia Scripturam sacram prae ipsa  
„ sui altitudine non uno eodemque sensu omnes ac-  
„ cipiunt, sed eadem eloquia aliter atque aliter ali-  
„ us atque alius interpretatur, ut pene quot ho-  
„ mines sunt, tot illic sententiae erui posse videan-  
„ tur. Idcirco multum necesse est, propter tantos  
„ tam varii erroris anfractus, ut propheticae &  
„ apostolicae interpretationis linea secundum eccle-  
„ siastici sensus normam dirigatur.„

### §. LXXIX.

Porro ad quartum Bahrdtii principium per-  
gamus, ex anterioribus rursus confectarium. In-  
quit pag. 12. „ Illa ecclesiae meae protestanticae  
„ dogmata (§. 69. indicata) sanam turbant ratio-  
„ nem, & parum adeo demonstrationis pro se ha-  
„ bent, ut mirum haud sit, si nullo non tempore  
„ pars hominum proprio illa judicio rimari, pro-  
„ bareque valens scandalosa repererit: & si pleri-  
„ que illorum causa dogmatum, quae sua professi-  
„ one superbiens nimium clerus tanquam unice sal-  
„ vificas fidei veritates obtrudere mundo voluit,  
„ totam denique repudiarint religionem. Bahrd-  
tius. — Reponit Semlerus pag. 39. „ Tam multi  
„ Doctores & Christiani dicere non possunt, illa  
„ ecclesiae dogmata sanam rationem turbare, aut  
„ deesse fundamenta, quae illa probentur. Quin  
imo



„ imo contrarium dicimus , & vi confessionis Au-  
 „ gustanae docemus publice. Est igitur frustranea  
 „ prorsus adversarii arrogantia , qua privatam suam  
 „ persuasionem magis quam aliorum vult esse fun-  
 „ datam. Dein ideas illas doctorum virorum do-  
 „ gmaticas de originali peccato , justificatione &  
 „ satisfactione quasi veritates fidei unice salvificas  
 „ hactenus obtrusit nemo ; gratis itaque dicit  
 „ Bahrdtius , plerosque totam ideo repudiassse reli-  
 „ gionem. Tandem clerum maxime protestanti-  
 „ cum suae possessioni non adeo fuisse confisum , vel  
 „ exinde patet , quod ipsi quidam Doctores Roma-  
 „ nenses illum de aliquorum novitate dogmatum  
 „ incusaverint. pag. 41. Liberum est cuilibet rem  
 „ tenere , & quae scandalum pariunt , rei descri-  
 „ ptiones abjicere. „ Semlerus.

### §. LXXX.

Ego vero in persona Bahrdtii D. Semlero<sup>71</sup>, ce-  
 terisque Protestantibus sic obvio. Martinus Lu-  
 therus parens noster non erat arrogans , quando  
 sua in religione sensa omnium passim tum temporis  
 Episcoporum & Conciliorum decretis praetulit ;  
 ecquis igitur injuriae mihi ducat , si meam ego do-  
 ctrinam praehabeam aliorum sensui , qui confessioni  
 adhaerent Augustanae ? Nil mihi aliud , prae-  
 terquam protectores desunt , quos Lutherus habuit ;  
 da mihi Saxoniae Ducein , da Landgravium Häs-  
 siae , da reliquos , & videbis , num arrogantia mea  
 frustranea sit ? Dura plane retorsio ! — Rursum ;  
 si



si Idearum illarum dogmaticarum adeo nil interfuit religioni , ut quid Lutherus cum sequacibus contrarias fixit pertinacia tanta , ut Romano-catholicos tanquam antichristianos traduxerit? Quare ipsaemet illae Ideae dogmaticae in causa fuerunt, ut tot inter se diversae confessionum formulae cuderentur ? In solo colloquio Naumburgensi jam harum duodecim sunt exhibitae. — Denique clorum protestanticum suae maxime possessioni confidere , novissime probat das Gutachten gewisser protestantischer Herren Geistlichen über die Bahrdtische Sache. col. 6. — Et licet milleni mecum sentiant , externe tamen possessionem illam panis gratia impotenter urgent. Sic ad Semleri & aliorum Protestantium contra se objectionem reponet Bahrdtius.

### §. LXXXI.

Nos porro per unicam argumenti inversionem totum Bahrdtii principium scindimus , quod sine vulnere proprio scindere nequeunt Protestantes. Pars nulla hominum proprio , id est , privato suo iudicio rimari , probareque potest sancta dogmata ab ecclesia semel ad credendum proposita ; sed neque clerus sua possessione inflatus , verum assistentia infallibili Spiritus sancti suffultus , per legitimam successionem hinc ab Apostolis derivatus , & nedum scripto , sed etiam tradito Dei verbo confusus , illa dogmata veris Christi fidelibus exhibet. Itaque vi hujus divini systematis ecclesiae nemo

am-



amplius fidelium jus obtinet, ut in illorum adhuc veritatem inquirat, aut rationis omnimodam demonstrationem expectet. Ubi de ecclesiae suae iudicio irrefragabili convictus in genere est, cum maxima nonnisi infania de dogmatis ab ecclesia propositis in specie dubitat. Nae enim omnis hunc Logica derelinqueret, quando in rebus fidei omnibus per ecclesiam oblati ejusdem auctoritatem agnoscant, hanc autem determinate dogmaticam veritatem credi debere neget. — Haec nimirum sancta simplicitas, qua humiles filii vocem suae Matris audiunt, eique cui auctoritatem loquendi suo sanguine contesseratam Salvator contulit, prompti & non reluctantes obediunt, haec inquam simplicitas veri verae fidei catholicae fundamentum, ita illius defectus infidelitatis tam Bahrtdianae, quam Protestanticae fomentum est. „Diversae haereses, di-  
 „versa schismata personant, linguae multae con-  
 „tradicunt veraci doctrinae. Tu curre ad Taber-  
 „naculum Dei, ecclesiam catholicam tene, a re-  
 „gula veritatis noli discedere, & protegeris in ta-  
 „bernaculo a contradictione linguarum. „ S. AUGU-  
 STINUS (r) — Haec porro ecclesiae auctoritas tanta est, ut ipse de se Lutherus fateatur: „Omni-  
 „bus argumentis superatis, unum vix, & non  
 „nisi aegerrime per gratiam Jesu Christi superare  
 „potui, audiendam scilicet ecclesiam. „ (s)

§. LXXXI.

---

(r) Conc. 3. in psal. 30. (s) in praefat. Tomi I. suorum operum.





## §. LXXXII.

Subsequitur principium Bahrdtii quintum  
pag. 12. cum priore connexum. „ Illa proinde do-  
„ gmata, inquit, veluti fons praecipuus reputan-  
„ tur grassantis ubique infidelitatis, quae ab aulis  
„ ad caulas usque protenditur, brevique religionem  
„ e mundo omnem pellet, ni malo per alia reme-  
„ dia, quam violenta & libertatem adfligentia suc-  
„ curratur. „ Bahrdtius. — Cui Semlerus: „ In  
„ primis falsum est, ullum uspiam Doctorem illa  
„ dogmata cogitantis cujusdam hominis conscien-  
„ tia velle obtrudere. Rara proin foret scrupulo-  
„ sitas, totam ideo rejicere religionem, quod illa  
„ symbolicis inserta legantur libris, ad trium prae-  
„ cise religionum differentiam stabilitis. pag. 42.  
„ Omnes equidem tres ecclesiae toleratae eidem vo-  
„ lunt revelatae per Jesum Christum religioni ad-  
„ haerere; at collecta a singulis dogmata nunquam  
„ fuere omnibus communia: neque omnes eidem  
„ capiti parent: neque sibi invicem, quantum ad  
„ judicia & conscientiam, subiecta sunt; sed illam  
„ sequuntur doctrinae normam, quam sui cujuslibet  
„ Doctores praetulere. Omnes itaque secundum  
„ inaequalitatem civilis conditionis provinciarum,  
„ urbium, atque doctorum differunt; omnes qui-  
„ dem christianae, at non omnes eadem doctrinae  
„ forma & libro praeditae, quod nullo non tempore  
„ unitas Idearum super iisdem objectis fuerit im-  
„ possibilis. Proinde una eademque religionis for-

H

ma

ma pro Christianis Europae omnibus introduci non potest, & sic abest periculum coactionis violentae, totiusque religionis e mundo pellendae. pag. 46. & 47. Demum intrepide adsero, Archichristianismum non dari, puta, identitatem unicam quoad conceptus dogmatum; quin potius existunt tot modificationes moralium Idearum, quot Doctores, qui secundum tempus & locum fuere diversi. Itaque continuo existent varia doctrinae systemata, necessario quidem, & absque ullo religionis propriae nocumento. pag. 48. Ita Semlerus.

### §. LXXXIII.

Et hoc sit Bahrdtium refutare? nimirum si hostem adjuvare sit eum vincere. Haut multis altercabor cum vulpe, qui seipsum prodidit. Nullus unquam Doctorum Christianorum praedicta dogmata humanis obtrusit conscientis; Tres Ecclesiae toleratae nec eandem doctrinam, nec idem caput habent; nec sibi invicem sunt subjectae; unitas Idearum & identitas quoad conceptus dogmaticos dari non potest ob locorum atque Doctorum diversitatem. Ergo recte concludet prudens quilibet cum Bahrdtio, hanc scissionem ecclesiarum ita necessariam, & ex ipsis dogmatibus, quae in praxin deduci non possunt, ortam esse fontem infidelitatis praecipuum; statuere poterit quilibet, religionem christianam non esse veram, quia regnum in seipso divisum; atque ideo brevi totam illam e mundo pellen-



pellendam, ni libertas conscientiae permittatur, ut saltem aliqui e prudentioribus adhuc genuinam invenire, sectarique valeant. — Quid quaeso ad huncce discursum Semlerus? quid alii e Protestantibus? aut concedant, unam tantum ex tribus sibi contradicentibus ecclesiis esse veram; aut si omnes sunt verae, pugnantia docet Christi ecclesia, & sic fons erit infidelitatis secuturæ; causa erit scepticismi, ac tandem religionis verae omnis ex orbe eliminandae. Prudentes enim viri scepticam religionem amplius nec docebunt, nec praedicabunt; sed unicum tandem esse remedium credent, ut liceat cuilibet pro suo modulo & ea, quam habet, perspicacia veram sibi religionem inquirere, & producere.

## §. LXXXIV.

Rumpat igitur denuo Bahrdtianae perfidiae filium ecclesia, quae sola vera est, Romano-catholica. Haec omnes reliquas a se excludit tanquam alienas; haec opus non habet aliquod sibi smigma tribuere ex adgregatione Protestantium; haec falsa reputat, quae contra se tuentur Calvinistae & Lutherani; haec sola in dogmatibus una, cum reliquae duae sint in se ipsis discissae; haec Romae docet, quod Corinthi; Viennae, quod Mediolani; cum Lutherica aliter in Saxonia doceat, quam in Borussia; Calvinistica aliter in Helvetia, quam in Hollandia. Non ergo Romanae Ecclesiae dogmata fons incredulitatis dicenda, non irreligionis fomentum, non

scepticismi occasio, non verae fidei exitium, non Libertinismi patrocinium. De Romana quippe ecclesia illud S. Cypriani (t) sumendum: „ hoc uni-  
 „ tatis sacramentum, hoc vinculum concordiae in-  
 „ separabiliter cohaerentis ostenditur; quando in E-  
 „ vangelio tunica Domini Jesu Christi non dividitur  
 „ omnino nec scinditur, sed fortientibus de veste  
 „ Christi, quis ipsam potius indueret, integra ve-  
 „ stis accipitur, & incorrupta atque individua tu-  
 „ nica possidetur. — Possidere non potest indumen-  
 „ tum Christi, qui scindit & dividit ecclesiam Chri-  
 „ sti. „ Si ergo Bahrdtius ad hoc unitatis centrum  
 respexisset; nisi Romanam ecclesiam catholicam,  
 uti etiam Semlerus audebat facere, cum duabus  
 reliquis toleratis conjunxisset; procul hinc fuisset  
 inutilis ipsius timor, ac libertina cavillatio: neque ea  
 adhuc quae sequuntur, tenuisset principia; Nam 6<sup>ta</sup>.

### §. LXXXV.

Ulterius dicit pag. 14. „ Evangelium aliter  
 „ longe, quam hucusque factum, operaretur san-  
 „ ctitatem hominum, ac emendationem, si ab om-  
 „ ni humanarum hypothesium & opinionum ex-  
 „ cremento purgaretur, & originariae suae puri-  
 „ tati redderetur ac simplicitati. „ Bahrdtius. —  
 „ Cui Semlerus: „ quid est originaria puritas Evan-  
 „ gelii & simplicitas? — Non est possibile, systema quod-  
 „ dam religionis completum omnium opinionum  
 „ efficere, quin hominibus eo ipso auferatur pro-  
 „ pria omnis judicandi potestas; hinc nunquam,  
 „ ne

---

(t) l. de Unit. Ecclesiae.



„ ne Jesu quidem aut Pauli tempore, alia doctrinae christianaе forma dabatur, quam quae permixta fuit propriae singulorum individuorum vi cogitandi, & adcommodata locali istorum situi. „ Unde in speciali quadam adplicatione iudicii ad hanc vel illam hypothesein e. g. de originali peccato & illius imputatione, de Divinitate Christi & Spiritus sancti, relinqui debet omnimoda libertas conscientiae: sicut Protestans Catholico & vicissim Catholicus Protestanti relinquere illam debet in doctrina de Eucharistia. Igitur frustraneus plane labor est de doctrina universalis li aut conscientiarum unione inducenda. „ pag. 58. & 59. „ Denique si ad veram & genuinam historiam respicio, puritatem Evangelii in sensu Bahrdtii acceptam, id est, purgatam ab hypotheseibus non invenio. Quod dixi, repeto: nec religionem, nec ecclesiam, nec libros scio, ubi purum illud aurum videri posset. — Libri nostri symbolici multo magis profunt coetaneis nostris, quam Veterum scripta, quae pro hominibus illius temporis serviebant. „ Ita Semlerus pag. 60.

## §. LXXXVI.

At enim quam nociva religioni est hujus auctoris responsio? ausim dicere, magis esse scandalosam, quam sit expressio Bahrdtii, atque ideo ad hunc revincendum neutiquam idoneam. Semlerus nec in sancta quidem antiquitate, nec Jesu



vel Pauli tempore, ullam novit religionem, ecclesiam aut librum ab omnibus omnino hypothesebus parum : doctrinam christianam nullam, quae non proprio individuorum iudicio disquiri potuit, & locali istorum situi adcommodata fuit. Loquitur autem hic author de hypothesebus & conceptibus utique dogmaticis, quales dantur e. g. de justificatione hominis, de Divinitate Christi & Spiritus sancti, de poenarum aeternitate; de his dicit impossibilem esse doctrinam universalem aut conscientiarum unionem, sed magis relinquendam libertatem velut in doctrina de Eucharistia relinquitur. — Bone Deus ! quam verum est effatum tuum : mentita est iniquitas sibi ! ergone tu talem per divinissimum Filium tuum, Ejusque Apostolos nobis dedisti religionem, in qua impossibile sit, ut sectatores illius in dogmaticis etiam conceptibus conveniant ? ergone ecclesia tua essentialiter est mater scepticismi ? ergone Filius tuus sanguine suo efficere non potuit, ut esset in mundo unum aliquod ovile & unus pastor ? hic divinus Salvator statim a principio promulgati a se Evangelii reliquerit illud singulorum individuorum iudicio, & locali regionum adcommodaverit situi ? aeterna veritas Christus, qui nil magis quam doctrinae unitatem intendit (horresco referens hanc sequelam) fautor ac promotor Theismi sit ? Patrum veterum & Conciliorum scripta minus utilia modernis hominibus, quam libri Protestantium doctrinales ? —

Cesso ;

Cesso ; nec enim dolor ulterius me finit eloqui. Bahrdtius Evangelicam puritatem saltem agnovit antiquitus datam, tametsi neget, impugnatos a se articulos tum temporis contineri, & hypotheses illorum dogmaticas penitus abfuisse adfirmet. At Semlerus hypotheses dogmatum illorum dubias jam Christi & Pauli tempore datas, & cujuslibet judicio relictas asserit ; proindeque puritas Evangelica & simplicitas locum ne tum quidem habuit. Jam lector judicet, num magis tolerari Semlerus, quam Bahrdtius debeat ?

## §. LXXXVII.

Quamquam cur istis viris succenseo ? Lutherani sunt, ideoque locuti secundum suae sectae principia. Protestantes enim jam hinc a Lutheri & Calvini tempore privatum jactare spiritum, nemo est, qui nesciat. Ex ipsis adeo Scripturae documentis probare contendunt, Deum fecisse omnibus licentiam etiam de dogmatibus judicandi. Non ergo fieri ullo modo potest, ut omnes diversae in se indolis ac judicii in suis conceptibus conveniant. Ergo vel dicendum, unitatem hanc ne fuisse quidem Christi tempore necessariam, quod Semlerus innuit ; vel certe dogmata illa de facto controversa ad primam illam ecclesiae doctrinam non pertinuisse, quod vult Bahrdtius. — Igitur jam denovo per quidquid sacrum vos obtestor D.D. Protestantes, privatum Spiritum tollite, unam in dogmatibus ecclesiam admittite, suam illi infallibilitatem



tem intactam relinquit; damnate Lutherum, & commilitones, ni velitis damnare Christum & Apostolos; ni schismaticam & in se ipsa divisam sentire malitis sectam vestram, obligate fideles vestros in conscientia, ut credant omnia, quae ipsis proponit ecclesia; quod cum ex defectu legitimorum & Apostolicorum ecclesiae vestrae praesulum praestare non possitis, ad aliam confugite, quae jam hinc ab Apostolis auctoritatem hanc se possidere commonstrat: vel Bahrdtio totum concedite, eumque tolerate. — Apud nos certe Catholicos nemo sibi de periculo deceptionis timeat; nam ut praeclare S. Epiphanius. (u) „ Termini nobis positi sunt & fundamenta, Apostolorum traditiones, „ & Scripturae sanctae, & successiones doctrinae; „ nemo decipiatur novis fabulis. „

### §. LXXXVIII.

Equidem nos ipsi concedimus, dari dogmata, de quibus inter fideles primitivae ecclesiae tam perspicue communiter non constabat. At propterea non sequitur, ea omnia, quae de facto credimus, non fuisse vel verbo Dei scripto, vel tradito revelata. Ipsae adeo haereses variis ortae temporibus famulabantur, ut ita dicam, ecclesiae; erat enim opus, ut illarum occasione multae fidei veritates jam clare proponerentur, de quibus antea fideles praesulum suorum iudicio adhaerentes non dubitabant. Eadem itaque nec plura, nec pauciora Chri-

---

(u) Haeref. 55.





Christi temporibus erant dogmata, quae nunc sunt, licet quoad nos necdum tam clare eliquata, sed ecclesiae primum iudicio declarata. Nimirum „ oportet esse haereses, ut fides habendo tentationem, „ habeat etiam probationem. „ *Tertullianus* (w) — Eja itaque acceptamus conditionem. Examinentur ad Evangelium, ac ecclesiae veteris traditionem ecclesiarum modernarum dogmata. Statuantur omnes tres in Imperio toleratae, Romano-catholica scilicet, Lutherica & calvinistica. Si ex illis nulla Evangelicam habeat unitatem & simplicitatem, teneatur nulla. Si aliqua illam participet, & doceat, quod antiqua docuit ecclesia; tunc illi adhaereatur. Id solum jure expetimus in hoc iudicio, quod pridem Tertullianus postulavit (x) scilicet „ non ad scripturas provocandum, nec in „ his constituendum certamen, in quibus aut nulla aut incerta victoria est, aut parum certa. — „ Id solum disputandum, quibus competat fides „ ipsa, cujus sint scripturae; a quo, & per quos, „ & quando, & quibus sit tradita disciplina; qua „ fiunt Christiani. „

### §. LXXXIX.

Principium Bahrdtii septimum in eo consistit, quod ipse moderni, ut vocat systematis religionem, quasi chaos immensum aspiciat, ad quod perquirendum vires prudentum necessariae sunt & animus. Sic adloquitur Caesarem pag. 15. „ Utinam



„ Majestas Vestra Caesarea a Deo ad id electa fo-  
 „ ret , ut omnes illos contra persecutionis rabiem  
 „ defenderet , qui vires habent & animum , pro  
 „ hac magna humanitatis necessitate laborandi ;  
 „ immensum chaos systematicae religionis perqui-  
 „ rendi ; & purum denique divinae ac salvificae  
 „ Christi religionis aurum extrahendi. „ Bahrdti-  
 „ us. — Quis ita exoptat ? respondeant lectores  
 „ ipsimet. O bone Deus ! si christiani nostri purum  
 „ divinae religionis aurum non reppererunt ; si  
 „ Doctores eorum , quos inter multi ferventissi-  
 „ mi amici Christi , & agnitores deprehenduntur  
 „ unter allen drey Partheyen , illud ipsis aurum o-  
 „ stendere hucusque nequiverunt , donec Bahrdtius  
 „ id ostenderit ; vae multis centum christianorum  
 „ millibus ! atque ad novam hanc reformationem  
 „ propugnandam Caesarea ipsa Majestas suam au-  
 „ thoritatem interponat ? proh arrogantia quanta,  
 „ & praecipitantia ! „ Semlerus pag. 61. & 62.

### §. XC.

Optime. At scilicet reponet Bahrdtius e Lu-  
 theri schola hanc se arrogantiam didicisse. Referam  
 Scholiarchae hujus fanatici verba : „ citra arro-  
 „ gantiam libere dixerim , per me sacram scriptu-  
 „ ram ita repurgatam , ita illustratam esse , ut  
 „ intra annos mille nunquam fuerit vel clarior ,  
 „ vel notior pluribus. „ ( z ) Videatur etiam illi-  
 us

---

( z ) Tom. 2. edit. Witteberg. per Joannem Lufft anno  
 1546. pag. 538.



us responsio ad Georgium Saxoniae Ducem, ubi non verebatur scribere: „Haec est mea gloria & „honor per gratiam Dei, quod a tempore Apostolorum nullus Doctor, nullus scriptor, nullus Jurista, nullus Theologus tam praeclare, „quam ego, conscientias hominum instruxerit & „consolatus sit; nec Augustinum, nec Ambrosium in hoc puncto pares mihi agnosco; in hoc „gloriosior ad Dei gratiam, & diaboli confusio- „nem. „(a) — Videant jam D. D. Protestantes, an Semlerus, an ipsi sine pudore resistant Bahrdtio. Bone Deus! numquid idem dici de Luthero potest? si intra annos mille Patres & cultores Christi ferventissimi, quibuscum etiam optimi e Protestantibus in comparatione non sunt, si inquam illi non reppererunt puram fidei doctrinam; vae multis centum Christianorum millibus! quid? „ali- „quos Marcionitas & Valentinianos (Lutheranos „& Calvinistas) liberanda veritas expectabat? in- „terea perperam evangelizabatur? perperam cre- „debatur? „Tertull. (b) — Non potestis mei Domini! non potestis Bahrdtium superare, nisi prompti sitis Lutherum vestrum condemnare. Missionem uterque eandem habet, scilicet nullam; Doctoratum uterque, sed male adplicatum; spiritum privatum uterque, at ludicrum. Dixi; nil deest Bahrdtio, quod Lutherus habuit, praeterquam protectores principes; hi si faverent, haberemus forte Lutherum alterum, Socinum, Pelagium, Arium.

§. XCI.

---

(a) Tom. 6. apud aurisab. (b) Cit. c. 28.



## §. XCI.

Sed enim Caesarem appellavit catholicum, veraeque ecclesiae praeceptis imbutum, quem suae religionis candor prohibet diabolicos Bahrdtii astus adprobare, nec lugubris illa temporum Epochae, grassante ac tumultuante Luthero data, cogit externe tolerare. Repudiat ille recipere instructionem fidei ab alienigena; recordatur nobiscum tamquam verae protector ecclesiae, quae Tertullianus scripsit: „nobis etsi quaerendum esset adhuc & „semper ( in rebus religionis ) ubi tamen quaeri „oportet ? apud haereticos ? ubi omnia extranea & adversaria nostrae veritati ; ad quos prohibemur accedere. Quis servus cibaria ab extraneo, ne dicam ab inimico Domini sui sperat ? quis miles ab infoederatis, ne dicam ab hostibus regibus, donarium & stipendium captat, nisi plane desertor & transfuga & rebellis ? Etiam anus illa intra tectum suum drachmam requirebat : etiam pulsator ille vicini januam tundebat : etiam vidua illa non inimicum, licet durum, judicem interpellabat. Nemo inde strui potest, unde destruitur. Nemo ab eo illuminatur, a quo contenebratur. Quaeramus ergo a nostro, & in nostris, & de nostro : idque duntaxat quod salva regula fidei in quaestionem potest devenire. „ ( c ) — Josephus II. gloriosus avorum Apostolicorum furculus patietur nunquam ; ut vera



ra sibi Imperatoris quondam Basilii sententia eximatur, qui in octava synodo sic loquebatur. „ de vobis laicis, tam qui in dignitatibus, quam qui absolute con-  
„ versamini, quid amplius dicam, non habeo,  
„ quam quia nullo modo vobis licet de ecclesiasticis  
„ causis sermonem movere, neque penitus  
„ resistere dignitati ecclesiasticae, & universali  
„ synodo adversari. Hoc enim, investigare &  
„ quaerere Patriarcharum, Pontificum. & sacerdotum est, qui regiminis officium sortiti sunt,  
„ qui sanctificandi, qui ligandi, & solvendi potestatem  
„ habent; qui ecclesiasticas & caelestes  
„ adepti sunt claves; non nostrum, qui pasci debemus,  
„ qui sanctificari, qui ligari vel a ligamento solvi egemus. „

## §. XCII.

Ad ultimum tandem Bahrdtii principium properemus; concludit praefationem: „ utinam sub  
„ supremo Majestatis Vestrae regimine dies illucescat,  
„ ubi in Europa christiana illi omnes reputarentur  
„ pro christianis, inque status & humanitatis  
„ juribus protegerentur, qui Jesum Christum venerantur,  
„ ipsiusque doctrinam confectantur; quin coacti sint  
„ amplius Cephianos, Paulianos, Papisticos, Calvinianos  
„ aut Lutheranos nuncupare, & super hominis verbo  
„ juramentum deponere. „ Bahrdtius. — „ Cui bono  
„ vota tam inutilia, tamque frustranea? reponit Semlerus.  
„ Jam pridem compertum est in Germania, illum esse  
„ Ch. i.



„ Christianum , qui colit Christum , ejusque do-  
 „ ctrinam sectatur. Sed & illud constat , eum-  
 „ dem Jesu Christi cultum , & imitationem do-  
 „ ctrinae diversitatem subire pro christianorum  
 „ varia localitate. Non itaque universalis & iden-  
 „ tica praescribi norma debet in Europa , cum li-  
 „ berum Christiano maneat , prout apud se convi-  
 „ ctus erit , loqui , & judicare. Eaeque  
 „ praescriptae religionum formulae propriam reli-  
 „ gionis praxin non praecipiunt , sed probatam  
 „ solum relate ad subditos directionem & instru-  
 „ ctionem continent. „ Ita ille pag. 63. &  
 „ 64. — „ Porro equis cogit nos , ut illa nomi-  
 „ na recipiamus , & nos Cephae , Pauli , Papae ,  
 „ Calvinii aut Lutheri esse dicamus ? quantum ad  
 „ conscientiam & propriam religionem dari ne-  
 „ quidem possunt haec nomina ; nullus eis hic  
 „ locus est. Ad externam tantum societatem il-  
 „ la pertinent. pag. 65. Demum perquam mira-  
 „ bile est Bahrtdtii gravamen , quod contra jura-  
 „ mentum de doctrinae norma tenenda deponi  
 „ solitum ingerit. Ubivis locorum juratur super  
 „ propositum quemdam ab hominibus contractum ;  
 „ num forte iniquum hoc est ? licet alicui subdito ,  
 „ secundum summam sibi propositam , verbatim eti-  
 „ am deponere juramentum ; licet jurare militi ad  
 „ praestitutas ipsi condiciones ; eccur id fieri ne-  
 „ queat super libris symbolicis , & norma doctri-  
 „ nae cuidam societati propria ? — Proxime forsi-

„ tan




„ tan caefarea etiam capitulatio , & folemnis Ma-  
 „ jeftatum ac principum affecuratio reformabitur .  
 „ quod & his fuper hominis verbo juretur ? „  
 pag. 67. & 68.

### §. XCIII.

Ducas lector benevole ! denuo paralellum,  
 Si quilibet cultus Chrifti , & confeftatio doctri-  
 nae illius christianum facit , fi pro locorum varie-  
 tate diverfus effe tam ille , quam ifta poteft ; fi  
 praefcriptae religionum formulae non funt prae-  
 ceptivae ; fi judicare non modo , fed loqui etiam  
 cuivis liberum eft , prout quilibet fecundum vide-  
 ri fuum fe convictum putat ; quid obftat etiam A-  
 rianos , Manichaeos , & Socinianos inter veros com-  
 putari christianos ? Ita fane Semlerus , nam inquit :  
 „ Ich laffe auch die Socinianer Chriften fern. „ pag.  
 63. Rurfus alio loco inquit : „ Marcioniten , Ba-  
 „ lentinianer , Arianer haben in den Grundfätzen des  
 „ inneren praktifchen Chriftenthums keine Irrthümer  
 „ gehabt , welche fie zu Unchriſten fo machen könn-  
 „ ten. — Die Neftorianifchen , Eutichianifchen ,  
 „ Monothelitifchen Streitigkeiten gehören ganz und  
 „ gar nicht hieher ; indem fie den Grund des Chris-  
 „ stenthums nicht berreffen , alfo dem Chriftenthum  
 „ nicht weſentlich find. — Wir wollen von nun an  
 „ die Haeretikos freylich anders beſchreiben , als in  
 „ der Zeit der Dummheit , und Finſterniß möglich  
 „ war. „ ( d ) Hercule ! in quo Semlerus a  
 Bahratio

---

( d ) Antwort auf die Freyburg. Diecenſion pag. 222



Bahrdtio differt? — Rursum; universalis & identica praescribi norma in Germania, teste Semlero, non potest; neque illa nomina ullam relationem habere ad forum internum possunt, sed ad externam duntaxat tranquillitatem pertinent. Ecce itaque in Europa non etiam tolerantur Sociniani, sicut Lutherani? nimirum quia his favent concordata? sed enim religioni Romano-catholicae non modo faverunt humanae factiones (quae & ipsae a Protestantibus illegitime primitus extortae sunt) sed ipsa etiam Apostolica antiquitas illam commendavit; & tamen prohi dolor! Lutheranis & Calvinianis sectas invehere novas licuit. — Denique ultimum Bahrdtii gravamen de juramento super symbolicis libris non deponendo mirabile dici nequitum debet; est enim Protestantismi principiis maxime consentaneum; quandoquidem

## §. XCIV.

Primarii etiam & plerique e Protestantibus modernis scholiarchae admittunt facile, ea quae in illis continentur libris, de se falsa esse absolute posse, & adhuc ulteriori Doctorum disquisitioni sub stare, posseque apud se quempiam aliter convictum reddi. Et quae so te, ad eone vilescit ipsis sancta juramenti religio, ut illud quispiam valeat super tali re aliqua deponere, quam incertam esse & forte falsam judicat? Si homo contraetum aliquem juramento firmet, quem semper timere debet, an physice, aut moraliter in conscientia servare





vare possit : si subditus quaedam adjuret puncta , de quorum aequitate dubitat : si religione se miles adstringat pro conditionibus , quas ambigit , malae ne sint , an bonae ; Num praeceptis adeo , divinaeque gloriae maxime praejudiciosum probabitur juramentum ? Atqui toties probatur a Protestantibus , quoties super fallibilibus de se articulis , aut libris symbolicis , aut ipsi jurant . aut alios jurare faciunt : Praetereaue dant licentiam , imo mandant , ut Doctor praedicet aliter , quam subinde sentit . Vide §§. 74. & 75.

### §. XCV.

Hoc sane pressi argumento jam pridem Calvinistae infallibilem suis synodis auctoritatem vindicare volebant ; uti refert Illustrissimus Bossuet (d) . Taceo synodum illorum Dordraci habitam , taceo Carentonensem in Gallia ab iis celebratam ; solam hic adduco Vitriensem , in qua Ecclesiae Calvinistarum peculiare solemni se juramenti religione obstrinxerant ad synodi nationalis definitiones acceptandas , „ ex firma persuasione , ut ibidem dicitur , quod Deus ei praesidebit , eamque in omni „ veritate & aequitate per verbi sui regulam diriget . „ — Ad hanc necessitatem etiam vos redigimini D. D. Lutherani ! Ni Confessioni Augustinae , ni conventibus vestris , in quibus confecti sunt concordiae & symbolorum libri , infallibilitatem

1

vindi-

---

(d) Expolit. Doctr. Christian, c. 20.



vindicetis , juramentum deponere non potestis. Atqui subinfero , aspiciite majores vestros , quin & Doctores Evangelicae vestrae ecclesiae passim omnes, qui alicujus nominis sunt ; nullus ex iis tantum sibi animi sumit , ut auctoritatem humanam agnosceret infallibilem ; imo si quispiam id facere vellet , contradiceret ecclesiae suae principiis , & statim alios plerosque severos experiretur adversarios , quos in Vitriensi Synodo Calvinistae sunt experti. Certe Semlerus ipse ecclesiae suae nomine profiteatur : „ Protestanten haben das Ansehen der Kirche , „ das ist , der Kirchenversammlungen , wie sie von „ Ecclesia gebraucht werden , nicht ferner so beybe- „ halten , wie in der Römischen Kirche es noch immer „ golt. Dieser Grundsatz , worauf der Protestant- „ tismus beruhet , ist seit Luthers Christen ganz „ ausgemacht ; Concilia sind für uns kein principi- „ um sciendi & docendi. „ (e) — Igitur vos ipsi concludite , qua fronte , quave audacia super Augustana Confessione , super libro concordiae & super aliis symbolis vestris , tanquam super humano mere verbo ( ut recte inquit Bahrdtius ) ullum deponere juramentum possitis ?

## §. XCVI.

At scilicet juramentum simile super humano mere verbo deponit Caesar quilibet noviter coronandus ? Adstringit se firmissima religione , quod ,  
tam

---

(e. Resp. ad recens. Friburg. pag. 197.



tam Protestantes velit in sua possessione defendere, quam Romanenses? Bene vero; sed edicite mei Domini! illudne facit Caesar in favorem religionis Protestanticae, an Romano-catholicae? Faceretne, nisi dura quadam necessitate compulsus, ne in veros Romanae ecclesiae filios majora mala incurrerent? Objectum juramenti Caesarei est tranquillitas publica, & unice verae religionis favor, propter quam tolerat Protestantes, qui vel ideo tales dicuntur, quod nolebant Catholicis acquiescere; donec suae capitulationi, & instrumentis publicis illum etiam de tuendis illorum sectis Paragraphum Imperator infereret. Valet itaque juramentum Caesareum ob bonum religionis Romano-catholicae, non item ob bonum Protestanticae. — Ut vera hic me scribere agnoscas, proferam verba ex capitulatione Caesarea Caroli Vti sub Art. 1mo:

„ So viel aber in diesem Artikel, den Stuhl zu Rom  
„ und Päpstl. Heiligkeit betrifft, wollen die der  
„ Augsburgerischen Confession zugethane Churfürsten  
„ vor sich und ihre Religions-Verwandte Fürsten  
„ und Stände Uns darmit nicht verbunden haben,  
„ gestatten dann auch gedachte Advocatia dem Reli-  
„ gion- und Profan- auch dem Münster- und Os-  
„ nabrückischen Friedens-Schluß zu Nachtheil nicht  
„ angezogen, noch gebrauchet, sondern denen obge-  
„ dachten Churfürsten und sammtlichen ihren Reli-  
„ gions-Verwandten im Reich gleicher Schuß ge-  
„ leistet werden solle; wie Wir ihnen Churfürsten



„ und sammtlichen ihren Religions-Verwandten  
 „ auch solches kraft dieses versprechen, und Uns hie-  
 „ mit darzu verbinden. „ (f) Ideo proinde prote-  
 ctionem suam ecclesiis Protestantibus adsecurat Cae-  
 sar, quod similem alias Romanae sedis & Ecclesiae  
 promitti non paterentur Principes A catholici. Est  
 itaque latissima disparitas Caesareum inter, & jura-  
 mentum Pastorum Lutheranorum. Infideles quos-  
 dam subditos ob verae religionis bonum tueri mere  
 extrinsece, nihil omnino mali habet; at praedica-  
 re ac docere doctrinam, quae de se falsa esse potest,  
 & contra quam sentire interne cuiusvis liceat, id  
 enimvero grande piaculum est, tale quidem, quale  
 datur periculum, ne perniciosi in religionem erro-  
 res publice aut invehantur, aut homines in illis  
 falso confirmantur.

## §. XCVII.

Quia in paritate illa de Caesareo juramento  
 tantopere Protestantes confidunt, juvat eos adhuc  
 isthoc ad hominem casu repellere. Eja, si Bahrd-  
 tius tantum subin roboris adquisivisset, ut in suam  
 etiam partem magnos quosdam Principes cum suis  
 subditis pertraheret; si dein gravissima orirentur  
 dissidia & bella, ita ut non jam soli Catholici; sed  
 ipsi etiam Protestantes in tristem detruderentur ne-  
 cessitatem, aut concedendi, quod cum suis vult  
 Bahrdtius, aut ulteriora & summe periculosa mala  
 Eccle-

---

(f) Art. 1. apud Vitriar.

Ecclesiae Christianae experiundi ; numquid liceret Principibus tam Catholicis , quam Protestantibus juratum inire foedus de Bahrdianis adfcelis & tolerandis & tanquam Romani Imperii membris defendendis ? — At vero cum perinde liceret Bahrdtio & ejus commilitonibus semet juramento adstringere ad Socinianam , Pelagianam & Arianam doctrinam populo publice tradendam ? — Illud prius in bonum Ecclesiae suae coacti faciunt Principes Catholici erga Lutheranos & Calvinistas : Posterius vero facere salva conscientia & conformiter suis propriis principiis nemo Protestantium potest. Legatur Confessio Augustana, in qua Art. 1<sup>mo</sup> de Deo Confessores hunc in modum loquuntur : „ Ecclesiae magno consensu apud nos docent, „ decretum Nicaenae Synodi, de unitate essentiae „ divinae, & de tribus personis, verum, & sine „ ulla dubitatione credendum esse. — Damnant „ omnes haereses contra hunc articulum exortas, „ ut Manichaeos, Valentinianos, Arianos, Eulomianos, Mahometistas, & omnes horum similis. Damnant & Samosatenos, veteres & „ neotericos, qui de Verbo & Spiritu sancto astute & impie rhetoricantur. „ (g) En itaque, ut haereticos alios tam veteres, quam neotericos condemnent Lutherani ! & qui fieri potest, ut a catholico Caesare Concilii Tridentini & Romanae Ecclesiae definitionibus se submittente Luthericam



sectam aut Calvinisticam pro conscientia jurato etiam adprobari, Protestantes contendunt?

## §. XCVIII.

Simus igitur boni, & scapham dicamus scapham. Subditus aliquis, qui in regno quodam praecise toleratur, non potest excipere, si novus denuo alius quispiam a Principe admittatur. Ergo neque religio praecise tolerata valet excipere contra aliquam noviter tolerandam. Sed sectae, Lutherana & Calvinistica, in Romano Imperio dicuntur toleratae, ut ipsi Protestantes dissiteri non possunt. Ergo non valent excipere contra Bahrtdium & ejus religionem. Sola proinde Ecclesia Romano-catholica est, quae sua se antiquissima possessione tuetur: sola quae dici mere tolerata nullatenus potest; esset enim imprudens Matrem ipsam dicere toleratam, quae, ne morigeris filiis nocumentum adferat, filios etiam degeneres in sua domo patitur: Sola, quae ante reformationis tempora Germaniam licite occupavit. Haec itaque sola loquatur, haec ingemiscat, haec queruletur contra Bahrtdium; haec illum proscribi, ejusque doctrinam subprimi, & malos astus evelli radicitus postulet. Ne vero Bahrdtius, sicut quondam Lutherus, Calvinus & eorundem adseclae, interitum visibilis ecclesiae pro sua reformatione praetendat, illud interea S. AUGUSTINI grave dictum intorqueo: „Illa ecclesia, „ quae fuit omnium gentium, jam non est, periit? „ Hoc dicunt (*Protestantes*) qui in illa non sunt.

„ O



„ O impudentem vocem ! illa non est , quia tu in  
 „ illa non es ? Vide , ne tu ideo non sis ; nam illa  
 „ erit , etsi tu non sis. . , ( h )



## Conclusio Operis.

### §. XCIX.

Cum jamjam ad finem mea vergat oratio , liceat  
 mihi amice Lector ! porro unicum adhuc ro-  
 gationem ad te ferre. Quid fiet , si D. D. Prote-  
 stantes suis inniti principiis pergant , & ab agno-  
 scenda ecclesiae auctoritate infallibili alienati ma-  
 neant ? Edicam , quod res est. Finis tandem erit  
 Luthèranismo , finis Calvinismo. — Non eget Ec-  
 clesia nostra Catholica sciolo quodam Procuratore ,  
 qui aliquod mansuetum , at ineptum schediasma  
 conscribat ad reuniendos A catholicos ; prout ante  
 biennium tentare ausus est scribillator quidam sub  
 Titulo : Erster Schritt zur Union. — Nequaquam ;  
 Ecclesia nostra de suis dogmatis remittere nihil po-  
 test. Id solum interea petit a filiis discolis. ut con-  
 cedant infallibilem auctoritatem. Quod ubi non  
 concefferint , finis Lutheranismi & Calvinismi ta-  
 men erit. Bahrdtius millenos brevi numerabit ,  
 imo jam actu numerat adseclas. „ Tausend und  
 „ abermal Tausend denken so wie ich. Tausend und



„ abermal Tausend wünschen, sehnen sich mit mir  
 „ nach Reforme, nach Freyheit; „ inquit ille in  
 sua professione ad Caesarem data sub finem. Plures  
 ejusmodi in sua ad Publicum declaratione idem  
 recenset, inter quos & Semlerum antagonistam  
 plane ludicrum. Addunt Protestantes tam Eccle-  
 siastici, quam seculares Consilarii in ihrem Gut-  
 achten über die Bahrdtische Sache, potuisse illis,  
 qui a Bahrdtio nominantur, plures adhuc alios  
 adjungi. Praecipueque huc spectare arbitror illos  
 recensentes, quorum ope Bibliotheca universalis  
 Berolini prodit, & qui plane nonaginta & ultra esse  
 feruntur, varie per Germaniam dispersi. (i)

### §. C.

Novissima de Ss. Librorum canone inter Prote-  
 stantes controversia, quid aliud indicat, quid aliud  
 probat, nisi religionem ipsorum esse secundam  
 Theismi matrem? Pervulgatum est apud eruditos,  
 ecquid nuperrime tentaverint Georgius Ludovicus  
 Oederus, Gymnasii Onoldini Rector, Joannes Sa-  
 lomon Semlerus, Halae Magdeburgi Professor,  
 Georgius Lud. Vogelius Magister, & adjunctus Ha-  
 lensis; quid denique alii? Hi non eo tantum pro-  
 gressi sunt, ut illos e Canone libros expungerent,  
 quos Lutherus ejusve commilitones: Verum pro  
 sua etiam libertate alios ab omnibus haecenus re-  
 ceptos sive textus, sive etiam libros demunt. Et  
 qui-

---

(i) Aloys. Merz Weihnacht, Predigt. Augsburg. 1780.



quidem de veteri Testamento censent, Libros historicos Judaeis datos vel omnino, vel partem maximam Christianis esse inutiles: Libris Josue, Judicum, Regum, Paralipomenon, Cantici. Canticorum, Ruth, Esdrae, Nehemiae, & novem postremis capitibus Ezechielis suam Theopneustiam abjudicant: denique e veteri Testamento illa duntaxat esse colligenda adfirmant, quae ad doctrinam morum & emendationem spectare videntur, cetera Judaeis relinguenda. Sed nec mitius agunt cum novi Testamenti libris; praeter illos enim, quos primi Lutheranorum scholiarchae rejecerunt, Epistolam Pauli ad Philemonem apocryphis accensent; addunt Apostolos immunes non fuisse a fermento, id est, inepta hebetum Hebraeorum doctrina, horumque se persuasionibus in scribendo adcomodasse: Perinde esse homini Christiano, remque videri adia-phoram, Historias in novo Testamento contentas sive credat, sive perneget. Quid multa? generatim adserunt, integrum esse Christiano cuivis, plures vel pauciores ex his, qui vulgo circumferuntur, scripturae libros ceu divinos profiteri; & Pythagorae, Socrati, Platoni inspirasse Deum, aequae ac Prophetis rerum utilium cognitionem, ut adpellari possint Prophetiae. quoniam sicut hos, ita illos Providentia Divina direxit, ut ratione sua recte uterentur. (k)

I 5

§. CI.

(k) *Diarium: Die neueste Diction des Begebenheiten mit unpartheiischen Anmerkungen für das Jahr 1778. 3. Stück a pag. 176. & Christ. Franc. Walchini.*



## §. CI.

Equidem haud me clam est, quantopere sciolis ejusmodi e suo sinu oriundis restiterint alii eruditi Protestantes, veluti Jeremias Frid. Reussius Acad. Tubing. Cancellarius, Christianus Frid. Schmidius Wittenb. Acad. Professor, Joannes Paul. Commerellius, Superintendens in Ducatu Würtembergico, Petrus Andreas Müllerus, Halae Adjunctus, nunc Professor in Acad. Buzoviensi, Joannes Rud. Pideritius Theologiae Professor in Collegio Castellano; queis alios accensere plures possem. (1) Hi omnes strenue laborarunt in confutando novaturientes suos in religione collegas; imo illis etiam libris Theopneustiam vindicant, quos Martinus Lutherus, Chemnitius aliique anteriores Sectarii plenis buccis exploserant; ipsam adeo Apocalypsim alias tantopere Protestantibus exosam doctis lucubrationibus, & prolata in medium Veterum Patrum traditione maxime contra Semlerum tuentur. — Sed enim qui hanc inter Protestantes litem intelligo, simul eos omnes in turbido piscari, & Bahrtdium plicatis in sinu manibus ridere mihi videor. Ad Hermeneutices regulas scriptum Dei verbum accipi; ex stylo, antiquitate, doctrina, miraculis, & Veterum testimoniis Theopneustiam agnosci debere, adierunt passim omnes. Contra; humanam quamdam auctoritatem in his exponendis infallibilem, proin

---

(1) Commentat historic. Constantiae edita 1780.



proin Conciliorum decisiones irrefragabiles etiam circa dogmata existere, denuo negant cum Lockio passim omnes. Audi jam Lector benevole, quid concludam !

## §. CII.

Protestantium quilibet alteri, Bahrdtius Semlero, Semlerus Reussio potest oggerere: *Per quam vicin transfuit Spiritus a me, ut loqueretur tibi?* Ecce mihi in tanta scientiarum ac artis criticae luce, dum certiora suppetunt linguarum, quas Oriens colit, hermeneutices sacrae, aliarumque disciplinarum subsidia, non liceat, recudere Canonem, mutare, addere, demere, atque libris qui positi sunt in Canone vulgari, divinitatem abjudicare? Ecce non licet addubitare dogmata meae etiam Ecclesiae recepta, illaque perquirere, impugnare, refecare? Poterant homines errandi periculo obnoxii, rudes, ac in multis vel superstitiosi, vel ultra modum bardi multa de Canone expungere; licuit Lutheri, Calvini, Zwinglio; quis mihi licentiam denegabit? Saltem haereticus non evado, etsi contra sensum Ecclesiae meae receptissimum sive Arii, sive Socini, sive Manetis, sive Mahometis in judicando partes teneam; scrutentur alii collegae mei veritatem sicut ego, & invenient sicut ego; etiam totum corpus Evangelicorum & Protestantium errare potest, sicut errasse constat, cum modo communiter in Ss. Librorum censum recipiunt Apocalypsim, Epistolas Judae, Jacobi, Pauli



Pauli ad Hebraeos, aliasque Scripturae partes, quas primi cum Luthero Reformatores passim omnes repudiarunt. Certe alii rursus e Protestantibus legant fieri debere, ut scripturae Canon mutetur; uti Joannes Henricus Majus, Professor Theol. in Academ. Gieslensi Dissert. 3. de modo consignati Canonis ubi ait: „ Ex Disputationibus Protestantium contra Pontificios patet, Ecclesiae non licere Canonem sibi concinnare; sed Deo auctori relinquendum hoc Privilegium esse. „ Idem sensit Joannes Frickius apud Ulmeneses Theol. Professor in Comment. Theol. crit. de cura Ecclesiae veteris circa Canonem S. Scripturae §. 3. qui inscribitur: Canonis divina origo. Idem Joannes Enslus in Bibliotheca sacra. Amstell. 1710. — Rideat Bahrdtius quantum potest, seque in ecclesia sua Protestantica id adsecutum gaudcat, quod exoptavit, scilicet libertatem conscientiae ac Theismi patrocinium. Rideat, non eos tantum, quos ipse recenset, commilitones nactum se fuisse, sed etiam alios de Ecclesia sua quam plurimos; uti Christianum Tobiam Dammium Berolinensem, Töllnerum & Steinbardium Francosurtenses ad Viadrum, Lüdkiū, Spaldingium, Bassedovium, Eberhardum, Lessingium, aliosque ejusdem farinae, homines incredulos, rerum novarum Studiosos, suisque scriptis de Christiana republica pessime meritos.



## §. CIII.

Nos etiam Romano - Catholicos ad risum commovet, at simul dolet isthoc Protestantium inter se vitilitigium. Finis est igitur Lutheranismus & Calvinismus! plaudant Catholici. Sed progressus maximus est Theismo ac Tolerantismo! Doleant. Certe Basiedovius & Pideritius, Doctissimi Protestantes, hocce periculum suae Sectae imminens, sine quidem spiritu prophetico ipsimet prospiciunt, deque eo solícite suos admonent. Verum qui haec tristia Pseudo - Reformatorum monumenta conspícimus, unice verae Ecclesiae nostrae, quae ex tot haeresibus illam infestantibus pulchrior semper ac nobilior eminet, laudes necítamus, & encomia. „ Conditio enim praesentium temporum etiam hanc admonitionem provocat nostram, non oportere nos mirati super haereses istas, sive quia sunt; futurae enim praenunciabantur: sive quia fidem quorundam subvertunt; ad hoc enim sunt, ut fides habendo tentionem habeat etiam probationem. „ (m) — Non timet sibi Ecclesia Catholica juxta promissionem Christi in aevum permanfura; extollat licet saevus coluber perfidiae Theisticae caput, inconcussa stabit illa semper. *Est domus aedificata supra petram, & descendit pluvia; & venerunt flumina, & flaverunt venti, & irruerunt in illam domum,*  
 &

---

(m) L. de Praescript. c. 1.




*Et non cecidit; fundata enim erat supra firmam petram.* (n) „ Ex tunc & deinceps non defuit „ genus Christianum, nec fides de terra, nec „ charitas de Ecclesia. — Nec verbositate Philosophorum, nec cavillationibus Haereticorum, „ nec gladiis Persecutorum potuit ista, aut poterit aliquando separari a charitate Dei, quae est „ in Christo Jesu. „ (o)

---

(n) Matth. 7. v. 25.

(o) S. Bernardus sup. Cantic. c. 3.

O. A. M. D. Gl.



PO-

# POSITIONES

## *Ex Theologia universa.*

### DEUS unus ac trinus.

I. **E**os, qui dicunt in corde suo: non est DEUS, plane desipere, aspectabilis hujus mundi machina luculenter ostendit,

II. Ut adeo Entis cujusdam summi existentia ab homine rationis compote ad longius saltem tempus sub omni praedicato Divino sine culpa nequeat ignorari.

III. Porro si DEUS est, unicus sit necesse est; ex ipsa enim hoc Entis summi notione patenter desumitur.


IV. Ex eodem principio fluit, DEUM independentem prorsus esse, sibi que soli sufficientissimum;

V. Nullos igitur, quos Sociniani & Vorstius Calvinista fingunt, perfectionis habet limites, nullos temporum aut locorum terminos:

VI. Ab aevo in aevum semper idem sine ulla mutatione perseverat;

VII. Cumque haec omnia per identitatem habere melius sit, quam per compositionem quamlibet aut unionem, DEO detrahunt, qui omnimodam ei simplicitatem inesse negant;

VIII.



VIII. Atque perfectionem hanc DEI splendissimam tametsi nec caeci Antropomorphitae, nec Iulsci viderint Abbas Joachimus & Gilbertus Porretanus: Agnoverunt tamen Melito Sardenfis, Epiphanius cum Patribus ceteris, unicum forte, neque hunc certo. Tertullianum si denas.

IX. Commendatissima inter perfectiones Divinas in scripturis occurrit praescientia, & futurorum etiam contingentium praevisio infallibilis,

X. Sine quidem humanae libertatis dispendio; *sicut enim tu memoria tua non cogis facta esse, quae praeterierunt, sic DEUS praescientia sua non cogit facienda esse, quae futura sunt.*

XI. Ineptiunt porro cum Libertinis Haeretici, qui praescientiam aut libertatem ideo praecise negant, quod utramque mathematice, ut ita loquar, inter se combinari non cernant.

XII. Nec minus in Ss. Paginis fere singulis divina nobis misericordia commendatur, quam nobis practice monstrat voluntas DEI seria salvandi omnes homines,

XIII. Quae ad parvulos etiam se extendit sine baptismo denatos, pro quibus paucorum dierum hominibus etiam mortuus est Christus.

XIV. Est porro haec voluntas salvandi omnes etsi iusta respectu omnium, non aequalis tamen;

XV. Heinc certorum duntaxat hominum datur praedestinatio, quam cum Augustino recte dicas praescientiam & praeparationem beneficiorum DEI, qui.





quibus certissime liberantur, quicumque liberantur;

XVI. Et est efficax omnino, infallibilis, & immutabilis.

XVII. Praecipue vero huc referendum est Ss. Trinitatis mysterium, circa quod frustra laborant ostendere repugnantiam Sabelliani, Tritheitae, Sociniani, ceterique Trinitatis hostes;

XVIII. DEUM enim uti unum in natura, ita trium in personis esse, varie & invicte confirmatur;

XIX. Ex quibus non tantum Pater, sed & Verbum est verus DEUS, ejusdem cum illo substantiae;

XX. Quem a Patre, & quidem solo procedere pridem definiverunt Nicaeni Patres, & Lateranenses;

XXI. Sed & Spiritus sancti divinitas tot Conciliorum oraculis in scriptura fundatissimis enunciata est, ut horrendae blasphemiae reus sit, qui negaverit;

XXII. Procedit autem ille a Patre & Filio, simul adorandus, conglorificandusque.

XXIII. Haec totidem dogmata, quot verba; ut adeo Semlerus, Arianam de Ss. Trinitate controversiam inter ecclesiasticas tantum quaestiones referens, ea confessione ulcus suum satis detexerit.



## Angelus & Homo.

XXIV. Angelos esse aliquos in rerum natura contra Hermannum Riswichium & Libertinos novimus ex fide, & multis adparuisse scriptum legimus; nec inde dubitare fas nobis est.

XXV. Porro Angelus officii nomen est, non naturae. Quaeris nomen hujus naturae? Spiritus est; quaeris officium? Angelus est. Unde pure spirituales esse naturam angelicam, contra Rudolphum Cudworthum, & quosdam Leibnitianos tuemur.

XXVI. Non tamen eam naturaliter vim habent Spiritus hi purissimi, ut occulta quaeque, futura, & mysteriosa ipsi pervideant.

XXVII. Praeter gratiae statum, in quo sunt conditi, libertatem a Deo acceperunt naturalem; prout lugubris malorum Angelorum lapsus in peccatum demonstrat,

XXVIII. Quem brevi post casus e caelo secutus est, atque illorum ad inferos detrusio;

XXIX. Ubi tamen non sic eos detineri, quasi non habeant aliqui ex ipsis inde egrediendi facultatem, & continuo in terris vagentur, Apostolica fides docet,

XXX. Ex qua habetur, nedum ante Christi adventum, sed etiam post illum, infestationibus Daemonum exponi humanum genus tam in anima, quam in corpore ac fortunis;

XXXI.



XXXI. Unde ridemus authorem Daemologiae biblicae, qui contra Scripturae apertos textus, contra unanimem Patrum sensum, erronee prorsus ac temerarie negare id ausus fuit;

XXXII. Sed & Semlerum Hallensem temnimus authoris istius fautorem, qui doctrinam omnem de Daemoniacis in speciali dissertatione adorsus est, & cum Rousseauvio illud Gerasenorum de obsessis in Evangelio exemplum exhibilat, Ss. Patrum contemptor ac insultator frivolus; & vel in hoc Martini Lutheri discipulus:

XXXIII. Nocere tamen daemon plus non potest, quam illi DEUS infinite providus permiserit; qui simul eo misericors erga nos est, ut cuilibet peculiarem deputet custodem Angelum: nec ab hac gratia probabilius excludat infideles ipsos ac reprobos.

XXXIV. Angelo dignitate succedit Homo, qui insita sibi a natura propensione in beatitudinem fertur. Atque id dolendum maxime, quod dignitatis suae oblitus in transitoriis plerumque bonis suam reponat felicitatem;

XXXV. Cum tamen anhelare deberet DEUM, in patria per intuitivam illius visionem & amorem fruitivum pacifice possidendum.

XXXVI. Et mirum quod hominum corda nec coeli gaudiis moveantur, nec inferni deterreantur suppliciis; cum tamen & haec, & illa perpetuo & absque ullo fine duratura, fides doceat:



istaque de aeternitate veritas nec ipsos adeo sic dictos Spiritus fortes esse quietos permittat ;

XXXVII. Scilicet abesse optant infernum , quo liberius in sceleribus volutentur : sicut cum Basilide antiquo haeretico & Sadducaeis abesse volunt corporum resurrectionem ; quae tamen nimis certo & evidenter ventura in Scripturis praedicitur ,

XXXVIII. Et quam Christus reali sua, veraque post mortem resurrectione , tot ante seculis , possibilem esse monstravit ; incassum huic mysterio Theistis obstrepentibus , qui in carne Christum amplius nolunt credere , tametsi insignia adeo dentur momenta , quanta vix pro alio religionis mysterio reperiess.

XXXIX. Interea usque ad extremum iudicii diem homines , quibus adhuc luendum de culpa levi , vel poena ex peccatis residua supereft , ad eum amandantur locum , qui aptissimo , & diuturno Ecclesiae usu consecrato nomine Purgatorium contra Sectarios dicitur ;

XL. Ubi cum plene purgatae fuerint animae , statim ad coelestem admittuntur beatitudinem , sicut illae post mortem illico caelum conscendunt , quae amplius nihil habent , quod luant ;

XLI. Testantur veritatem hanc tot Beati , quos Ecclesia in Sanctorum retulit numerum ; quibus cultum publicum , honoresque deferri tanto magis licet , quanto etiam fide divina credi potest ,

eos



eos rite canonizatos in coelesti cum DEO gloria existeret.

XLII. Ad beatitudinem vero gloriamque illam aeternam homo enititur, & ab eadem defleat per humanos actus, quorum tamen essentia secum vehit, ut voluntarii sint, liberi, atque morales;

XLIII. Voluntarii autem non sunt, si ponantur ex ignorantia prorsus invincibili, qualis dari non tantum circa facta, sed etiam circa leges & jura potest; in ipsis adeo praeceptis naturae remotioribus.

XLIV. Neque moraliter liberi sunt actus, nisi qui procedant ab indifferentiae libertate; quae contra haereticos tam eliquata est veritas, ut nulla doctorum paucitas, nulla indoctorum turba dissentiat.

XLV. Regulam porro moralitatis proximam, sicut aliam non dicimus, nisi conscientiam nostram practice judicantem: ita remotam in aeterna DEI lege reponimus;

XLVI. Impie contra id, & incassum sentiente Hobbesio, qui honesti atque inhonesti regulam in humani Legislatoris praeceptis, principumque voluntate repositam cupit.

## Lex aeterna & naturalis.

XLVII. Porro sicut moralitatis, ita omnis pariter justae legis norma & radix eadem lex aeterna DEI est, . . .

XLVIII.



XLVIII. Quae in sensu latiore sumpta ea dicitur, qua iustum est, ut omnia sint ordinatissima: in sensu autem strictiore & huc magis conveniente est primum illud & generale principium: praesta, quod debes.

XLIX. Ab hac lege robur suum, & formalem obligandi vim accipit Lex naturalis, essentialiter immutabilis, quae officia quaelibet Deo, sibi, & proximo debita moderatur.

L. Ab hac item Leges positivae omnes quoad suam vim & energiam dependent; illaque efficit, ut parere humanis etiam Legislatoribus teneamur, tam Ecclesiasticis, quam Politicis.

LI. Et quam pulchre non consulit bonis corporis, fortunae, & famae? Praesta, quod debes Deo, tibi, & proximo;

LII. Non ergo insoles in jus DEI, supremi vitae necisque Domini, ut te ipsum interimas, quantumcunque evitare temporale incommodum perinde posses;

LIII. Non occidas proximum, consentientem licet, nisi tibi tanquam personae publicae in corpus alterius jus suum DEUS commiserit;

LIV. Autoritate privata alteri homini vitam nunquam adimas, nisi cum is adgressor iniqus vitae tuae est;

LV. Quantorumlibet bonorum defensio, sive fortunae, sive famae, sive denique pudicitiae fuerint,



rint, privato tibi jus gladii non conceditur ad necem altetius;

LVI. Ut adeo duellorum licentia, praeterquam quod ineptum per se illa medium fuit, etiam tunc effroenis maneat, quando agitur de servandis cum honore fortunis;

LVII. Sed nec forniceris; nam data divinitus matrimonii indissolubilis lege, fornicatio omnis accessus est ad non suam, jure naturae eodem modo prohibitus, sicut furtum facta rerum divisione.

LVIII. Nec obstat, si quacum forniceris, persona consentiat; neque enim haec cedere potest jure, quod a Deo non habet; sicut fere pupillus, quae ad ipsum spectant res, arbitrarie in contractum dare alteri non potest;

LIX. Rursus alte fata lege illa aeterna Dei contrectare prohiberis aliena fortunae bona: vel ubi contrectaveris, denuo reddes; sub obligatione gravi quidem, si quantitatem notabilem vel simul, vel per partes advertenter tulisti;

LX. Sub levi autem, quando levem furatus es rem; aut de se gravem quidem, at ex culpa tantum levi accepisti, & plane jam absumpsisti;

LXI. Quidquid enim forte sentiant alii, nos intrepide affirmamus tanquam legi naturae conformius, grave damnum levi culpa datum debere quidem totum reparari, ita tamen, ut haec totum reddendi obligatio culpaе aequalis, id est, nonnisi levis existat;

LXII.



LXVIII. In ipsam statim gratiae notionem turpiter impegnerunt Lutherus & Bajus, integrae naturae decora hominibus debita adfirmando.

LXIX. Dum vero celebre isthoc gratiae exemplum in protoparentibus admiramur, dolenter simul agnoscimus, quid stante illa potuerit humanae voluntatis arbitrium.

LXX. Quandoquidem in peccatum prolapsae primae illae divinarum maruum creaturae, Adam & Eva, non sibi tantum solis nocuerunt, sed ut Tridentinum ait, acceptam a Deo iustitiam & nobis perdidierunt, qui omnes scriptura teste in peccato concipimur.

LXXI. Neque aliquid solantur calamitatem nostram Socinus, Joannes Clericus, & Hugo Grotius; etsi enim AUGUSTINO vade nihil antiquo peccato ad intelligendum secretius sit; nihil tamen eodem ad praedicandum est notius. Rei sumus; in Adam omnes peccavimus;

LXXII. Neque ab hac labe immunes se arbitrentur Praeadamitae, quorum perniciosam fabulam post Jordanum Brunum Isaacus La Peyrere Calvinianus recoxit; hominum enim nullus fuit unquam, qui ab Adamo non descenderet.

LXXIII. Solam itaque praeter Christum exceptam volumus a peccato Beatissimam Virginem, quam ne uno quidem momento agnoscimus fuisse servam diaboli; & licet Erasmus Rotterodamus hanc de immaculata Conceptione quaestionem su-





perfluam judicaverit , altum tamen clamamus cum eruditissimo Idiota : *Immaculata Virgo , in qua macula peccati sive mortalis . sive venialis , sive originalis , nec est , nec erit , nec unquam fuit !*

LXXIV. Certe postquam cultu publico immaculatam Virginis conceptionem prosequitur ecclesia ( usus est S. THOMAS hoc argumento ad tuendam sanctam Virginis nativitatem ) silentio aeterno involvatur contraria , & jam antiquata opinio , cujus tenebras Spiritus S. dispulit , etsi nondum ita plene ac perfecte , ut quaestio sit in fidei luce.

LXXV. Nos vero ceteri homines per originale peccatum usque adeo sumus vulnerati , ut supernaturalis reparatrix gratia omnibus necessaria sit ad salutem :

LXXVI. Atque eadem quidem ad omnem actum salutarem , ac ad ipsum fidei initium , & pium credulitatis affectum requiratur ; uti contra haereticos ab Ecclesia definitum est.

LXXVII. Quin & hujus necessitatem gratiae non modo ad facienda bona , sed ad cavenda etiam mala sic extendimus , ut ne legem quidem naturalem integram , illius destituti auxilio , diutius observare possimus ;

LXXVIII. Absit vero , ut perinde cum Bajani loquamur , liberum hominis arbitrium sine gratia DEI nonnisi ad peccandum valere , adfirmantibus.

LXXIX.



**LXXIX.** Dari autem post originalem etiam casum vere, relative, mere tamen sufficientem gratiam, evidentissimum scripturae dogma est; quod tot tamque acerbae Judaeis, incredulis, & peccatoribus intentatae minae, & exprobationes commonstrant;

**LXXX.** Neque illa justis ad perseverantiam deest, uti tenet Ecclesia contra Jansenium, qui nullo apertius prodit virus, quam cum scribit: S. PETRI exemplo, aliisque multis, quotidie manifestum esse, tentari ultra, quam possint sufficere.

**LXXXI.** Neque haec DEI beneficentia ad solos restringitur justos, & praedestinos; etiam peccatoribus similia gratiae auxilia ad agendam poenitentiam opportuno tempore elargitur.

**LXXXII.** Porro in ipsa statim gratiae sufficientis notione cum errent Lutherus, Calvinus, & Jansenius, quid mirum, si de gratia — etiam efficaci hallucinentur?

**LXXXIII.** Priores quidem duo de stiva homines systema gratiae nonnisi cum palpabili libertatis humanae praejudicio conceperunt; humana inquiunt, voluntas in medio posita est, ceu jumentum: si infederit Satan, vult & vadit, quo vult Satan: si infederit DEUS, vult & vadit, quo vult DEUS;

**LXXXIV.** A qua sane doctrina ideo solum differt Jansenius, quod ad efficaciam gratiae describendam non e stabulo, sed ex officina sumpsit



rit paritatem , notissima scilicet sua balance fucum faciens.

LXXXV. De qua haftenus , gratia actualis ordinatur ad habitualement seu sanctificantem ; sine qua in vanum gloriantur Sectarii de fide sua speciali promissionum , veluti sola justificante : in vanum de iustitia Christi ab extraneo imputata.

LXXXVI. Sicut absque hac gratia de condigno vitae aeternae meritoria opera nostra non sunt : Ita praesente illa mereri omnino coronam iustitiae possumus , quam reddet nobis DEUS in illa die iustus Iudex.

## Christus Reparator.

LXXXVII. Per Christum vero duntaxat ad salutem nobis aditus patet , quem ut pium omnium Samaritanum advenisse praecipuum Religionis dogma est ; sic autem de illo discurremus :

LXXXVIII. Propria post mortem virtute surrexit JESUS Nazarenus : ergo incarnatus est DEUS. Nemo amplius nisi vel imprudenter , vel impudenter contra hanc illationem excipiat ;

LXXXIX. Maxime cum idem Christus verum se DEUM esse , centies testatus sit ; atque testimonium hoc fide saltem tanta dignissimum esse , agnoscere Theistae debeant , quantam historia undequaque certissima promeretur ;

XC. Cumque eosdem prorsus caracteres in Christo deprehendi , eadem perhibeat historia Evangelii-



gelica, qui in sacris veteris testamenti libris de Messia futuro exprimuntur; excaecationi Judaeorum duntaxat adscribendum, si Christum verum esse Messiam negent.

XCI. Hoc certe aliae adhuc persuadere ipsis deberent notae, ac circumstantiae, quas varia produnt vaticinia in alio nemine, quam in Christo completa;

XCII. Hoc Patriarchae Jacobi percelebre vaticinium; hoc notissima Danielis Prophetia prae ceteris commonstrat.

XCIII. Procul hinc igitur, procul este prophani! Christum esse verum Messiam, historise saltem certissimum est: ut quis ergo amplius audeat, elato supercilio vel incarnationis impugnare convenientiam, vel possibilitatem arrodere?

XCIV. Cum itaque Messiae, seu Christi divinitatem totae personent utriusque Testamenti paginae; justissime prorsus a Nicaenis Patribus contrita fuit Arianorum insania; & cum his Laelius & Faustus Sociniani, Theistaeque moderni pridem sunt praedamnati.

XCV. Sed & vera Christi humanitas contra Haereticos alios constanter fuit, invicteque per Ecclesiam vindicata; ipseque pridem Christus discipulis suis ad videndum se & palpandum exhibens, illos Phantasiastas confutavit;

XCVI. Verbum igitur caro factum est; non quod caro sine anima, & verbum loco animae fuerit;



rit ; sed veram animam , veramque carnem Christus assumpsit ;

XCVII. Istamque non aliunde , non de nihilo , sed materna traxit ex carne ; *misit enim DEUS Filium suum factum ex muliere ;*

XCVIII. Ex quo tamen scripturae loco non nisi sacrilege intulit Ebion , Christum communi ceterorum hominum more conceptum fuisse : Nam incarnatus ille fuit de Spiritu sancto ;

XCIX. Jovinianus item pessime conclusit , Christum ex muliere , adeoque non ex Virgine natum ; hunc enim prius Isaias erroris convicit : *Ecce Virgo concipiet & pariet ;*

C. Sicut etiam Helvidium Virginitatem saltem post partum inique denegantem uno ore abominantur Ss. Patres , qui tanquam fontem illum signatum , hortum conclusum MARIAM depraedicant.

CI. Ulterius filii , matrisque honorem laesit Nestorius , qui & haereseos legitime postulatus , & ab Ephesina synodo canonice fuit damnatus ; quidquid post tredecim secula Basnagius , Albertinus , alique Calviniana faece ebrii in contrarium inussitent , quois accedit sectae Protestanticae recens oraculum Laurentius Moshemius.

CII. Itaque & unam in Christo personam , & Beatissimam Virginem MARIAM veram DEI Matrem , atque *θεοδοξον* fide firma tuemur ; neque mox dictum patimur Moshemium , qui aequis ait ,  
disc-



disceptari armis posse, uter pejus de re Christiana senferit, Cyrillus, an Nestorius?

CIII. Sed & Eutychen vecordem illum ac bardum senem a Chalcedonenſi ſynodo legitime condemnatum profiteſmur, duabusque in Chriſto naturis inconfuſis, & ſublata nuſquam differentia impermixtis fideli manu ſubſcribimus;

CIV. Et licet Eutychetis haereſin Monothelitae recoxerint, unam nonniſi voluntatem ac operationem in Chriſto adſtruentes; contra tamen fortiffime decertarunt Romanum & Conſtantinopolitanum tertium Concilia, in quibus duplex Chriſti voluntas fuit definita;

CV. Conſectarium modo eſt; cum una in Chriſto detur perſona, natura duplex, atque voluntas, dari quoque mutuam proprietatum communionem;

CVI. Non ſic tamen, ut etiam in abſtracto locum habeat; prout liberaliter nimium faber Stapulenſis cum Luthero, Brentio, & omni Ubiquiſtarum grege tuetur;

CVII. Omnes itaque honorificent Filium, ſicut honorificant Patrem. Omnes una adoratione Verbum incarnatum cum propria carne adorent. Supremum patriae cultum, qui negaverit Deo Homini, anathema ſit;

CVIII. Cultum vero Duliae ſanctis adſerimus cum Chriſto regnantibus; eosque invocari a nobis convenienter poſſe citra ullum divini Mediatoris praejudicium firmiter credimus,

CIX.



CIX. Meritoque profitemur cum Tridentino, Sanctorum imagines asservandas, eorumque reliquias esse venerandas;

CX. Neque Lutheranos curamus, aliosque Sectarios, qui extinctam Iconoclastarum haeresim rursus e cineribus suscitaverunt, frustra de Francofordiensi Concilio, aut libris Carolinis pro se gloriantes.

## Religio & Ecclesia.

CXI. Veram aliquam dari debere Religionem, Atheus nisi fuerit, nemo negat;

CXII. Ex vera autem religione illico concludimus ad existentiam revelatae, quam insanissimus Theistarum grex toto cupit orbe eliminatam;

CXIII. Cumque revelata evidenter possit esse supernaturalis, hinc in meridie caecutiunt, qui e religionis revelatae, veraeque censu illam excludunt, quae supernaturalia continet; eo praecise ex capite, quod ea supra humanum captum sint;

CXIV. Facebant igitur increduli, legem imprimis veterem Hebraeorum vel tanquam malam criminari, vel conviciari tanquam superfluum, cum illa sui authorem habeat DEUM revelantem,

CXV. Facebant ex variis Patriarcharum & Prophetarum factis aliquam illi maculam adspargere, aut ejus divinitatem impetere, imitantes quoad hoc Faustum, & Adimantum, quos pridem deprecos dedit S. AUGUSTINUS;

CXVI.



**CXVI.** Porro cum lex illa vetus de se centies testetur, fore aliquando per Messiam in perfectius commutandam, ac adimplendam, cumque verum Messiam esse Christum alibi luculenter demonstratur; ideo infallibiliter quoque certum est, de facto religioni Judaicae aliam esse substitutam;

**CXVII.** Haud sane aliam, nisi christianam, pro cuius solius credibilitate evidenti tanta depugnant rationum momenta, ut eorum luminibus nec Jac. Rousseau, nec Voltaire, nec alii quidam Angli Blountus, Bolingbrokiius, Tintalus & Morganus obstruere possint:

**CXVIII.** Cum autem haec religio & unice salvificam, & perpetuam, & semper visibilem se manere adtestetur; ecquis de perpetua ejusdem visibilitate, qua durat in Ecclesia semper visibili, amplius dubitet?

**CXIX.** Quodsi durat in Ecclesia visibili, dari Notas quasdam & characteres oportet, ex quibus discerni ab omnibus ipsa haec Ecclesia valeat;

**CXX.** Quid vero obstat, quo minus in illas quatuor Notas compromittamus, quas Concilium Constantinopolitanum I. recenset, Unam vocans veram Christi Ecclesiam, Sanctam, Catholicam, & Apostolicam?

**CXXI.** Prodeant jam Theistae nedum, sed Haeretici, & ostendant, ubinam omnes hae quatuor Notae simul sumptae adhuc reperiantur, nisi apud solam Ecclesiam Romano-catholicam?

L

CXXII.





CXXII. Igitur evidenter credibile esse conficitur, Solam hanc esse, quae veram Christi religionem factam testam habeat, colat, atque conservet; atque ideo sola Ecclesia Romano-Catholica prae ceteris, utcunque se Christianas jactitent; credenda est ac sectanda.

CXXIII. Porro cum ii, qui illam ingrediuntur & sectantur, certam ac infallibilem habere debeant credendorum regulam.

CXXIV. Neque de hac regula fidelibus aliunde, nisi ex declaratione hujus ipsius Ecclesiae, constare certo & infallibiliter possit:

CXXV. Necessè est, ut Ecclesia Romano-Catholica infallibilis Magistra sit in proponenda & adplicanda hac fidei regula;

CXXVI. Cumque illa tanquam adaequatam fidei regulam proponat tum S. Scripturam, tum etiam divinas traditiones.

CXXVII. Hinc omnia, quae in Verbo DEI seu scripto, seu tradito continentur, a fidelibus credenda sunt juxta sensum sanctae Matris Ecclesiae:

CXXVIII. In qua cum Christus infallibilem quemdam circa fidei & religionis controversias judicem constituerit,

CXXIX. Qualis tamen judex scriptura ipsa, Traditio, spiritus privatus neque seorsim, neque simul esse possunt:

CXXX. Illa ipsa Ecclesia, sicuti Magistra, ita etiam est controversiarum fidei & religionis judex infallibilis,

CXXXI.



CXXXI. Puta, tam in decidendis fidei quaestionibus, ob suam unitatem; quam in condendis morum decretis ad generalem totius Ecclesiae disciplinam spectantibus, ob suam sanctitatem;

CXXXII. Et quidem sive in oecumenico concilio congregata, sive per orbem dispersa consenserit, infallibili eadem docendi, judicandive potestate potitur;

CXXXIII. Ita tamen, ut haec potestas in Ecclesia solis privative Episcopis de jure ordinario competat; nullatenus vero populo aut Principibus laicis, quos non nemo haud ita pridem ut Patres proposuit, Episcopos vero tantum ut Moderatores.


CXXXIV. Hoc equidem verum, Episcopos illam decidendi facultatem cum subordinatione non nisi erga Romanum Pontificem obtinere;

CXXXV. Soli quippe Petro Primatus verae jurisdictionis competeat in universam Ecclesiam;

CXXXVI. Qui cum alium in Primatu Successorem constituere ex lege Christi fundamentali debuerit, Romanum determinavit Episcopum, cujus in rebus fidei ac morum potior est consensus praeter ceteris omnibus per orbem Episcopis;

CXXXVII. Ita ut horum judicium sive intra, sive extra Concilium consentientium sine illius consensu finale ac supremum non sit;

CXXXVIII. Ocyus autem finale ac decisivum fiat consentiente Papa, sive plures sint, qui eidem adhaereant, sive multi, sive pauci;



**CXXXIX.** Sicut tamen aliquos Episcopos sibi consentientes habere Pontifex semper debet, ut finaliter judicet: ita vi ipsius promissionis Christi metaphysice implicat, ut decretorium Papae iudicium in caussa fidei vel morum generalium usque adeo sit singulare, ut omnibus prorsus Episcoporum suffragiis sit destitutum;

**CXL.** Heinc dicere, quod Pontifex e Cathedra loquens erraverit haftenus, vel errare possit, est dicere, quod vel decepta fuerit, vel decipi possit in rebus fidei & morum una, sancta, & universalis Ecclesia;

**CXLI.** Cujus utpote fideles Decretis Romanae Sedis finalibus ut quamprimum pareant, jure divino strictissime sunt obligati.

## Sacramenta in genere.

**CXLII.** Dantur in Ecclesia verae religionis pignora, nimirum Sacramenta. Est autem Sacramentum novae legis signum visibile invisibilis gratiae a Christo Domino permanenter institutum, per quod non significetur tantum gratia, sed producat;

**CXLIII.** Unde istam Sacramenta ex opere operato conferunt, quod quidem cum Sectariis aliis negat Lutherus, omnem sacrorum signaculorum vim soli fidei in verbum promissionis erronee tribuens;

**CXLIV.** Ex quo falsissimo principio alter consequitur eorundem error, quo in administratione  
Sacra-



**Sacramentorum verba requirunt concionalia, cum tamen ea consecratoria esse oporteat.**

**CXLV.** Nunquam vero minus sibi constant **Sectarii**, quam ubi agitur de **Sacramentorum numero**. Nos secundum avitam **Ecclesiae** tum **graecae**, tum **latinae** traditionem contra **Lutheranos**, **Calvinianos**, & **Zwinglianos** septem statuimus;

**CXLVI.** Ex quibus tria sunt, nempe **Baptismus**, **Confirmatio**, & **Ordo**, quae **Characterem** imprimunt indelebilem, inter novella commenta **scholastica** inique prorsus a **Kemnitio** relatum.

**CXLVII.** Tribus autem singula perficiuntur **Sacramenta**, rebus tanquam **materia**, verbis tanquam **forma**, & **intentione Ministri**; ubi de ultima praesertim **Sectarii a Catholicis** dissident;

**CXLVIII.** Nam cum **Catholici** ad **Sacramenti** valorem seriam in **Ministro** requirant **intentionem** faciendi, quod facit **Ecclesia**, **Martinus Lutherus** fictam etiam & mimicam **Sacramentorum** administrationem probat.

**CXLIX.** Eo etiam extendimus **intentionis** necessitatem, ut **externam** solum absque **interna** contra **Catharinum** & **Serrium** adseramus nequaquam sufficere.

**XL.** **Fides** vero ad **Sacramenti** valorem in **Ministro** non requiritur, uti pridem in **caussa SS. Cypriani**, & **Firmiliani** universa definivit & agnovit **Ecclesia**;



CLI. Multo minus ad eundem valorem requiri Ministri probitatem, id est, sanctitatem, sive statum gratiae contra Waldenses, Albigenes, Wiclephitas ac Anabaptistas defendimus.

CLII. Porro facultatem ministrandi omnia Ecclesiae Sacramenta baptizatis omnibus esse concessam, nullo sane fundamento contendit Lutherus ad eam omnino infaniam prolapsus, ut ipsi etiam diabolus fecerit celebrandi & absolvendi copiam.

## Sacramenta Mortuorum.

CLIII. Primum inter Sacramenta spectando ordinem est Baptismus, cujus indeclinabilem vel in re, vel in voto necessitatem abunde docet vel unum illud oraculum Divinum: *Nisi quis renatus fuerit ex aqua & Spiritu sancto, non potest introire in Regnum DEI;*

CLIV. Ex quo recte intulit AUGUSTINUS: Noli credere, nec dicere, nec docere, infantes antequam baptizentur, morte praevenitos, pervenire posse ad originalium indulgentiam peccatorum, si vis esse Catholicus;

CLV. Recte item Origines docet, quod Ecclesia inde traditionem ab Apostolis acceperit etiam parvulis dandi baptismum, quam vel ipsi Protestantes traditionibus tantopere inimici coguntur admittere;

CLVI. Unde nec probamus Cajetani sententiam, quae tenet, parvulos sine baptismo denatos salvari fidelium parentum fide posse.

CLVII.



CLVII. Materia Baptismi sicut est omnis & sola aqua naturalis : ita ad validam ejusdem formam requiritur expressa & distincta invocatio personarum SS. Trinitatis : unde vel nunquam valuit, vel certe nunc amplius non valet Baptismus in solo JESU nomine collatus.

CLVIII. Alterum Mortuorum Sacramentum est Poenitentiae omnibus post baptismum graviter lapsis , & ipsum vel in re , vel in voto necessarium :

CLIX. Ex parte poenitentis contritionem cordis , Confessionem peccatorum , & satisfaciendi animum : Ex parte vero Sacerdotis absolutionem ex ipsa Christi voluntate sanctissima requirens.

CLX. In hoc igitur Sacramento Christus Ecclesiae suae concessit potestatem vere remittendi peccata , eamque universalem , cum Apostolos , eorumque in munere Successores , sui ipsius Vicarios reliquit tanquam Praesides & Judices ;

CLXI. Quod quidem iudicium cum sine Confessione peccatorum distincta fieri haud posse palam sit , Ecclesia catholica ex traditione semper agnovit , Confessionem illam jure divino esse necessariam ;

CLXII. Ut adeo distinctae Confessionis usus primis jam inde seculis ad nos derivatus fuerit ; non institutus primum seculo decimo tertio ab Innocentio , ut fabulatur Dallaeus : neque abrogatus a Nestario , ut Calvinus Dallaci Magister contendit ;



CLXIII. Atque ut omnis cavillandi occasio Sectariis praeccludatur, non distinctam modo, sed secretam etiam & auricularem, ut vocant, soli factam sacerdoti in usu semper fuisse, ex perspicuis Veterum monumentis ostendimus.

CLXIV. Falluntur tamen illi, qui sola confessione contenti, contritionem parum curant; fuit enim quovis tempore contritionis motus ad poenitentiam summe necessarius;

CLXV. Extra Sacramentum quidem ea solum, quae ex amore DEI perfecto procedit, infallibiliter justificat contritio & requiritur;

CLXVI. Intra Sacramentum vero saltem imperfecta adsit, necesse est, puta talis, quae initialem DEI amorem secum vehat, & quidem benevolum:

CLXVII. Nec enim amor merae concupiscentiae sufficit, nec adtritio ex gehennae & poenarum metu concepta praestice tuta est,

CLXVIII. Tametsi ista actus ceteroqui bonus, honestus, ac laudabilis sit, voluntatemque graviter peccandi possit excludere.

CLXIX. Licet per Sacramentum hoc valide susceptum unacum culpa etiam aeterna remittatur poena, valde tamen acerbus debet esse dolor, dispositio poenitentis admodum fervida, si quis omnem sibi poenam temporalem remitti velit;

CLXX. Unde denuo in acceptis Christo referre maximopere debemus, quod infirmitatem



nostram volens sublevare , Ecclesiae suae Indulgentiarum potestatem concesserit ,

CLXXI. Quarum usum continua Ecclesiae praxis confirmat ; quaeque Christiano populo sunt maxime salutares , & vivis per modum absolutionis : defunctis saltem per modum suffragii fructificant.

## Sacramenta Vivorum.

CLXXII. Augustissimam Eucharistiam illi solummodo verum negant esse Sacramentum , qui in scelerum luto volutati , & siliquas cum porcis vorantes , nolunt sanctissimo Agni immaculati corpore & sanguine saginari ;

CLXXIII. Nam in divinissimo hoc Sacramento Christum vere , realiter , ac substantialiter non tantum in signo ac figura , aut per energiam praesentem esse , contra Sacramentarios tum verba promissionis , ac institutionis , tum avita traditio luculenter demonstrant ;

CLXXIV. Praesens igitur est Christus totus , ac integer , non , ut Novatores somniant , una cum panis & vini substantia , seu per impanationem , sed per mirabilem panis & vini in corpus & sanguinem Christi ( remanentibus duntaxat speciebus ) conversionem , quam aptissime transubstantiationem appellat Ecclesia.

CLXXV. Est autem Christus totus sub panis , totus item sub vini speciebus ; unde iis , qui non





sacrificant, utramque speciem neque necessitate Sacramenti, neque praecepti divini esse necessariam, agnoscere deberent Sectarii, ni jam primitivam Ecclesiam in re summi momenti turpiter errasse velint;

**CLXXVI.** Porro Eucharistia non tantum est Sacramentum, sed & verum ac proprium sacrificium, quod in Missa Deo offertur. In sacrificio hoc incruento Christus, qui est Sacerdos secundum ordinem Melehisedech, id est, & Sacerdos suae victimae, & victima sui Sacerdotii, uti **S. PAULINUS** observat.

**CLXXVII.** Alterum Vivorum Sacramentum est Confirmatio, per quam baptizatis Spiritus S. gratia confertur tum ad firmiter credendum, tum ad ipsam fidem intrepide profitendam, ut contra Novatores, maxime Dallaeum Calvinistam, Scriptura ostendit autoritate Conciliorum, & Patrum declarata.

**CLXXVIII.** In maxima virorum gravissimorum dissensione circa materiam hujus Sacramenti nobis verisimilior videtur sententia, quae tenet, materiam remotam esse Chrisma ex oleo & Balsamo confectum, & ab Episcopo benedictum: Unctionem vero Chrismatis materiam proximam & adaequatam;

**CLXXIX.** Impositio manus autem, de qua in Scriptura & Patribus legitur, quod ab unctione distincta intelligi debeat, adeo non probatur, ut indistin-



distinctam potius intelligamus cum INNOCENTIO IIIto ; per frontis Chrismationem manus impositio designatur , quae alio nomine dicitur Confirmatio.

CXXXX. Sacramentum Vivorum tertium , & poenitentiae consummativum est Extrema Unctio , quae , prout juxta ritum Ecclesiae Catholicae administratur , verum est Sacramentum a Christo Domino institutum ,

CLXXXI. Ut delicta , siquae adhuc sint expianda , ac peccati reliquias abstergat , & aegroti animam alleviet , & confirmet — — — & sanitatem corporis interdum , ubi saluti animae expedierit , consequatur ; verba sunt Tridentini Concilii.

CLXXXII. Adhibetur autem eo in Sacramento sanctum oleum , non tantum ab effectu ita dictum , sed etiam a benedictione , quam habet , quamque immerito ridet Calvinus , cum eandem exhibeant antiquissima latinarum Ecclesiarum Pontificalia , & Graecorum quoque Euchologium a Goario editum.

CLXXXIII. Extrema vero unctio inde adpellatur , quia inter unctiones in Ecclesia usitatas omnium postrema esse solet , nonnisi vere infirmis ad mortem conferenda ; neque enim pro se quidquam luçantur Calviniani ex Graecorum , non infirmos quoque ungentium consuetudine , quam Arcadius , ipse graecus , acriter insectatur ; excusat autem Goarius , unctiones istas tantummodo ceremoniales dicendo.

CLXXXIV.



**CLXXXIV.** Ordo, quo nomine illa intelligitur consecratio, per quam stabilis potestas confertur ad exercenda munia Ecclesiastica, ac praecipue ad Sacramenta conficienda, est paritet novae Legis Sacramentum.

**CLXXXV.** Ut vero sacrum hoc ministerium dignius obeatur, sacris ministris, nimirum Episcopis, Presbyteris, & Diaconis Ecclesiae latinae imposita est lex continentiae, in Ecclesia latina semper, in Graeca saltem primis seculis sancte servata, non quidem jure divino, at Apostolico & Ecclesiastico;

**CLXXXVI.** Et quamquam post Trullanam Synodum a pristinis moribus, legibusque desciverit orientalis Ecclesia; nunquam tamen ministris suis, aut post ordinationem ad nuptias convolare, aut Episcopis post consecrationem matrimonio prius contracto uti concessit.

**CLXXXVII.** Circa Subdiaconos non ita constans in Ecclesia disciplina & praxis viguit, uti de Subdiaconis Siciliae & Calabriae patet, quibus usum conjugii ante ordinationem contracti S. GREGORIUS M. permisit.

**CLXXXVIII.** Inanes vero sunt Lutheri, Calvini, & Protestantium criminationes, quibus legem continentiae carpunt, quasi naturali, divinoque juri contrariam; postquam & Christus & Paulus virginitatem tantis encomiis praedica-  
 runt:

Atque



Atque ante Clericatum omnibus liberum sit, ut qui se non continent, nubant & in seculo remaneant.

**CLXXXIX.** Sicut vero Clerici a carnis illecebris, ita etiam a bonis fortunæ eorum animus abstractus esse debet: quamvis enim illos habere possessiones temporales tam licite, quam valide posse in comperto sit;

**CXC.** Ita quidem, ut bonorum justo titulo profano acquisite perfecti fiant Domini, neque illa ex justitia erogare ullatenus in causas pias teneantur;

**CXCI.** In bonis tamen sacro titulo acceptis, quantum ad superflua, non majus habent dominium, quam haeres quispiam in legata pia Testamento inserta:


**CXCII.** Quae proin tamdiu debent usibus piis adplicare, quamdiu in particulari quodam casu licentiam disponendi ad usus profanos Ecclesia (in quam fideles sua bona offerentes liberam disponendi facultatem ex aequo transtulerunt) ipsis non concesserit.

**CXCIII.** Septimum tandem Sacramentum est Matrimonium, quod ut magnum in Christo & Ecclesia semper celebratum est, cuique sacram semper benedictionem adhiberi solitam fuisse, ecclesiastica demonstrat traditio.

**CXCIV.** Hujus porro Sacramenti ministrum esse Sacerdotem, tanquam legitimum dispensatorem mysteriorum DEI, probabilior sententia sustinet;



net; agit enim Sacerdos ut Minister Christi, ejusque nomine benedicit conjugibus, quo. ut ait S. Martyr IGNATIUS, *nuptiae sint secundum Dominum, & non secundum cupiditatem.*



## EX THEOLOGIA POSITIVA

### A. *Theses Prolegomenae.*

I **R**evelatae Religionis regula prima & norma est codex ille venerandus, quem graece *ἁγία τὰ βιβλία*, latine *Scripturam sacram* vulgo vocamus; atque contra Deistarum & Libertinorum impugnationes authenticam, id est, ab omni suppositionis suspitione immunem, vindicamus.

II. Cui authenticae non obstat, Imo quod de quorundam sacrorum librorum *Auctoribus* dubitemus; de quorundam vero Scriptoribus primis nihil omnino certi constare fateamur. Nec ideo quod Esdras soluta captivitate Babylonica sacros libros restaurasse, atque etiam *nova characterum* forma donasse dicatur. Uti nec III<sup>do</sup> quod in sacris voluminibus plurium librorum mentio fiat, quorum nullum jam superest exemplar. Nec denique obstant authenticae sacrorum voluminum IV<sup>to</sup> alia, quae a revelatae ac proin omnis verae Religionis hostibus ex ipsa librorum istorum materia tela cuduntur.

III. Sacra igitur haec & summe veneranda Scriptura, sicut *ornatu & elegantia styli* nulli profanorum librorum cedit; ita *vetustatis gloria, & auctoris & rerum contentarum nobilitate, & veritatis indeficientis praerogativa*, omnes,



nes , quotquot fuerunt aut sunt , libros longissime superat ; quidquid in contrarium afferant, quos aut ignorantia intellectu , aut perversitas seculi veri saporis gustu privavit. Quibus

IV. *Exempli gratia* edicimus , omnia fere vel *Poeseos* genera in divinis voluminibus suppetere , ita ut ne quidem *Dramaticum* , imo nec *Idyllicum* praetermissum sit , nec *Epigrammaticum* ; sed neque illa elegantia excepta , quae a *pedum numeris* gratiam versibus conciliare consuevit. Quod *Eloquentiae* sacrae vis usque ad divisionem animae , compagumque ac medullarum pertingat , Deum testem habemus.

V. Inter caeteras autem sacrae Scripturae proprietates praecipue suspicienda venit *Divinitas* , quam nullus *Error* exauctorat , nulla dehonestat *falsitas* , *antilogia* nulla dedecorat : Ita quidem , ut omnia in scripturis contenta sint verum & merum Dei verbum. Ad quod tamen necessarium non esse putamus , ut omnes omnino propositiones vel omnino singula verba theographis immediate dictata esse dicantur ; sed sufficere , si multa quidem vel pleraque verbo tenus dictata : aliqua tamen speciali tantum impulsu & assistentia Spiritus sancti scripta esse teneamus.

VI. Alia sacrae Scripturae proprietas est mira ejusdem *obscuritas* , quae tamen Divinitatis radiis adeo non obsistit , ut eos amabili simul & tremendo fulgore vel amplius collustret. Atque hoc ideo , quia obscuritatis hujus Causa non est distantis infirmitas , aut scribentis imperitia malitiave ; Sed rerum , quae ibi referuntur , *sublimitas* ; scientiarum , quae attinguntur , *vastitas* ; & stupenda prae omnibus humanis literis *profunditas*.

VII. Porro profunditas ista ortum habet ab admirabili sacrarum Scripturarum *foecunditate*. Haec autem confi-



consistit in notissima illa & multiplici *sensuum varietate*; quos tamen omnes commode ad duo genera restringimus, *literalem* scilicet & *mysticum*. *Parabolicum* ad *literalem* referimus; mere autem *accommodatitium* seu *commaticum* ut a sacro textu alienum credimus, ita ejus usum a sacro maxime suggestu juste imus eliminatum.

VIII. Obscuritatis tenebras dispellit, mediante *gratiae* maxime *fidei* lumine, sacrae *Hermeneuticae* debita applicatio: quam vero qui paucis, ut Tychonius & multi alii, regulis comprehendi posse putant, parum se callere probant.

IX. Complexio omnium sacrorum librorum Ecclesiae auctoritate munita *Kanon* dicitur. Alius fuit *Esdrius* in veteri; alius est *Ecclesiae Christianae* Catholicae in novo testamento, quem, quidquid obganniant Sectarii, recte constituit Concilium Tridentinum, septuaginta duobus libris constantem. Discrimen autem, quod aliqui faciunt, inter libros *Protocanonicos* & *Deuterocanonicos* nominale quidem, non vero reale agnoscimus.

X. Quoniam Deo verbum suum primitus consignari placuit *linguis* partim *hebraica*, partim *graeca* tantum; pauca vero etiam *chaldaica*, & non nulla fortasse etiam *arabica*, ut adeo non omnia ab Hagiographis conscripta omnibus gentibus usui communi esse possent; & multa nullis; Hinc Divina Providentia, quae omnes homines voluit in cognitionem veritatis venire, opportunis temporibus & locis excitavit viros, qui Originalia scripta in alias linguas transfunderent; Atque inde habemus *Versiones* varias tam *Orientales*, quam *Occidentales*, quibus fideliter, atque ad fontium sensum elaboratis eadem fides haberi debet ac fontibus; sicut & Apographis *Scripturarum* ad Authographorum fidem diligenter exactis.

XI.



**XL.** Inter complures *Versiones orientales* merito primas semper tenuit *Vulgata graeca*, quae A. M. circiter 3735; ante Christum fere 265. sumptibus Ptolomaei Philadelphi Regis Aegypti a LXXII. Interpretibus non sine divinae aspirationis miraculo fuit adornata, etiamli modus & temporis spatium. aliaque illius celebratissimi confectus adjuncta omnino explorata & indubitata non habeantur.

**XII.** Inter innumeras *Versiones* in linguas occidentales factas sola jam eminet *Vulgata latina*, quam Concilium Tridentinum jure merito declaravit *authenticam*, id est, fontibus quoad rem saltem conformem & nullo praetextu repudiabilem. Ex quo patet, quod per hoc Concilii Tridentini decretum fontium auctoritati nullatenus fuerit derogatum; dummodo nemo praesumat *Vulgatam* rejicere, aut illam privata auctoritate ad fontes corrigere.


**XIII.** *Diviso S. Scripturae* hodierna tam in hebraicis, quam in graecis, quam in latinis codicibus in *Capita*, & *Capitum* in *Versus* non sunt ab Hagiographis; sicuti nec libri *Apocryphi*, *Praefationes*, ac *notae Hieronymi*; nec *Bullae Pontificum*, nec *tituli Capitum*, nec *verba explicationis* causla quandoque addita, nec denique *notae marginales*, quae in codice Bibliorum inserta leguntur.

## B. *Theses Practicae.*

**XIV.** *Adam & Eva* primi omnium hominum parentes, licet suo & totius generis humani damno gravissime deliquerint, vere poenitentes, salutem consecuti sunt. Neutiquam vero eorum filius *Cain*, ut impie asseriebant Cainitae haeretici. Ejus vero nepos pessimus *Lamech* primus bigamus accepit duas uxores contra institutionem matrimonii.

**XV.** Ex eo, quod DEUS *Genes. 9. 1. benedixerit Noe* & *Filiis ejus* imperite ac injustissime ab Heterodoxis, fugillantur Canonicae de Clericorum continentia leges. Quinimo ipsius *Noe* tam tempore diluvii, quam per reliquos CCCL. quos supervixerat, annos mira continentia haud obscure ex S. Scriptura colligitur.





XVI. *Melchizedek* Gen. 14. non fuit *Spiritus Sanctus*, non *aeternus Dei Filius*; nec *Angelus*; nec *nova aliqua Persona* a Deo creata, & postea iterum in caelum recepta, ut orthodoxae Religionis adversarii somniarunt; sed verus homo ex Adamo descendens. Isque probabilius non fuit *Sem*, multo minus *Cham*, nec sanctus *Enoch*; & neque, ut aliqui Judaei delirabant, *homo spurius*; sed homo Chanaanæus Rex Hierosolymæ, inter medios Idololatrias veri Dei Sacerdos sanctus, cujus Genealogia in Scripturis non extat.


XVII. *Diluvii Genes.* 7. Causa non fuit Cometa Whistonis Philosophi; sed miraculosus Dei vindicantis effectus. Idque universale, non tantum Hebraeos delens, ut Isaac de Pereira, Vossius & alii Præadamitarum Patroni commenti sunt.

XVIII. *Doctrina & veritas* (hebraice *Urim & Tummim*) Exod. 28. 30. distinctum aliquid fuisse teneamus a *Rationali* iudicii, quod summus Sacerdos in pectore gestabat. Deum item exinde consulenti Pontifici responsa dedisse non per miraculosum splendorem lapillorum aut literarum lapillis insculptarum; nec voce articulata; sed per internam revelationem, sicut Prophetis loqui solebat. *Ephod*, quod Gedeon *Judic.* 8. 27. ex præda aurea fecit, atque Israeli in ruinam cessisse dicitur, non fuit Idololum: proinde nec Gedeon illud faciendo peccavit.

XIX. *Samson*, de quo *Judic.* 14. *seq.* fuit figura Christi. *Job* non peccavit graviter peccato desperationis, nec blasphemiae. De Salute *Heli* I. Reg. 3. desperandum non est: multo minus de salute *Salomonis* Regis.

XX. Christi *Genealogia*, quam S. Matthæus recenset, non est vitiosa, nec S. Lucae repugnans. Christus itaque verus Abrahæ & Davidis filius; qui in monte oliveti orans sanguine sudavit, & in cruce moriens solem miraculosa & universali eclipsi veluti compatiens habuit.

XXI. Sancti illi, de quibus *Matth.* 27. v. 53. non statim ab obitu Christi, sed post Ejus Resurrectionem surrexerunt.



rexerunt ; & quidem ad vitam denuo ponendam. Ex illis. *Joan.* ult. v. 22. verbis : *sic eum volo manere* , minus recte nonnulli intulerunt Joannem a communi mortaliū lege fuisse exemptum.

Apostolus I. Cor. 15. 29. *Baptismus pro mortuis* non approbat ; sed ex ea consuetudine argumentum ad hominem , ut vocamus , adornat. *Praedictio Christi* , de qua Petrus ep. I c. 3. v. 20. non in inferno damnatorum , sed in limbo Patrum contigit , tanquam faustum liberationis suae nuntium. Eodem Petro teste , ep. 2. c. 3. v. 10. *Mundus per ignem* interibit.

### C. *Ex Linguis Sacris.*

XXII. Sicut verissime dictum est a S. Augustino L. 2. de Doctrina Christiana c. 11. *Latinae quidem linguae homines , quos nunc instruendos suscepimus , duarum aliis ( seu alis ) ad Scripturarum Divinarum cognitionem habent opus , hebraea scilicet & graeca — ut ad exemplaria praecedentia recurratur ;* Ita sapientissime Clemens V. in Concilio Vienensi ( ut habetur Clem. 1. de Magistris ) constituit , ut in scholis & studiis universalibus provideatur de magistris catholicis , qui habeant linguarum sacrarum notitiam. Non enim tantum ad splendorem Ecclesiae facit , sed interest & fama illius , esse in Ecclesia Dei , praesertim in Academiis orthodoxis , qui per se ipsi judicare ac respondere de Verbo Dei ex linguis primaevis possint.

XXIII. Imo viros hoc in genere doctos ut aliquos esse necesse est ; ita multos optabile. Unde non vituperiis , sed summis plane laudibus digni sunt Principes , Universitatum fundatores & supremi rectores , qui hoc maxime tempore sacrationes honorum academicorum gradus & titulos conferri nolunt sua culpa omni linguarum sacrarum notitia destitutis.

XXIV. Fons Hebraicus licet sphalmatibus non careat , notabiliter tamen & ex malitia a Judaeorum Rabinis , sive ab Haereticis , sive a Catholicis corruptum esse qui asserit , plus ait , quam probare possit. Sed & Masorethae *punctorum vocalium* inventores gratiam , non convitia a nobis meriti sunt , quamquam pronuntiatione vocalium a LXX. Interpretibus eos subinde discrepare non negemus.



XXV. Ex sola *elementorum hebraicorum* recta cognitione ostendi potest 1. Nomen Dei *τετραγραμματον* *יהוה* male pronuntiari a multis penultima correpta. 2. Non recte scribi *Matthias* unico *t*; 3. aut *Satan* per *th*. 4. *Johannes* rectius cum *h*; & *Bethlehem* minus recte cum *h*. simplici 6. Ineptissime legi *Levathan* antepenultima producta; sicut & 7. *Ephrata* ac *Bethléchem* tam parum recte effertur penultima brevi, ac graecum Lucae *Sycomoros* a multis Levitis in solemni Evangelii annuntiatione in media syllaba corripitur.

XXVI. Ex sola pariter *elementorum hebraicorum* cognitione ostenditur a non satis convincentia esse contra Judaeos argumenta, quae a non nullis nimis confidenter ab artificio *gemmatrico*, aut *notarico*, live etiam per *themuram* petuntur ad probandum SS Trinitatis mysterium ex primi *te Bereschit* verliculi verbis *Bará Elohim*. b Opportune tamen subinde adhiberi ex voce *Sesach* Jerem. 25. 26. & ex Joan. Apoc. 13. 18. ostenditur.

XXVII. Non multo majori notitia opus est ad refellendam calumniam Heterodoxorum, qui contendunt, *versum decimum quartum* Psalmi CXLIV. totum a Catholicis esse intrusum; item ad defendendam lectionem Vulgatae Exod. 32. v. 28. quae legit: *cecidisse in die illa 23000*; ubi aliae versiones habent 3000.

XXVIII. Ignorantes *declinationem*, *conjugationem* & *syntaxin* hebraicam in latinae scripturae lectione passim haerebunt incerti; saepe caligine mergentur; non raro in avia deslecent,

Verbi gratia I. casum pro casu male intelligentes; ut *Nunquid Sion dicet, homo & homo natus est.* Psalm. 86. II. adverbium verbi instar habentes, ut *non adjiciet, ut resurgat.* Amos 5. *Deus tu conversus vivificabis nos.* Psalm. 42. III. aut instar substantivi; ut *justitias judicabo.* Ps. 74. 3. IV. aut adjectivum per modum substantivi exponentes, ut *viri, numeri, cordis, nominis &c.* Vel V. omnino per modum verbi, ut *Novi diluculo* Thren. 3. IV.

VI. Sed & forma *Piél* verborum sensum vehementer augens, absque hebraeis perspicillis saepissime invisibilis est latine tantum doctis. Ut VII. nihil dicamus de magnificis *tropis* & *figuris* in latina versione non raro prorsus absconditis. VIII. In textu hebraico saepe quod



que mirus *literarum* alphabeticarum *ordo* ; IX. saepe gratissimus *verborum lusus*, latinis oculis & auribus omnino peregrinus. X. aliquoties Interpres noster Vulgatus nomina hebraica appellativa ceu nomina Propria retinuit; sed & XI. quandoque Propria, acsi Appellativa essent, latine vertit. Denique XII. innumeri in Scripturis supersunt modi loquendi hebraico idiomati ita proprii, ut nemo illos sit allecuturus, nisi face hebraica sit instructus, qua tenebras dispellat. Atque inde fit, ut non nulli zelum quidem, sed sine scientia habentes frequenter blasphement, atque in aliis suo probro ac non sine ecclesiae catholicae damno erroris arguant, quod ignorant.

XXIX. Linguae hebraicae, a latinae & aliarum occidentalium genio licet plurimum discrepantis, difficultates a Pililhebraeis Catholicis tantopere hodie mitigatae sunt, ut serio otidui labore a mediocris ingenii homine totum comprehendere possit. quantum ad Vulgatae nostrae mastiges retundendos, & ad confundendos aut iustruendos Judaeos Doctore Orthodoxo sufficiat. Iliadem hanc in nuce continet praeclarum illud *trifolium Cl. D. Weitenauer*.

XXX. Pro assertionis hujus argumento, & methodi hujus specimine ex eodem instrumento analytice explicabimus I. Benedictiones Jacobi Patriarchae Genes. 49. maxime a versu 8. ad 11. II. Vaticinium Esaiae de Virgine paritura c. 7. v. 14. seq. III. Praedictionem Micheae 5. 2. de loco Nativitatis Messiae. IV. Prophetiam Daniel IX. a Versu 21. ad 27.

XXXI. Denique Exercitationis gratia disputanda proponimus sequentia: I. *A. a. a.* Jerem. 1. 6. & 14. 13. non pueri balbutientis, sed vox dolentis est & obsecrantis II. *Puer* autem sicut Latinis & Graecis, ita Hebraeis nequaquam semper eam aetatem significat, quae inter infantiam & adolescentiam intercedit; sed filium, servum, famulum indicat. III. *Sched* locus tertius fidelium defunctorum in sensu Lutheri nullum habet in Scriptura sacra vestigium. IV. *Behemoth* Jobi 40. 10. seq. elephantem; & 41. Leviathan balaenam esse putamus. V. Vocabulum *Pajcha* non a graeco *παχω* (*patior*) sed ab hebraico *פסח* (*pasach*) transit derivandum esse contendimus. Denique VI. notissimum *שֶׁלֹחַ* *Schilo* in vaticinio Jacobi non a *שָׁלַח* (*shalach*) *misit*; sed a *שָׁלַם* (*schalach*) *pacificus fuit*, derivandum esse tenemus. EX



## *Ex Historia Ecclesiastica.*

I. **C**hristus ultimum suum Pascha celebravit decima quarta mensis Nisan, primo Azymorum die, qui non ipsum Festum, sed Parasceve festi Paschae erat, & feria sexta Judaica a solis occasu incipiens.

II. Tametsi nec hilum lucrarentur Protestantes, si etiam S. PETRUS Romae non sedisset; veritati tamen deferendum omnino est, & haec ipsi Cathedra ex invictis plane documentis adjudicanda.

III. Tam Papae Marcellini lapsum, quam Sinuessanum Concilium prorsus merito ponimus inter fabulas;

IV. Nec majori gaudet criterio lapsus Liberii, qui falso dicitur uni ex formulis Sirmiensibus calculum addidisse; hoc enim facere, vel non potuit, vel non voluit.

V. Neque S. Papae Zosimo praejudicii quidpiam patimur accedere; licet enim benignitate erga Celestium usus sit, non tamen ejus haeresim ullatenus adprobavit.

VI. Sed & Honorius ab omni malevolorum censura est omnimodis absolvendus; nec enim ejus persona fuit haeretica, neque scriptio, quamquam subsequenti tempore ista fuerit per generale Concilium justissime reprobata.

VII. Ariminensis Concilii Patres Arianæ Haereseos labem nunquam fuere foedati.

VIII. In trium Capitulorum negotio Ecclesia tam nervose defenditur, ut neque Chalcedonensi Synodo, neque secundae Constantinopolitanae error aliquis imputari queat.

IX. Quamvis S. ATHANASIUS a Synodo Tyria damnatus S. JULIUM Pontificem non adpellaverit; hic tamen causae ATHANASII cognitionem suscepit, deque illa summo jure, & Apostolica primæ Secis autoritate judicavit.

Nicae-



X. Nicaenis Patribus obtulisse Paphnutium Thebaidos Episcopum, ne Clericalem illi continentiam praeciperent, nullo satis firmo adseritur fundamento.

XI. Jure suo usus non est Constantinus Imperator, five cum Donatistis ad ejus tribunal adpellantibus alterum judicium Episcopale in urbe Arelatenſi conceſſit: five cum Felicis Aptungitani cauſam Aeliani Proconſulis judicio commiſit: five cum rursus provocantibus ad illius Majeſtatem Haereticis ultimum hac in cauſa judicium tulit.

XII. Abſolutio Sacramentalis graviorum peccatorum reſ poſt peractam duntaxat poenitentiam, & impletam ſatiſfactionem, primis Eccleſiae ſeculis, ordinaria lege concedebatur; fruſtra tamen & inique contrariam modernae Eccleſiae praxim poſt Petrum de Oſma carpit Arnaldus.

XIII. Obtinere a nobis haecenus nunquam potuimus, ut denuo poſt peractam jam ſemel publicam poenitentiam in eadem vel nova etiam crimina prolapiſ, nedum publicae, verum & privatae poenitentiae aditum fuiſſe praecluſum teneremus.

XIV. Diaconis abſolutionis Sacramentalis lapſis impertinendae nuſquam conceſſa eſt facultas. nec conceſſam eſſe ex S. CYPRIANO colligi poteſt.

XV. Tertullianum velut ſuo ſaventem errori circa realem Chriſti in Euchariſtia praesentiam Calviniani oſtendant ambicioſius, quam verius.

XVI. Quae ab antiquis Patribus & auctoribus Eccleſiaſtiſcis laudantur Sibyllarum oracula, non ſunt ſigmenta Chriſtianorum, ſed verae prophetiae.

XVII. Euchariſtiam cum confirmatione mox a baptiſmo infantibus quondam contributam antiqua Eccleſiae praxis oſtendit, quae tamen juſtis de cauſis per eandem Eccleſiam, quamvis AUGUSTINI aetate multo ſerius, fuit abrogata.

Asien-











